

亥傳疏雜著

金文寶

金文最卷

十一

一百。七

傳

祁忠毅公傳

趙秉文

公諱宰字彥輔江淮人宋季以醫術補官王師破汴
 得之後隸太醫海陵朝續遷通奉大夫太醫使自以
 數被恩遇欲自効會後宮有疾召宰診視既入見即
 上言諫南伐其畧言國朝之初祖宗有道伐無道曾
 不十年蕩遼滅宋當此之時上有武元文烈英武之
 君下有宗翰宗雄威謀之臣然猶不能混一區宇舉

繼

江淮巴蜀之地以遺宋人况今謀臣猛將異于曩時
且宋人無罪師出無名加以大起徭役首營中都民
已罷困興功未幾復建南京繕治甲兵調發軍旅賦
役煩重民人嗟怨此人事不修也間者晝星見于牛
斗熒惑伏于翼軫已歲自刑害在揚州太白未出進
兵者敗此天時不順也舟師水涸舳艫不繼而江湖
島渚之間吾雖有士馬之衆恐無所施是地利不便
也言甚激切海陵怒命戮之于市籍其家產天下哀
之強兵以逞誅戮諫臣固天所以開聖人也越明年

盡於盡字見
酒徒

世宗即位于遼東四年詔贈公資德復其田產泰和
初詔定大臣謚尚書省掾李秉鈞上言事有宜緩而
急若輕而重者名教是也伏見故贈資德祁宰以忠
言被誅至今天下慕義之士盡傷厥心是以世宗即
位首贈之以官陛下仍錄用其子甚大惠也雖武王
封比干之墓孔子譽夷齊之仁何以異此而有司拘
文以職非三品不在謚議之列臣竊疑之若職至三
品方得請謚當時居高官食厚祿者不為無人皆畏
罪洩忍曾不敢申一喙畫一策以為社稷計卒使立

顧

藥
繼

名死節之士願出于醫卜之流亦少愧矣臣以為非常之人當以非常之禮待之乞詔有司特賜謚以旌其忠斯亦助名教之一端也制曰可下太常謚曰忠毅醫師之職視疾疾謹葯石以決死生可也至于諫諍輔拂不濟則繼之以死此公卿大臣之所難能而公以一身易天下之患功雖不成亦志士仁人之用心噫非烈丈夫疇克臻此贊曰

孔子稱有殺身以成仁如公者可謂近之矣方海陵猜虐自用忍戕其母何愛于公而公區區納忠以下

廟

廟上卒餌虎口身雖歿而名不朽謚曰忠毅不亦宜乎
澄水集

師節婦傳 并序
隆州知軍 進士 郭 敬

序由自古婦人見於旌表紀錄者不必他才能但孝

節貞烈而已有一於此足以光華彤管歌艷青史若

夫陶母斷髮陵母伏劍指趙括以全宗聞食我而嘆

族三遷示義萬里代征膠木求賢蠡斯不如其先幾

之智訓子之慈忠以為君賢而逮下固非常有至於

投水求死惡賊斷手臨江負石托隣致養一概之善

自古依一格寫下同

三

頂松寫

實有可嘉若蔡女文而無節王妻辯不失貞尚且列
於漢傳標諸晉史與今所謂師氏者固有間矣謹錄
之以為節婦傳之曰
師氏同州澄城縣太平鄉雷某妻者姓師氏與夫同
黨里婦家世為農十八歲歸雷氏性孝謹年二十四
夫早死事舅姑以彌萬姑病且革藥石不效氏潛割
臂肉雜飲食以進病良已居久之舅姑各壽終追養
不^怠守義謹禮不出戶庭者二十餘年矣夫之猶子
雷判利其產密合其兄師達潛構媒妁私許本鄉楊

珍欲奪而嫁之氏初不知也及期強師氏行師氏大
驚愕誓死弗許楊及其兄訟於縣誣氏親受楊幣媒
妁証之師不得明縣勒氏歸楊氏呼曰天乎不諒人
只乃赴庭井而死聞者莫不傷其寃而咎其縣提刑
司上其事請加旌賞尚書省具以奏聞上命賜其美
名有司議師氏貞潔足以激頽風端謹足以為婦則
介焉如石可裂而不可奉白馬如玉可碎而不可繼
求之古人未易多得謹按謚法能固其所守曰節請
謚曰節上可其事仍命縣官致祭焉史臣曰三代之

甫字仲山金運革命廢補品子後以明法中選知西
 北路招討司事時有疑獄獄成當棄市公拒不受命
 雖怒而迫之莫能奪也後三日得實免死者百餘人
 招討公執手而謂之曰子之陰德如此其能無報乎
 可勉之徙宣德州司侯登州軍事判官享年八十而
 終子二曰龜曰鶴龜早世鶴字壽父幼聰敏好學手
 不釋卷同進士第出身主汾州西河簿宰宣寧縣進
 階儒林郎致仕六子曰仁曰義曰禮曰智曰信曰揖
 女曰蕤曰賓大師張公之甥也仁更名澤民字安宅

愛

肉

羸从羊

者

性敦厚博雅不喜檢局與人交豁如也事王父母孝
 居喪過哀友受同氣鄉黨稱焉父亡母病與妻張氏
 奉侍溫清頃刻不離命醫視藥必親嘗之以人內治
 羸割左臂肉雜羹中而進之母自是善飲食勿藥孝
 所感也郡首知之欲聞於朝廷母恐孝子之傷生力
 勸止之年逾三十不就資廢折節讀書母罄囊金聚
 經史以成其志工屬文頗為進取計有聲于場屋學
 之從之如林崇慶元年秋魁大同府選辛巳登進士
 第調河南福昌簿以廉能稱中外交辟不就世亂避

地於陸渾南山以詩酒自適號雲巖老人有著述間
於世壬辰秋九月一日卒於槐林平伊陽令周文炳
察判盧某備禮權厝焉累官朝列大夫妻清和縣君
二子曰琦曰璘女曰娥歸白登郭文振琦字伯玉游
學齊魯間貞祐之亂莫知所從璘易名攀麟字駕之
因夢故也自束髮從父訓不經他師指授十三薦名
于京師庚寅擢進士第任陝州州判辟舉靈臺令人
補省掾壬辰京師失守隨回軍渡北橋居河津癸巳
抵平陽行臺胡公異禮待之每事諮議焉內省妾管

瞻

氏

向印造經籍事已亥朝廷以近來文風不振分三科
諸路選試精業儒人監試劉中以瞻於才學皆優其
等充本府議事官權冑之職也妻韓氏漢王之後繼
母韓氏之姪女也二子曰史噲曰桂哥皆幼孟氏姬
姓魯公族孟孫之後保姓受氏於今不絕其間貴之
勇舍之約軻之儒光映百世凜然如生裔孫攀麟駕
之止其世系自高祖而下得其傳焉又懼其湮沒以
前後事略託所友而記之意者欲文之碑而誌于墓
歟或錄其實于太史世其家歟狀其行于太常議其

益歟將施之于彝鼎如古之所謂銘者自成其名歟
審如是其志遠且大矣其自叙者備矣尚何言哉然
有美而不聞于世友之過也故不敢不書以俟來者
莊靖集

王子小傳

王 鬱

先生名青雄一名鬱大興府人也十五代祖珪相唐
太宗官侍中永寧郡公曾祖衍金紫光祿大夫定海
軍節度使蕪萊州管內觀察使祖彥信邠州宜祿尉
父欽山東路轉運使司鹽鐵判官先生始生之月父

夢神人自天而下開所負紫絲囊賜一大鵬且云吾
後必來取其鵬在地振羽一鳴驚而寤訪諸日者繇
曰凜凜霜鶚賜自上穹既文于外又剛于中法生貴
子其應在公他日必作青雲之雄先生既生因採其
語為名字年十八父歿家素富貲累千金遭亂蕩散
無幾先生殊不以為意發憤讀書是時學者惟事科
舉時文先生為文一掃積弊專法古人最早為麻徵
君九疇所賞其後潛心述作未嘗輕求人知李欽叔
過釣臺得其所著傷魯麟導懷等賦并楊孝童碑王

注以多
皇叔密公壽

夢祥哀辭大驚騰書徧薦于諸公先生之名始滿天下自此去鈞臺放游四方又移隱陘山覃思古學正大五年先生年二十五矣來游京師諸公倒屣爭識其面宰相聞其名取所作文章將薦之事中格樗軒注皇叔密公壽閑閑朝廷二大老皆致禮于先生交館之明年以兩科舉進士不中西游洛陽放懷詩酒盡山水之歡先生平日好議論尚氣自以為儒中俠所向敢為不以毀譽易心又自能斷大事其論學孔氏能兼佛老佛老為世害然有從事于孔氏之心學

者徒能言而不能行縱欲行之又皆執于一隅不能周徧故嘗欲著書推明孔氏之心學又別言之行之二者之不同以去學者之弊其論經學以為宋儒見解最高雖皆笑東漢之傳注今人唯知蹈襲前人不取誰何使天然之智識不具而經世寔用不宏視東漢傳注尤為甚亦欲著書專與宋儒商訂其論為文以為近代文章為習俗所蠹不能遽洗其陋非有絕世之人奮然以古作者自任不能唱起斯文故嘗欲為文取韓柳之辭程張之理合而為一方盡天下之

妙其論詩以為世人皆知作詩而未嘗有知學詩者
故其詩皆不足觀詩學當自三百篇始其次離騷漢
魏六朝唐人過此皆置之不論蓋尖慢浮雜無復古
體故先生之詩必求盡古人之所長削去後人之所
短其論詩之詳皆成書其論出處以為仕官本求得
志行其所知以濟斯民其或進而不能行不若居高
養蒙行樂自適不為世網所羈頗以李白為則先生
受知最深者曰樛軒公完顏琦閑閑公趙秉文余先
子雷淵李獻能王若虛麻九疇史學優程震宋九嘉

其游從最久者曰李汾陽宏道元好問魏蟠張邦直
杜仁傑曹居一雷瑄龔禹錫張介王說王采苓趙著
張甫王鑄劉輯李全劉源楊真胡權徒單公履呂鯤
史環李佺侯策張傑劉郁左坦牛汝霖木虎遼烏林
谷爽僧性英諸公隨得書無次第至于心交者惟李
冶劉祁二人而已八年先生復至京師十二月遇兵
難京城被圍先生上書言事不報明年四月圍稍解
五月先生挺身獨出遠隱名山不知所終歸潛志

宇文太學虛中小傳

元好問

留

奔

虛中字叔通成都人宋黃門侍郎以奉使見晉仕為翰林學士承旨皇統初上京諸虜俘謀奉叔通為帥奪兵仗南奔事覺繫詔獄諸貴先被叔通嘲笑積不平必欲殺之乃鍛鍊所藏圖書為反具叔通歎曰死自吾分至于圖籍南來士大夫家例有之喻如高待制士談圖書尤多於我家豈亦反邪有司承風旨并寘士談極刑人至今寃之

中州集

吳學士激小傳

元好問

激字彥高宋宰臣拭之子王履道外孫而米芾元章

留

壻也工詩能文字畫得其婦翁筆意將命帥府以知名番之仕為翰林待制出知深州到官三日而卒有東山集十卷并樂府行于世東山其自號也出散關詩云春風蜀棧青山盡曉日秦州綠樹平愈甫索水墨以詩寄之云煙拂雲梢留淡白雲蒸山腹出深青三衢夜泊云山侵平野高低樹水接晴空上下星太清宮云玉座煙霞春寂寂石壇星斗夜蒼蒼呈正甫云手版西山聊復爾角巾東第定何時遊南溪潭云竹院鳴鐘疑物外畫橋流水似江南飛瀑巖云數樹

殘花喜春在一聲啼鳥覺山深詠鄭郎故伎云玉雪
自知塵不浣丹青難寫酒微醺送樂之侍郎云四海
蒼生謝安石一言宣室賈長沙送韓鳳閣使高麗云
東海絕域皇華使天上仙官碧落鄉偶題云江湖歌
枕夢風雪打窓時此類甚多樂府夜寒茅店不成眠
南朝千古傷心事誰挽銀河等篇自當為國朝第一
手而世俗獨取春從天上来謂不用他韻風流子取
對屬之工豈真識之論哉中州集

張祕書斛小傳

元好問

斛字德容漁陽人仕宋為武陵守國初理索北婦官
祕書省著作郎有南游北婦等詩行于世漁陽有峒
陽故詩中多及之如賦小孤山云天圍秋漲濶山背
夕陽孤岸樹晴猶溼汀煙近却無巫山對月云雲開
千里月風動一天星河池出郭云細草沙邊樹疎煙
嶺外村中江縣樓云綠漲他山雨青浮近市煙中秋
云月色四時好人心此夜偏松門峽云春木有秀色
野雲無俗姿賦禮部侍郎張浩然遼海亭云晴光搖
碧海遠色帶滄洲又賦臨漪亭云雨聲喧葦島水色

借秋空秋興樓云碣石晚風催鴈急昭祁寒漲與雲
平人多誦之予嘗見其文筆字畫皆有前輩風調字
文大學甚激賞之 中州集

蔡丞相松年小傳

元好問

松年字伯堅父靖宋季守燕山仕國朝為翰林學士
伯堅行臺尚書省令史出身官至尚書右丞相鎮陽
別業有蕭閒堂自號蕭閒老人薨謚文簡百年以來
樂府推伯堅與吳考高號吳蔡體有集行於世其一
自序云王夷甫神情高秀宅心物外為天下稱首言

少無宦情使其雅詠元虛不經世務超然遂終其身
則亦何必減嵇阮輩而當衰世頽俗力不可為之時
不能遠引高蹈顛危之禍卒與晉俱為千古名士之
恨又嘗讀山陰詩引考其論古今感槩事物之變既
言脩短隨化期于共盡而世殊事異興懷一致則死
生終始物理之常正當乘化歸盡何足深歎乃區區
列叙一時述作刊紀歲月豈逸少之清真簡裁亦未
盡忘情于此耶故因作歌併及之好問按此歌以離
騷痛飲為首句公樂府中最得意者讀之則其平生

自處為可見矣二子珪字正甫璋字持甫俱第進士
號稱文章家正甫遂為國朝文宗特甫非其比也自
大學至正甫皆有書名其筆法如出一手前輩之貴
家學蓋如此中州集

蔡太常珪小傳

元好問

珪字正甫大丞相松年之子七歲賦菊詩語意驚人
日授數千言天德三年進士擢第後不赴選調求未
見書讀之其辨博為天下第一歷澄州軍事判官三
河簿正隆三年銅禁行官得三代以來鼎鐘彝器無

慮千數禮部官以正甫博物且識古文奇字辟為編
類官丁父憂起復翰林脩撰同知制誥改戶部員外
郎太常丞朝廷稽古禮文之事取其議論為多大定
十四年由禮部郎中出守維州道卒有續歐陽文忠
公集錄金石遺文六十卷古器類編三十卷補南北
史志書六十卷水經補亡四十篇晉陽志十二卷金
石遺文跋尾一十卷燕王墓辨一卷傳于世國初文
士如宇文大學蔡丞相吳深州之等不可不謂之豪
傑之士然皆宋儒難以國朝文派論之故斷自正甫

金文最
為正傳之宗黨竹谿次之禮部閒閒公又次之自蕭
戶部真卿倡此論天下迄今無異議云 中州集

高內翰士談小傳

元好問

士談字子文一字季默宋韓武昭王瓊之後宣和末
任忻州戶曹仕國朝為翰林直學士皇統初預宇文
大學之禍有蒙城集行于世如云寒花貪晚日瘦竹
強秋霜又題禹廟云可憐風雨胼胝苦後世山河屬
外人時人悲之子公振字特夫亦有詩名 中州集

馬御史定國小傳

元好問

定國字子卿荏平人唐中令周喬孫少日志趣不凡
宣政末題詩酒家壁有蘇黃不作文章伯章蔡翻為
社稷臣之句用是得罪亦用是得名阜昌初遊歷下
亭以詩撼齊王豫豫召與語大悅授監察御史仕至
翰林學士石鼓自唐以來無定論子卿以字畫考之
云是宇文周時所造作辨餘萬言出入傳記引據甚
明學者以比蔡正甫燕王墓辨初學詩未有入處夢
其文與方寸白筆從是文章大進自號齋堂先生有
集傳于世 中州集

祝太常簡小傳

元好問

簡字庶夫單父人宋末登科國初倅某州仕至朝奉
郎太常丞魚直史館有鳴鳴集行于世其詩說有云
予政和丁酉任洺州教官是時括蒼鮑慎由欽止出
所註杜詩說天王守太白守讀如狩於河陽之狩高
秋登寒山南望馬邑州馬邑州在城州界予檢唐書
志寶應元年徙馬邑州于鹽井城欽止為有據矣舊
注馬邑屬鴈門與杜子美作詩處全無闕涉後人遂
謂王源叔謬于牽引不知源叔初不注杜詩予識其

孫彥朝彥朝不說杜詩非其大父注蓋彥朝不學見
流俗皆讀舊注因而認有可歎可歎好問常以此問
趙禮部趙云庶夫前輩必不妄試更考之今日見吳
彥高東山集有贈李東美詩引云元祐間祕閣校對
黃本鄧忠臣字慎思余柳氏姨之夫今世所注杜工
部詩乃慎思平生究竭心力而為之者錢板家標題
遂以託名王源叔翰林而王公前後記初無一語及
此注而後記又言如源叔之能文止作記于後則源
叔不注杜詩為可見矣舉世雷同無為辨之者宣和

近貴李東美有才藻善行書且喜作小楷所寫杜集
精密道麗有足嘉賞為作古詩一篇紙尾因記鄧公
事後人聞此其誰不疑然予少時目擊不可不識姑
以告李侯非求信後人也彥高此說正與廉夫合近
歲得浙本杜詩是源叔之孫祖寧所傳前有序引備
言其大父源叔未嘗注杜詩廉夫考高益可信故併
記于此廉夫詩甚工如賦雪云雲屋無寒夢油燈有
細香書懷云白髮渾無賴朱顏更不回遮眼細書聊
引睡扶頭濁酒最關情此類甚多 中州集

張子羽小傳

元好問

子羽字叔翔東阿人馬定國齋堂集載其師友六人
其一香巖可道上人題比陽道邊僧舍云山頭翠色
僧房靜山下紅塵客路長五月行人汗如雨豈知高
處有清源其一鮮于可字東父蜀嘉州人從祖先父
之武皆有名于時東父詩有小雨潤履綦花氣襲芳
襟十里青山堪布屐半篙春水已勝舟之句其一高
鵬化字圖南平原人少有能詩聲如盤中酒影金蛇
活與流虹聚石缸之句皆竒怪不凡其一王景微字

彦美祁國文獻公溥之後贈定國詩云澗下松杉已
蔽牛溪中蘋藻可供羞故鄉未有終焉計欲指吳山
歸去休其一吳縝字子長東平人文肅公奎之孫年
三十以食貧暫仕即歸隱于魚山狼溪之側寄定國
云情馳夏日流目斷晚雲碧新詩從何來遠自金馬
客雄深作者意奔軼古人迹名高四海望髮未一莖
白應嗤窮途士抽簪老泉石采蕨在南山驅牛向東
陌勞生豈不苦衣食迫晨夕膏梁無宿懷茅茨得真
適卒歲將何求一飽惟力穡訪國城石氏云昔我訪

雨

君處樹涼炎暑收今君訪我來城空殘雪留經時少
乘興雨至皆空投茅茨隔溪上車馬度城頭不聞機
杼聲但聽溪水流向來方圓翁曾伴此中遊近聞大
梁至京塵滿衣裘相思懶歸步落日風颼颼山居云
西首魚山崦北連黃石祠崇岡在東南我家山北陞
地僻少人事終朝掩柴扉尊酒不常得書卷聊自怡
春風數日來處處生蕨薇寸心復何累一飽良可期
當年終南人捷徑已貽譏知我無心者豈願悠悠辭
擬淵明貧居云淒其歲云暮北風無時休晨興倦薪

水夜寐乏衾裯缺月正裒回宿鳥頻啾啾欲無憔悴
歎奈此霜霰秋松楸脫兵火環堵且淹留閉門念袁
安守賤弔默妻坐讀貧士詩吾乃淵明儔溪上招王
仲先云幽居復何為冬來性成懶柴門俯清溪寸步
出亦罕今晨偶携杖愛此晴日暖寓目隨所之行到
南溪畔背陰雪猶積向暖冰全泮搯頭卧石上仰面
蒼崖斷泉聲何從來乍喜兩耳換平分意甚遲斗落
勢方悍坐來百慮忘還惜日景短塵寰多憂虞中林
足閒散故人戀明時歸休苦遲緩幅巾來何時臨流

話幽款叔翔亦其一也定國謂叔翔于文章無所不
能嘗仕國朝官洛陽云

中州集

朱諫議之才小傳

元好問

之才字師美洛西三鄉人宋崇寧間登科入齊為諫
官坐直言黜為泗水令尋乞間退寓居滋陽因而家
焉昆弟數人皆有文名師美自號慶霖居士有霖堂
集傳於世如云魯甸分鴻影齊山入馬蹄門靜堪羅
雀書成不換鵝雨過好花紅帶潤日長嘉樹綠移陰
此類甚多子瀾字巨觀

中州集

劉內翰著小傳

元好問

著字鵬南舒州皖城人宣政末登進士第歸朝預銓
調碌碌州縣年六十餘始入翰林克脩撰出守武遂
終于忻州刺史皖城有玉照鄉既老號玉照老人示
不忘本云 中州集

施內翰宜生小傳

元好問

宜生字明望浦城人宣和末為穎州教官仕齊任國
朝官至翰林學士自號三住老人有集行于世賦柳
云朱門處處臨官道流水年年遠禁宮草書云臨池

翁忽雲霧集舞劍浩蕩波濤翻山谷草書云行所當
行止當止錯亂中間有條理意溢毫搖手不知心自
書空不書紙社日云濁澗迴湍激青烟弄晚暉緣隨
春酒熟分與故山違社鼓喧林莽孤城隱翠微山花
羞未發燕子喜先歸又云割少談諧語分均軍制功
靈祇依古樹醉叟泥村童萬里開耕稼三時順雨風
行春從此樂著意酒杯中初在穎州日從趙德麟游
頗得蘇門沾丐云 中州集

朱葭州自牧小傳

元好問

厭

自牧字好謙棣州猷次人皇統中南選宋端卿榜登
科大定初以同知晉寧軍事卒官有詩云寒天展碧
供飛鳥落日留紅輿斷霞又云水禽孤影白霜果半
腮紅海氣升孤月崑姿起暝烟山雪尋崖斷林烟逐
樹低燈殘星在壁霜重水漫衾句法之工類如此中
州集

孫內翰九鼎小傳

元好問

九鼎字國鎮忻州定襄人天會六年經義第一人在
大學時遊金明作詩云片片桃花逐水流東風吹上

木蘭舟隔溪紅粉休相認年少孫郎不姓劉弟九疇
億俱有時名三人同榜登科吳彥高贈國鎮詩云孫
郎有重名談笑取公卿清廟瑟三嘆齋房芝九莖其
為名流所稱道如此吾州文派先生指授之功為多
年八十餘卒中州集

趙內翰可小傳

元好問

可字獻之高平人貞元二年進士仕至翰林直學士
風流有文采詩樂府皆傳于世號玉峯散人集子述
字勉叔承安二年登科賦雪云奇貨可居天種玉太

平有象麥連雲屏山故人外傳說勉叔詩章字畫皆有父風性落魄嗜酒卒以樂死個儻奇男子也中州集

金文最卷九十二

傳

劉西崑汲小傳

元好問

汲字伯深南山翁之子天德三年進士釋褐慶州軍事判官入翰林為供奉自號西崑老人有西崑集傳於家屏山為作序云人心不同如面其心之聲發而為言言中理為之文文而有節謂之詩然則詩者文之變也豈有定體哉故三百篇什無定章章無定句句無定字字無定音大小長短險易輕重惟意所適

謂

雖役夫室妾悲憤感激之語與聖賢相雜而無媿亦
各言其志也已矣何後世議論之不公耶齊梁以降
病以聲律類俳優然沈宋而下裁其句讀又俚俗之
甚者自謂靈均以來此祕未睹此可笑者一也李義
山喜用僻事下奇字晚唐人多效之西崑體殊無典
雅渾厚之氣反詈杜少陵為村夫子此可笑者二也
黃魯直天資峭拔擺出翰墨畦徑以俗為雅以故為
新不犯正位如參禪著末後句為具眼江西諸君子
翕然推重別為一派高者雕鐫尖刻下者模影剽竄

公言韓退之以文為詩如教坊雷大使舞又云學退
之_不至即一白樂天耳此可笑者三也嗟乎此說既行
天下寧復有詩耶比讀劉西崑詩質而不野清而不
寒簡而有理澹而有味蓋學樂天而酷似之觀其為
人必傲世而自重者頗喜浮屠邃于性理之說凡一
篇一詠必有深意能道退居之樂皆詩人之自得不
為後世論議所奪真豪傑之士也

中州集

劉丙翰瞻小傳

元好問

瞻字晶老亳州人天德三年南榜登科大定初召為

史館編脩卒官黨承旨世傑鄰著作元與魏內翰飛
卿皆嘗從之學品老自號櫻寧居士有集行于世作
詩工于野逸如厨香炊豆角井臭落椿花之類為多
中州集

郝內翰侯小傳

侯字子玉太原人正隆二年進士仕至河東北路轉
運使子居簡字仲寬進士不第有詩名太原平陽間
居中字仲純樞密院令史出身嘗刺坊州人物楚楚
所謂文獻不足猶超人群者也正大末除鳳翔治中

南山安撫使詩亦有功子玉自號虛舟居士有集行
於世如云勞生雖可厭清景亦自適殊有古意也中
州集

張郾城公藥小傳

元好問

公藥字元石宰相安簡公孝純永錫之孫以文蔭入
仕嘗為郾城令詩號竹堂集寒食云一百五日寒食
節二十四番花信風新年云客情病裏度殘臘老色
鏡中添一年雲樹縈寒猶漠漠竹梢迎日已娟娟春
晚云細風皺綠漲溪水小雨點紅添海棠又云芭蕉

宏

麓

葉斜卷舒雨餘醺架小縱橫春人喜傳之子觀字彥
國仕為某軍節度副使孫厚之字茂弘承安五年進
士中州集

任南麓詢小傳

元好問

詢字君謨易州軍市人父貴有才幹善画喜談兵宣
政間游江浙君謨生于虔州為人慷慨多大節書法
為當時第一畫亦入妙品評者謂畫高于書書高于
詩詩高于文然王內翰子端獨以其才具許之君謨
正隆二年進士歷省掾大名總幕益都都司判官北

今

京鹽使課殿降泰州節廳時無借力者故連蹇不進
六十四致仕優游鄉里家所藏法書名畫數百軸日
夕展玩不知老之將至年七十卒平生詩數千首君
謨歿後皆散失今所錄皆得於傳聞之間如山居云
種竹六七箇結茅三四間稍通溪上路不礙屋頭山
黃葉水清淺白雲風往還戊申春晚云水邊團月翻
歌扇風裏垂楊學舞腰南郊小隱云林邊鳥語月微
下竹裏花飛春又深前輩喜稱道之中州集

馮臨海子翼小傳

元好問

子翼字士美大定人正隆二年進士性剛果與物多
忤用是仕宦不進以同知臨海軍節度使事致仕居
真定有詩樂府傳于世父仲尹子叔獻三世皆仕至
四品職名亦相近士美詩有筆力如賦臨海乳山萬
松堂為可見矣中州集

史明府旭小傳

元好問

旭字景陽第進士歷臨真秀容二縣令有詩一卷傳
于世臨真上元夜雪云斜風吹雪滿山城壓屋雲低
未肯晴天女散花春一色燭龍銜燄夜三更交口揚

氏莊云青黃遠屋禾將熟紫白依闌菊半開差赴綏
德云也解笑人沿路菊不堪供稅帶山田先人嘗從
之游稱其時有佳句云中州集

邊內翰元鼎小傳

元好問

元鼎字德舉豐州人兄元勳元恕俱有時名號三邊
德舉十歲能詩天德三年第進士以事停銓世宗即
位張太師浩素薦供奉翰林出為邢州幕官復坐誣
累遂不復仕進德舉資稟疎俊詩文有高意時輩少
及如云雲鍾號曉月風絮亂春燈晚照入簾如有意

表

春風過水畧無痕五更好夢經年事三月殘花一夜
風拂子云驅去青蠅讒口遠拂開黃卷聖言新雲露
月華天半白星移河漢夜微涼此類甚多中州集

李承旨晏小傳

元好問

晏字致美高平人唐順宗第十六子福王維之苗裔
父森字彥實工于詩有云少年日日醉花邊短白長
紅一一怜自笑老來心尚在惡風常廢五更眠又賦
梅云冰骨有香魂乍返玉顏無暈酒全消人多傳誦
之致美皇統二年經義進士釋褐臨汾丞時張太師

邱

浩判平陽一見愛其才為之延譽稍遷遼陽幕官與
興陵有藩邱之舊入翰林為學士高文大冊號稱獨
步拜御史中丞初遼入掠中原人及得奚渤海諸國
生口分賜貴近或有功者大至一二州少亦數百皆
為奴婢輸租為官且納課給其主謂之二稅戶大定
初一切免為民間山寺僧賜戶三百與僧共居供役
而不輸租故不在免例訴者積年臺寺不為理又訴
於致美上章大畧謂天子作民父母當同仁一視分
別輕重乃胥吏舞文法之敝陛下大明博照豈可使

致美

復

天下有一民不被其澤者且沙門既謂之出家而乃聽其與男女雜居乎書奏宰相持不可世宗詔致美與相詰難致美伏御座前曰前日車駕幸遼東問山寺曾供從官一宿之具寺僧物陛下物也陛下無以此直寺僧而使三百家受屈世宗大笑曰李晏劫制我耶即日免之明昌初為禮部尚書分諸道府試覆經義設經童科皆自致美發之出為沁南軍節度使告老不從改昭毅軍節度使且授子仲略澤州刺史以榮之時澤潞旱甚致美擅發倉粟三萬石拯餓者

因上章請罪章奏而本道提刑彈章亦至章宗謂宰相言提刑職當然李晏義當然不之罪也仲畧字簡之大定二十二年進士仕至山東路按察使道陵愛其俊快比為脫帽鷓云致美自號游仙野人簡之丹源鈞徒有集傳于世簡之之子肯播字克紹肯獲字克守肯德字克脩中州集曰蘇軾詩入山尋仙隱論文王都運寂小傳云王武曾隱肯字元好問寂字元老薊州玉田人系出三槐父礎字鎮之國初名士仕至歸德府判官元老天德三年進士興陵朝

以文章政事顯終于中都路轉運使壽六十七謚文
肅有拙軒集北遷錄傳于世三子欽哉直哉鄰哉俱
能吏元老專於詩有云生涯貧到骨家具少於車元
夕感懷云殘夢關河鼃禁月舊游燈火馬行春留別
郭熙民云五年風雪黃州閨萬里關河渭水秋與涿
郡先主廟詩當年竹馬戲兒曹笑指樓桑五丈高故
國神游得無恨壞垣風雨夜蕭騷人共傳之行記載
其先人雞山一詩云記得垂髫此地遊雞山孤立水
平流而今重過山前路山色青青人白頭予謂詩固

甚

佳恨其依倣蘇才翁太耳

中州集

蓮峯真逸喬辰小傳

元好問

辰字君章初名逢辰洪洞人天德三年進士詩樂府
俱有名子字字德容八歲能鼓琴召入東宮顯宗稱
其不凡大定十六年登科貞祐初為益都按察轉使
與田泳器之俱歿兵間

中州集

劉龍山仲尹小傳

元好問

仲尹字致君蓋州人後遷沃州正隆二年進士以潞
州節度副使召為都水監丞卒致君家世豪侈而能

運

折節讀書詩樂府俱有蘊藉有龍山集嘗於其外孫
欽叔處見之叅涪翁而得法者也中州集

劉訥室迎小傳

元好問

迎字無黨東萊人初以廕試部掾大定十三年用薦
書對策為當時第一明年登進士第除幽王府記室
改太子司經顯宗特親重之二十年從駕涼陘以疾
卒章宗即位錄舊學之勞賜其子國樞進士第無黨
自號無諍居士有詩文樂府號山林長語詔國學刊
行中州集

而州

党

許內翰安仁小傳

元好問

安仁字子靖河間樂壽人大定七年進士歷禮部員
外郎出守澤州遷同知河南府事以汾陽軍節度使
致仕子古字道真父子俱名流也中州集

許丞旨黨公小傳

元好問

公諱懷英字世傑宋太尉進之十一代孫父純睦自
馮翊來以從仕郎為泰安軍錄事參軍卒官妻子不
能歸遂為奉符人公之在孕也太夫人夢道士吳筠
來託宿及公生儀觀秀整如神仙然少穎悟日授千

餘言師毫社劉崑老濟南辛幼安其同舍生也嘗試
東府取解魁是後困於名場遂不以世務嬰懷放浪
山水間詩酒自娛箠瓢屢空晏如也夫人石氏徂徠
先生之後亦能安貧守分既久鄉豪傑有知公者稍
料理之大定十年擢進士甲科調成陽軍事判官汝
陰令入為史館編脩應奉翰林學士出為泰定軍節
度使為政寬簡不言而人化召為翰林學士承旨致
仕大安三年九月年七十八終於家是夕有大星殞
於所居之堂眾驚視之而公已逝矣謚曰文獻禮部

閒閒公墓誌云公之文似歐公不為尖新奇險之語
詩似陶謝奄有魏晉篆籀入神李陽冰之後一人而
已嘗謂唐人韓蔡不通字學八分自篆籀中來故公
書上軋鍾蔡其下不論也小楷如虞褚亦當為中朝
第一書法以魯公為正抑誠懸以下不論也古人名
一藝而公獨兼之可謂全矣

中州集

黃華王先生庭筠小傳

元好問

庭筠字丹端熊岳人父遵古字仲元正隆五年進士
仕為翰林直學士才行兼備道陵所謂昔人君子者

也子端早有重名大定十六年甲科文采風流照映
一時歷州縣用薦者供奉翰林承安中為言事者所
累謫鄭州幕官未幾復應奉稍遷脩撰卒官年四十
七子端詩文有師法高出時輩之右字畫學米元章
其得意處頗能似之墨竹殆天機所到文湖州以下
不論也平生愛天平黃華山水居相下十年自號黃
華山主有集傳于世其歿也道陵有詩悼之其引云
王導舌朕之故人也乃庭筠復以才選直禁林者首
尾十年今茲云亡玉堂東觀中無復斯人矣其家以

遺文來上尋繹之久良用愴然詩不錄屏山故人外
傳云子端出家子風流蘊藉冠冕一時為人眉目如
畫美談笑俯仰可觀外視若簡貴人初不敢與接一
見之後和氣津津溢於衡宇間又其折節下士如恐
不及苟有可取極口稱道之故人人恨相見之晚也
子萬慶字禧伯詩筆字畫俱有父風仕為行尚書省
左右司郎中猶子明伯幼歲學書書家即稱賞之個
儻無機膂力絕人曾有詩云釣鼈公子鐵心胸興在
三山碧海東千尺雲帆已高揭不知何日得秋風死

于鄧州年未四十也中州集
禮部聞聞趙公秉文小傳
秉文字周臣滏陽人間聞其自號也幼穎悟讀書若
夙習大定二十五年進士應奉翰林文字上書論宰
相胥持國當罷宗室守貞可大用又言獄訟征伐國
之大政自古未有君以為可大臣以為不可而可行
者坐譏訕免官未幾起為同知岢嵐軍州事轉北京
路轉運司度支判官承安五年冬十月陰晦連日宰
相萬公入對上頷謂萬公曰卿昨言天日晦冥亦猶

人君用人邪正不分者極有理趙秉文曩以言事降
授聞其人有才藻工書翰又且敢言朕非棄不用以
北邊軍興姑試之耳泰和二年改戶部主事翰林脩
撰出為寧邊州刺史一年改平定州治化清淨所去
人思之貞祐初中國仍歲被兵公建言時事可行者
三一遷都二導河三封建朝廷畧施行之四年除翰
林侍講學士明年轉侍讀興定中拜禮部尚書兼侍
讀同脩國史知集賢院開興正月京師戒嚴時公已
老日以時事為憂雖食息頃不能忘每聞一事可便

元

氏一士可擢用大則拜章小則為當路者言殷勤鄭
重不能自己竟用是得疾薨年七十四自幼至老未
嘗一日廢書不觀著易叢說十卷中庸說一卷揚子
發微一卷大玄箋贊六卷文中子類說一卷南華略
釋一卷列子補注一卷剛集論語孟子解各一十卷
資暇錄一十五卷所著文章號滄水集者前後三十
卷大槩公之文出于義理之學故長于辨折極所欲
言而止不以繩墨自拘七言長詩筆勢縱放不拘一
律律詩壯麗小詩精絕多以近體為之至五言大詩

淳

則沉鬱頓挫學阮嗣宗真澗簡淡學陶淵明以他文
較之或不近也字畫則有魏晉以來風調而草書尤
警絕殆天機所到非學能至宣徽舜卿使河湟夏人
多問公及王子端內翰起居狀朝廷因以公報聘其
為四方所重如此論者謂公至誠樂易與人交不立
崖岸主盟吾道將三十來未嘗以大名自居仕五朝
官六卿自奉養如寒士不知富貴為何物蓋學道所
得云中州集

常山周先生昂小傳
元好問

元

昂字德卿真定人父伯祿字天錫師事玄真先生褚承亮大定初第進士仕至同知沁南軍節度使事德卿年二十一擢第釋褐南和簿有異政遷良鄉令入拜監察御史路宣叔以言事被斥德卿送以詩坐謗訕停銓久之起為龍州都軍以邊功得復召超三司判官大安軍興權行六部員外郎德卿傳其甥正從之文法云文章工于外而拙于內者可以驚四筵而不可以適獨坐可以取口稱而不可以得首肯又云文章以意為主以字語為役主強而役弱則無令

正字元本六換糊
似王字

正字元本六換糊

不從令人往往驕其所役至跋扈難制甚者反役其主雖極辭語之工而豈文之正哉德卿初有常山集喪亂後不復見從之能記三百餘首因得傳之屏山故人外傳云德卿以孝友聞又喜名節藹然仁義人也學術醇正文筆高雅以杜子美韓退之為法諸儒皆師尊之既歷臺省為人所擠竟坐詩得罪謫東海上十數年始入翰林言事愈切出佐三司非所好從宗室承裕軍承裕失利跳走上谷衆欲還歸德卿獨不可城陷與其從子嗣明同死於難嗣明字晦之短

正字元本六換糊

右

小精悍有古俠士風年未三十交游半天下識高而志大善談論而中節作詩喜簡淡樂府尤溫麗最長於義理之學下筆數千言初不見其所從來試於府於禮部俱第一擢第主涑水簿從其叔北征得還不忍去使悔之不死文字不及其叔而理性當過之嘗謂學不至邵康節程伊川非儒者也其說類此而天不假年悲夫

中州集

元真先生褚承亮附小傳

元好問

承亮字茂先宣和六年擢第調易州戶曹會皇子郎

附
元真先生褚承亮附小傳
元好問

君破真定拘境內進士七十二人赴安國寺試策策目上皇不道少主失信希肯極口毀詆茂先離席揖主文劉侍中言君父之過豈臣子所當言長揖而出劉為之動容比榜除茂先被黜餘悉放第狀元許必革自號七十二賢榜帥府重其名檄茂先以易州司戶知橐城漫一應之尋解印去年七十終弟子謚為元真先生

中州集

元真先生

元好問

灑字文孺第進士明昌末終于禮部郎中性冲澹學

党党

云

道有得黃山其自號也開開趙公云黃山正書體兼
顏蘇行草備諸家體超放又似楊凝式當處黃魯直
蘇才翁伯仲間黨承旨篆陽冰以來一人而已而以
黃山配之至今人謂之黨趙有黃山集行於世涼陞
云峩峩景明宮五雲湧蓬萊山空白晝永野曠清風
來放遠亭云晴日未消千嶂雪暖風先放一川花青
天低處是平野白鳥去邊明落霞秦村道中桃花都
被風吹却楊柳似將煙染成其餘多稱此中州集

劉左司昂小傳

元好問

昂字之昂興州人大定十九年進士曾高而下以科
名相踵者七世矣昂天資警悟律賦自成一家輕便
巧麗為場屋捷法作詩得晚唐體尤工絕句往往贈
炙人口張秦娥者頗能小詩其賦遠山云秋水一抹
碧殘霞幾縷紅水窮霞盡處隱隱兩山峰其後流落
之昂贈詩云遠山句好畫難成柳眼才多總是情今
日衰顏人不識倚爐空聽煮茶聲又云二頃山田半
欲蕪子孫零落一身孤寒窓昨夜蕭蕭雨紅日花梢
入夢無娥為之泣下屏山故人外傳記之昂早得仕

年三十三省椽考滿授平涼路轉運副使人謂卿相
可坐致矣術士有言之昂官止五品者之昂自望者
甚厚不信也俄丁母憂為當塗者所忌連蹇十年卜
居洛陽有終焉之志有薦其才於道陵者泰和初自
國子司業擢左司郎中將大用矣會遼陽人大中欲
搖執政賈鉉為言者所劾辭連之昂道陵震怒一時
聞人如史肅李著王宇宗室從郁皆譴逐之鉉尋亦
罷政之昂降上京留守判官道卒竟如術者之言中
州集

魏內翰搏霄小傳

元好問

搏霄字飛卿初用蔭補以薦書從事史館明昌中宏
詞中選授應奉翰林文字未幾卒飛卿詩以富艷稱
如張公子席間賦嵩山筆力豪逸黨承旨許其在劉
無黨之上云 中州集

王隱君礪小傳

元好問

礪字逸賓先世家臨洺至逸賓遂為汴梁人博學能
文不就科舉孝友天至非其食不食家無甌石之儲
晏如也明昌中故相馬吉甫惠判開封舉逸賓王彥

党

党教

功游宗之德行才能逸賓得鹿邑主簿就乞致仕彦
功以親老調鞏州官宗之讓不受三人者雖出處不
齊而時人皆以高士目之閒閒公嘗集黨承旨趙黃
山路司諫劉之昂尹無忌周德卿與逸賓七人詩刻
木以傳目為明昌辭人雅製云中州集

劉左司中小傳

元好問

中字正夫漁陽人屏山故人外傳云正夫為人短小
精悍滑稽玩世中明昌五年詞賦經義第詩清便可
喜賦甚得楚辭句法尤長于古文典雅雄放有韓柳

奉

氣象教授弟子王若虛高法鵬張履張雲卿皆擢高
第學古人者翕然宗之曰劉先生以省掾從軍南下
改授應翰林文字為主帥所重常預祕謀書檄露布
皆出其手軍還授左司都事將大用矣會卒有文集
藏於家周德卿嘗謂正夫可敬從之可愛之純可畏
皆人豪也 中州集

路司諫鐸小傳

元好問

鐸字宣叔伯達之子與弟鈞和叔父子俱有重名而
宣叔文最奇尤長於詩精微緻溫潤自成一家任臺

諫有古直臣之風貞祐初出為孟州防禦使城陷投
沁水死有虛舟居士集得之鄉人劉庭幹家中州集

師拓小傳

元好問

拓字無忌平涼人舉進士不中明昌中有司薦其才
以嗜酒不果作詩有氣而工於鍊句如賦鴈云天低
仍在眼山沒更傷心溪上云夕陽明菡萏秋色靜蕙
葭白曳衝烟鷺紅翻漾水霞春日池上云水風涼綺
席沙日麗金壺燕市酒樓云氣清天曠蕩露白野蒼
涼又荷蒼秋近葉蓮膩雨餘花大為時人所稱中州

集

鄴著作作權小傳

元好問

權字元興安陽人作詩有筆力圃田道中云斷橋經
壞屋古道入崩山石礧云蒼崖秀苔花壞道補石棧
徐行下井底斗上出天半綺岫宮云離宮歸相望百
年幾游歷獨知窮已樂衆懟不汝恤繁華忽灰燼歲
月空瓦礫赤水道中云水近墟寒氣星殘曳白芒燒
痕云炎威隨變滅餘燼委丘壤田疇更斷續原隰依
下上班班澗溪毛往往漏尋丈晴空墮雪影夕照墜

秋嶂昆明翻刻灰黑水走濁浪烟中一線來細路入
空曠游石甕云雲間雨石角相鬪如關門上連石甕
口豁訝愁猿猿槁如空洞腹莹滑無纖痕何年補天
手月斧雲為斤琢成蒼玉甌覆此玻璃盆龍潭云臺
高野望遠地僻春意間郊行云強引村醪終少味漫
留詩句嬾題名村行云瘦藤籬角蔓雜草樹根花夾
道懸新棗荒畦卧晚瓜又云歲豐人樂社秋近客思
家書事云佳樹漲新綠危簷棲老紅與顯叔云茶竈
翻春白糟床滴曉紅雜詩云樹影僧携錫鈴聲客到

門片月冷千嶂敗橋通兩村此類甚多元輿父瓊國
初有功仕至武寧軍節度使元輿以門資叙官不達
朝廷高其才明昌初以著作郎召之未幾卒有坡軒
集行于世中州集

禮部楊公雲翼小傳

元好問

雲翼字之美樂平人明昌五年經義進士第一人詞
賦亦中乙科天資穎悟博通經傳至於天文律歷醫
卜之學無不臻極事母孝與人交款曲周密處事詳
雅而能以大節自任南渡後二十年與禮部間間公

代掌文柄時人號楊趙而公以後輩自處不敢當也
宣宗頻歲南伐事勢有決不可者論議之際時相多
以避嫌不敢言公獨直言極諫以為兩淮生靈皆隍
下赤子不能外禦北兵而取償於宋以天下為度者
不知是也是後再出兵時全一軍幾為宋人所覆宣
宗悔悟責主兵者曰我當何面目見楊雲翼耶興定
未拜吏部尚書中外望其旦暮入相竟以足疾不果
正大五年八月終于翰林學士年五十九謚曰文獻
天下識與不識皆哀惜之至今評者以為百餘年以

曰

來大夫士身備四科者惟公一人而已子恕字誠之
第進士今在燕中 中州集

屏山李先生純甫小傳

元好問

純甫字之純弘州人承安 年進士仕至尚書右司
都事為舉子曰亦自不碌碌于書無所不闕而於莊
周列禦寇左氏戰國策為尤長文亦畧能似之三十
歲後徧觀佛書能悉其精微既而取道學書讀之著
一書合三家一就伊川橫渠晦庵諸人所得者而商
略之豪髮不相貸且恨不同時與相詰難也性嗜酒

未嘗一日不飲亦未嘗一飲不醉眼花耳熱後人有
發其談端者隨問隨答初不置慮漫者知所以統室
者知所以通傾河瀉江無有窮竭好賢樂善雖新進
少年游其門亦與之為尔汝交其不自貴重又如此
迄今論天下士至之純與雷御史希顏則以中州豪
傑數之子全字稚川今居鎮陽中州集

史御史肅小傳

元好問

肅字舜元京兆人僑居北京之和衆幼孤養于外家
天資挺特高才博學作詩精緻有理尤善用事古賦

累

亦奇峭工於字畫業科舉為名進士立朝為才大夫
優于政事嚴而不苛所至有聲吏畏而安之累以廉
陞歷赤縣及幕官入為監察御史遷治書出刺通州
大中黨獄起為所註誤謫靜難軍節度副使大安初
召為中都路轉運副使起戶部正郎復坐錮降同知
汾州事卒官舜元素尚理性之學屏山學佛自舜元
發之晚年頗喜養生謂人可以不死嘗欲棄官學道
而竟止於此可哀也已詩號澹軒遺藁今在燕都鄭
庭幹家其平生則見之屏山故人外傳云中州集

蕭尚書貢小傳

元好問

貢字真卿咸陽人唐太傅寘十七代孫博學能文不減前輩蔡正甫大定二十二年進士自涇州觀察判官召補省掾不四五月拜監察御史累遷右司郎中預脩泰和律令所上條畫皆委曲當上心興陵嘉歎曰漢有蕭相國我有蕭貢刑獄吾不憂矣又奏死囚獄雖已具仍責家人伏辨以申冤抑詔從之遷刑部侍郎入謝曰臣願國是官廣陛下好生之德上大悅凡真卿所平反多從之歷大興同尹德州防禦使同

察

知大名府事陝西西路轉運使河東北路按轉運使靜難軍節度使南京都轉運使御史中丞以戶部尚書致仕年六十六終于家謚曰文簡有注史記百卷公論二十卷五聲姓譜五卷文集十卷傳于世中州集

史內翰公奕小傳

元好問

公奕字季宏大名人系出石晉鄭王弘肇父良臣宣和中擢第終於潞州觀察副使季宏大定二十八年進士再中博學宏詞科程文極典雅遂無繼之者累

宏

技

遷著作郎翰林脩撰同知集賢院正大中置益政院
楊吏部之美與季宏皆其選也以直學士致仕年七
十三卒季宏文章書翰皆有前輩風調下至棊榭之
扶亦絕人遠甚間稱其溫厚謙退與人交愈久而
愈不厭其學問愈扣而愈無窮其見重如此詩人號
洹水集兵後失之子應祖字企先孫彥忠今在燕中
中州集

許司諫古小傳

元好問

古字道真承安中進士在宣宗朝以直言極諫稱哀

此下有麻却運
鑄一傳

宗即位首命驛致之洛致仕授右司諫未幾乞身還
伊陽郡守為起伊川亭道真性嗜酒老而未衰每乘
舟出村落間留飲或十數日不歸及沂流而上老稚
奔走爭為之挽舟數十里不絕其為時人愛慕如此
正大七年年七十四卒前三日有書見及字已歌頌
矣中州集

金文最

Blank columns for text on the right page.

金文最卷九十三

傳

王防禦良臣小傳

元好問

良臣字大用潞人永安五年進士作詩以敏捷稱又於內典有所得入翰林與李欽叔善從軍南征欽亦與行道中酬唱甚多有詩云蕃花冉冉蜜脾香禾穗纍纍鵲眼黃一縷晚烟吹不去為誰著意護秋霜欽叔愛之興定初自請北行沒於軍中贈孟州防禦使

高治中廷玉小傳

元好問

庭

庭

網

云

希

廷玉字獻臣恩州人大定末進士章宗衛王朝甚有
 時名為人豪爽尚氣節一時名士多歸之貞祐初自
 左右司郎官出為河南府治中與知府復興屢以公
 事相可否時都城受圍使驛阻絕復興為安撫副使
 懼獻臣謀已乃以造逆訊之獻臣就逮龐才卿雷希
 顏王士衡卒故之皆被羅織幾有一網之禍比赦至
 獻臣瘐死矣獻臣多作詩賦海中平頭鑿開渾沌竅
 闖出神農首人多稱道之猶子廣之今在河平

李治中適小傳

元好問

中州集

管

適字平甫樂城人明昌二年進士高才博學無所不
 通為人滑稽多智而不欲表表自見工畫山水得前
 輩不傳之妙龍虎亦入妙品然皆其餘事也泰和中
 大興幕官時虎賊知府事賣權恃勢奴視同列平甫
 每以公事相可否不少假借又摘其陰事數十條欲
 發之虎謀篡者也聲勢焰焰人莫敢仰視乃為一書
 生所抗積不平先以非罪誣染之幾至不測雖有以
 自解竟坐是仕官不進以東平治中致仕閒居陽翟
 十餘年自號寄庵先生平生詩文甚多如云舊管新

金文最

二

哭哭
哭令

收粧鏡在昨非今是酒杯乾贈筆二云工不能書何以筆士須知筆乃能書感事云半錢利路人乃虎一鉤名餌吾其魚魯山道中云老夫自喜林野僻路人頗笑衣裳寬散失之餘不復全見矣臨終戒家人吾明日歸而輩慎勿遽笑果如期而逝家人笑不禁良久開目云戒汝勿笑今我心識散亂言畢目復瞑其明了又如此子治字仁卿正大七年收世科屏山贈詩所謂仁卿不是人間物太白精神義山骨者也

陳司諫規小傳

元好問

中州集

規字正叔稷山人明昌五年進士博學能文詩亦有律度為人敦厚動有禮節南渡以後諫官稱許古陳規而正叔不以訐直自名尤見重云仕至右司諫卒官子良臣今在燕中

中州集

馮內翰延登小傳

元好問

延登字子駿吉州人永安二年進士令寧邊日適開闢公守此州與之考論文義相得甚歡故子駿詩文皆有律度正大未奉命北使見晉使招鳳翔不從欲殺者久之割其鬚髯羈管豐州二年乃得還天興初

留

雅

調

穴

留

元授禮部侍郎京城陷自投井中子駿資稟淳典與
 人交殊款曲讀書長于易左氏傳好賢樂善有前輩
 風諷嘗欲作國朝百家詩而不及也有集號橫溪翁
 予過大名見於其子源如賦德順道院隴泉云玉壘
 制方維瓊漿閔仙宅何人劇雲根一旦泄地脉金匱
 鎖龍漿月窟運蟾液銅壺漏水清玉斗天醴碧光搖
 日千道影落天一席窈然仇池自與天壤隔又登封
 途中遇雨雷僧舍云溼雲若烟低飛雨如矢集近山
 衣已涼薄寒復相襲霽景函草木秋意滿原隰林紅

顧

寒更殷山翠晴更溼不知高幾許但見蒼壁立群峰
 誰暇數庭笋紛戢戢騰擲來眼中左右疲預揖皆其
 得意句也 中州集

劉鄧州祖謙小傳

元好問

祖謙字光甫安邑人永安五年進士歷州縣有政迹
 拜監察御史以鯁直稱其不能俯仰世好蓋天性然
 也正大初為右司都事除武勝軍節度副使召為翰林
 脩撰家多藏書金石遺文畧備久東軒工畫山水
 故光甫以鑒裁自名至于信筆作簡牘尤有可觀一

時名士如雷御史淵李內翰獻能王右司渥皆遊其門得一人詩可傳必殷勤稱道唯恐不聞人以此稱之子敏仲今在平陽

中州集

高博州憲小傳

元好問

憲字仲常遼東人祖衍字穆仲國初進士仕至吏部尚書伯父守義大定十六年進士父守信以蔭補官叔守禮宣徽使仲常黃華之甥幼學于外家故詩筆字畫俱有舅氏之風天資穎悟博學強記在太學中諸人莫敢與抗泰和三年乙科登第自言於世味澹

無所好惟生死文字間而已使世有東坡雖相去萬里亦當往拜之屏山故人外傳說仲常年未三十作詩已數千首矣釋褐博州防禦判官遼陽破沒於兵

間

中州集

王監使特起小傳

元好問

特起字正之代州崞縣人智識精深好學善論音樂技藝無所不能長于辭賦出入經史摘其英華以為句讀如天造神出至得意不減郭黼在張氏州門下與屏山為忘年友泰和三年進士甲科調真定府錄

議

代

館

競

英刻選

事參軍有惠政民立碑頌其遺愛改令沁源又遷司
行監使朝議欲以館職召試會卒遊龍德官聯句云
棘猴未窮巧槐蟻或失王賦雙峰覺秀云龍頭轟雙
角馳背堆寒峯華山云三峰盤地軸一水落天紳造
化無遺巧丹青搃失真閒閒公屢哦此詩以為妙

中

州集

李經小傳

元好問

經字天莫大定人作詩極刻苦如欲絕去翰墨蹊迕
間者李趙諸人頗稱道之嘗有詩云鴈奴失寒更拍
拍叫秋水天長夢已盡秋思紛難理最為得意其餘

或有不可曉者累舉不第卒

中州集

梁太常持勝小傳

元好問

持勝字經甫絳州人本名洵義避宣宗諱改父襄字
公贊大定初進士質直尚義有古人之風仕至保太
軍節度使有諫興陵田獵表傳於世其賀章宗即大
位表云曾天子祖天子世嫡相承舜何人予何人自
強不息又自河南府倅移華州防禦使謝上表云昔
同維尹已陪嵩岳之呼今領華防願效封人之祝世
亦稱之經甫泰和六年進士制策優等宏辭亦中選

策

大

金文最

六

裕死

為人儀觀雄偉以文武志膽見稱貞祐初由太學博士為咸平治中宗室承裕辟為僚佐承死太平謀不軌以兵脅經甫使作文移經甫大罵不從即日遇害時年三十六贈韓州刺史初赴官有詩云山雲欲雨花先慘客路無人鳥亦悲人以為讖云

中州集

愚軒居士趙元小傳

元好問

元字宜之定襄人經童出身舉進士不中以年及調鞏西簿未幾失明自少日博通書傳作詩有規矩泰和以後有詩名河東李屏山為賦愚軒有落筆突兀

顯

無黃初之句愚軒宜之自號也用是名益重南渡以後往來洛西山中間閒公雷御史王子文許至忠崔懷祖皆愛之所至必虛左以待為人有材幹處事詳雅既病廢無所營為萬慮一歸于詩故詩益工若其五言平淡處他人未易造也宜之之父名淑字清臣由門資叙與先隴城為莫逆交故好問交游間得宜之之詩為多子顯有隱節今居鄉里

中州集

密國公琦小傳

元好問

密公字子瑜興陵之孫越王之長子百年以來宗室

巨

中第一流人也少日學詩于朱臣觀學書于任君謨
遂有出藍之譽文筆亦委曲能道所欲言朝臣自閒
閒公楊禮部雷御史而下皆推重之資雅重薄於世
味好賢樂善寒士有不能及者明昌以來諸王法禁
嚴諸公子皆不與外間交通故公得窮日力於書讀
通鑑至三十餘過是非成敗道之如目前越王堯後
稍得出游文王輩亦時至其門家所藏法書名畫幾
與中祕等客至貧不能具酒肴設蔬飯與之共食焚
香煮茗盡出藏書商畧之談大定明昌以來故事或

得
敗
薨

士
者

標

曹

終日不聽客去風流蘊藉有承平時王孫故態使人
樂之而不厭也所居有標軒又有如庵自號標軒老
人其詩號如庵小藁園城中以疾薨時年六十一

中州集

馮內翰壁小傳

元好問

壁字叔獻別字天粹承安二年進士歷州縣召入翰
林再為曾即宣宗朝屢以使指鞫大獄權貴如歸德
知府宿州提帥聲勢焰焰朝廷知其跋扈而不能摧
伏者獻叔以法臨之毛髮不貸也幼有重名就所長
論之館閣臺諫與賓客言乃其選也後以小心奉法

金文

詣韻

不畏疆禦故屢以城旦書屈之識者有用違其長之
 歎與定未以同知集慶軍節度使事致仕居崧山龍
 潭者十餘年諸生從之游與四方問遺者不絕賦詩
 飲酒放浪山水間人望以為神仙焉山中多蘭每中
 春作華山僧野客人持數本諸公以香韻高絕為勝
 少劣則有罰謂之鬪蘭所釀松醪東坡所謂歎幽姿
 之獨高者惟叔獻能盡之客有以京國名酒來與之
 校者味殊不能近正如深山草衣木食人語覺傭兒
 販夫塵土氣為不可嚮也是後松醪鬪蘭遂為山中

晉 比

渭

故事叔獻少日在太學賦聲藉甚其學長於春秋詩
 筆清峻似其為人字畫楚楚有魏晉間風氣雅為閑
 閑公所激賞制誥典麗當代少見其北尺牘又其專
 門之學風流蘊藉不減前世宋景文左丞董公紹祖
 奉使江左得其詩餞行喜見顏間詩四韻每誦一句
 輒為一舉觴李右司之純談笑此世為不足玩見叔
 獻則必為之懽然王延州從之公於鑒裁為海內稱
 首敬其名德至不敢以同年生數之北渡還鄉里年
 七十九終于家子謂字清甫以門資叙仕為密院機

察清慎而文天下有馮孝子之目今居鎮陽

中州集

王內翰若虛小傳

元好問

若虛字從之彙城人承安一年經義進士少日師其舅周德卿及劉甫正得其論議為多博學強記誦古詩至萬餘首他文稱是善持論李屏山杯酒間談辨鋒起時人莫能抗從之能以三數語窒之使噤不得語其為名流所推服類此釋褐鄜州錄事歷門山令入翰林自應奉轉直學士居冷局十五年崔立之變羣小獻諂為立起功德碑以都堂命名從之從之外

筆

人

若遜辭而實欲以死守之時議稱焉北渡後居鄉里癸卯三月東游與劉文季輩登泰山憩於黃峴峯之萃美亭談笑而化時年七十從之天資樂易負海內重名而不立厓岬雖小書生登其門亦折行之交之滑稽多智而以雅重自持謀事詳審出入意表人謂從之於中外繁劇無不堪任直以投閒置散故百不一試耳自從之沒經學史學文章人物公論遂絕不知承平百年之後當復有斯人否也子恕字寬夫

中

州集

麻徵君九疇小傳

元好問

九疇字知幾莫州人三歲識字七歲能草書作大字

有及數尺者故所至有神童之目章廟召見問汝入

宮殿中亦懼怯否對曰君臣父子也子寧懼父耶上

大奇之弱冠任太學有聲場屋間南渡後讀書北陽

山中真詩云讀書空山裏落月低巖出山鬼語夜半

始以古學自力博通五經於易春秋為尤長少時有

惡疾就道士學服氣數年疾遂平又從宛邱張子和

學醫子和以為能得其不傳之妙大率知幾于學也

專故所得者深飢寒勞苦人所不能堪者處之恬然

刪去
因

勞
怡

誤

館
第

選

顧

不以累其業也嘗為郾城張伯玉賦透光鏡欽叔傳

之京師趙禮部大加賞異貼壁間坐卧讀之興定未

府試經義第一詞賦第二省試亦然簾試以脫悞下

第知幾先有才名又連中甲選天下想望丰采雖牛

童馬走亦能道麻九疇姓名正大三年右相侯蕭公

趙禮部連章薦知幾可試館職乃賜盧亞榜第二甲

一人及第授太祝權太常博士應奉翰林文字知幾

天資野逸高騫自便與人交一語不相入則迤去不

返顧自度終不能與世合未幾謝病去作詩工於賦

刪去

刻

滋

金文最

物如夏英公篆韻其詩云千秋萬態了不同笑鬼號

神農日中市圓如有城乙鳥卵方如姜娘臣人履傾

如怒觸不周山翅如朔上蠶散水積如女蝎石未煉

碎如昆吾瓦經毀蚩尤旗張尾後典黃帝禹成足下

時五專車斷高戈九日橫天落羿天流彘不去龍垂

髻銜書忽來鳳挽臂方相四日關門闕夔牛一脰蹀

階所貌似水心猜未必然賴君注釋車南指

及手植檜印章等詩可見也字畫正書八分皆有功

詩最其所長少時猶失持擇近詩精深峭刻似其為

人他文不及也明昌以來以神童稱者五人太常原

添壽四歲作詩云我有一卷經不用筆寫成展開無

一字晝夜放光明合河劉滋文榮六歲有詩云鶯花

新物態日月老天公劉徵伯祥七歲被旨賦鳳凰來

儀新恩張漢臣世傑五六歲亦召入賦元妃素羅扇

畫梅云前村消不得移向月中裁其後常隱居不出

餘三人者皆無可稱道獨知幾能自樹立一日名重

天下者舊如閒閒公且以徵君目之而不名也壬申

歲遇亂卒年五十平山常仲明之子德葵之小商橋

傍近趙庄 中州集

劉御史從益小傳

元好問

從益字雲卿南山翁撫之曾孫大安元年進士拜監

金文最

三

入

留

哭

察御史生與當路者辨曲直得罪去久之起為葉縣令脩學講義聳善抑惡有古良吏之風葉劇邑也兵興以來戶減三之一田不毛者萬七千畝其歲人七萬石故在也雲卿請於大農為減一萬民賴之流亡歸者二千餘家未幾被召百姓詣臺乞晉不聽入授應奉翰林文字踰月以疾卒時年四十四葉人聞之以端午罷酒為位而笑且立石頌德以致哀思之心焉雲卿博學強記於經學有所得為文章長於詩五言古詩又其所長雷御史說雲卿在太學年時甚少

刪去

嘗有詩云黃金錯落雲間闕紅粉高低柳外墻時輩皆推服之其卒以詩得名者固已見於此矣如雲卿詩

斜日村村晚衰柳寒蕭岸岸秋雨鄉音隔風蘆面下里相望月滿襟子美不妨衣露肘長鄉猶有賦凌雲

春雪云千層寶樓閣一片玉山臨終云壞壁秋澄挑夢破老梧寒雨滴愁生此類甚多不能悉載也

有蓬門先生集行於世二子祁字京叔郁字文季俱有名於時 中州集

宋內翰九嘉小傳

元好問

九嘉字飛卿夏津人黃裳榜進士乙科歷藍田高陵扶風三水四縣令皆有能聲入為右警巡使奉應翰

林文字正大中病失音廢居歿于癸巳之禍嘗有詩
云浩歌風露下醉袖拂南山又題壽安烟霞亭云
粧鑿上壁紅千點界畫銀沙綠一鈎其才藻可畧見矣

雷御史淵小傳

元好問

淵字希顏別字季默同知北京路轉運使事思之季
子崇慶二年黃裳榜進士甲科釋褐涇州錄事徐州
觀察判官召為荆王府文學兼記室叅軍轉應奉翰
林文字同知制誥兼國史院編脩官拜監察御史以
公事免用宰相戾莘卿薦除太學博士還應奉終于

侯

屈

以

翰林脩撰初在東平東平河朔重兵處也驕將悍卒
倚外寇為重自行臺以下皆務為摩拊之希顏蒞官
自律者甚嚴出入軍中偃然不為屋不數月間巷間
家有希顏畫像雖大將亦不敢新進書生過之嘗為
戶部高尚書所辟權遂平縣事時年少氣銳擊豪右
發姦伏一縣畏之稱為神明及以御史巡行河南百
姓相傳雷御史至豪猾望風遁去正大庚寅倒廻谷
之役希顏上書破朝臣孤注之論引援深切灼然易
見而主兵者沮之榮為不行至今以願望為當國者

策
顧

東

平
陳

之恨希顏三歲喪父七歲養於諸兄年十四五貧無
以為資乃以胄子入國學便能自樹立如成人不二
十游公卿間太學諸人莫敢與之齒渡河後學益博
大益奇名益重為人軀翰雄偉髯張口哆顏渥丹眼
如望羊遇不平則疾惡之氣見於顏間或嚼齒大罵
不休雖痛自摧折然粹亦不能變也生平慕田疇間
元龍之為人而人亦以古人期之故雖以文章見稱
在希顏仍為餘事耳

中州集

李右司獻能小傳

元好問

以

撰
獨

召

顧
杯

獻能字欽叔河中人年二十一歲省元賜第廷試第
一人宏詞優等授應奉翰林文字在翰苑凡十年出
為鄜州觀察判官用薦者復應奉俄遷脩選以鎮南
軍節度副使充河中經歷正大八年河中陷猶得一
船走陝州被被以道梗不能赴就權陝府行省左右
司郎中軍變遇禍欽叔資稟明敏博聞強記輩流中
少見其比為人誠實樂易洞見肺腑世間狡獪變詐
纖悉無不知然羞之不道也與人交不立崖岸盃酒
相然諾赴難解紛不自顧惜雖小書生以愛兄之道

金文最

五

度

貧

墮

來亦殷勤接納傾筐倒度無復餘地時輩以此歸之
 家故饒財盡于貞祐之亂京師冷官食口衆無以自
 資太夫人素豪侈厚于自奉小不如意則有金魚
 隨地之謹人視之殆不堪其憂而欽叔處之自若也
 欽叔文章行業過人處甚多而天下獨以其純孝為
 不可及云

中州集

王右司渥小傳

元好問

渥字仲澤以字行興定二年進士調管州司候不赴
 壽州防禦使邦獻商州防禦使國器武勝節度庭玉

愛其才連辟三府經歷官在軍中凡十年舉寧陵令
 未赴丁太夫人憂廬墓三年服除復授寧陵正大七
 年朝廷與宗人議和擇可為行人者仲澤以才選凡
 再至揚州制司宋人愛其才有中州豪士之日使還
 以寧陵課最遷一官入為尚書省掾三月即授太學
 助教充樞密院經歷官八年院廢權右司郎中中年
 失利不知所終仲澤博通經史有文采善設論工書
 法妙于琴書詩其專門之學人物楚楚若素官於朝
 吏事則與冀京父相上下其辨博又屏山所許天下

事官

金文

六

馬

嶸

更

聖

推

談士三人之一也嘗與予行內鄉山中馬上賦詩云

霜風十月餘千山錦嶸嶸又九日登頽亭見寄云茫

茫襄城野歲晏多風埃田半已荒草虫鳴哀西風吹

白雲大隗安在哉七望之所迷而我胡為來我本林

野人初無經世材失身鞍馬間坐令雙鬢推安得元

紫芝共舉重陽杯詩成西北望九山鬱崔嵬此詩脫

遺處不復能記憶讀之尚可以見斯人胸懷之髣髴

真都事高錫小傳

元好問

高錫字京父龍山人崇慶二年進士調沉邱簿與縣

者 賦

才

令不相能及今以賦賦疑京父發之乃賂遺權貴誣

京父以賓客依託之事坐廢十年朝臣薦其尤者積

數十人終為銓曹所礙居襄邑部使者起之攝旁近

諸縣所至有父母之愛農司治許昌又為主事區處

餽餉上下千餘里不露聲迹而條畫次第昏具雖鱗

雜米鹽若不足經意者問之即應如指諸掌一時吏

如康伯祿李欽止諸人多自以為不及也正大中當

路諸公極力其被誣乃得以常調守扶風丞召補省

掾不就歸德奏充知事及城被攻京父為經歷官守

諸

辨

策

歡

沒

君

禦之榮一府倚重之車駕至授左右司都事兼應奉翰林文字官奴之變家人勸京父羸服免禍不從人有自外至者京父問賊入禁中否曰禁中賊滿矣乃自投水中在京師時希顏仲澤歛叔京父相得甚觀升堂拜親有昆弟之義而不肖徒以文字之故得幸諸公間希長予六歲澤長四歲歛與京少予二歲希設于正大辛卯之八月年四十八澤沒于明年之七月年四十七歛設于其年十一月年四十一歲京沒於又明年之三月年四十二蓋不二三年而五人者

惟不肖在耳今日錄諸君子詩感念平昔不覺流涕之被面也

中州集

蘭泉先生張達小傳

元好問

建字吉甫蒲城人明昌初舉才行授絳州教官召為官教應奉翰林文字以老乞身道陵愛其淳素不欲令去左右眷眷久之起同知華州防禦使事仍賜詩有從今畫錦蓮峰下三樂休誇榮啓期之句士林榮之吉甫自號蘭泉老人有集行於世其論詩云作詩不論長篇短韻須要詞理具足不久不餘如洒上洒

榮啟榮

荷

始雖

亦始榮

水散為露珠大者如豆小者如粟細者如塵一一看之無不圓成為為盡善吉甫詩不能盡如所言然未為無所得也

中州集

張璜小傳

元好問

璜字器之河中人才氣超邁時輩少見其比年未二十以鄉試魁陝西河東不幸早世張吉甫弔之云惜哉器之真丈夫少年讀徧天下書一事不成死于途苗而不秀有矣夫秀而不實有矣夫其為名流所嗟惜如此

中州集

毛宮教麀小傳

元好問

麀字牧達平陽人大定十六年舉學行特賜進士出身授校書郎入教官掖歷太常博士終于同知沁州軍州事有平水集行于世

中州集

朱宮教瀾小傳

元好問

瀾字臣觀霖堂先生之子學問該洽能世其家大定二十八年進士時年已六十意氣不以衰歷諸王文學應奉翰林文字終於待制党趙推挽之力為多以嘗入教官掖故集中多宮詞

中州集

巨

宮

王 姑汾漫士玉琢小傳

元好問

琢字器之平陽人與毛牧達同時相友善天性孝友
 為鄉里所稱酷嗜讀書往往手自抄寫家素貧乏而
 能以剛介自持未嘗有所丐貸時命不偶年四十五
 以病卒士論惜之有姑汾漫士集行於世所著中聖
 人賦今世少有能到者詩好押強韻務以馳騁為工
 七月十五夜看月云歷樹有驚鵲悄鄰無吠虎對雨
 云春雨薄如夢曉雲閒似愁秋霖云窗寒知氣重人
 靜寬泥深驟雨云電點撒冰彈電光飛火繩春陰云

庭澹梨花月樓寒燕子風
 久雨云練挂遮簷直麻懸
 到地齊此類甚多 中州集

呂中孚小傳

元好問

中孚字信臣冀州南宮人孝友純至迄今為鄉人所
 稱累舉不第以詩文自娛有清漳集行于世其賦紅
 葉云張園多古木蕭寺半斜陽先君子甚愛之 中州集

王元節小傳

元好問

元節字子元弘州人祖山甫遠戶部侍郎父詡海陵
 朝左司員外郎子元塔于南山翁傳其賦學第進士

弟有

南 渴

雅尚氣節不能從俗俯仰故仕不達既罷密州觀察判官即閒居鄉里以詩酒自娛號遯齋老人年五十餘卒弟元德亦第進士自能名於時終于南京路提

刑使 中州集

楊澤州庭秀小傳

元好問

庭秀字德懋華州人大定中進士學詩於蘭泉張吉有謁心曉夢江湖潤醉眼春風草木低之句泰和三
年刺澤州致仕後閒居鄉里坐為楊珪誣誤被法士
論冤惜之 中州集

孫省元鎮小傳

元好問

鎮字安常絳州人高才博學嘗中省試魁承安二年
五赴廷試賜第以陝令致仕年八十四卒有注東坡
樂府歷代登科記行於世弟寧州刺使錡字安世潘
原令鉉字安道同榜擢第鄉人榮之號三桂孫氏安
常孫詵思美軍府參佐安世孫處謙志全安道孫蔚

今俱在 中州集

景覃小傳

元好問

覃字伯仁華陰人年十八有賦聲大定初三赴簾試

榮 史

所當

後以病不就舉博極群書有舉問者立誦數百言不休又從而講說之為人誠實樂易不脩威儀隱居西陽里以種樹為業落托嗜酒醉則浩歌日為以常作詩有功樂府亦可傳予同年進士王元禮嘗從之學說伯仁老不廢書有勸以養目力者曰吾輩非讀書則無用心要光死而後已耳晚年於易有所得年七十終于家自號渭濱野叟有集傳關中

中州集

段繼昌小傳

元好問

繼昌字子新白水人自號適安居士喜作詩與華陰

可

景伯仁相友善家甚貧而世間事皆不以挂口有以錢遺之者必盡送酒家名酒曰黃嬌蓋關中人謂兒女為阿嬌子新以酒比之故云一日天苦寒人有遺之酒者飲不盡而醉夜半忽驚起以衣裳覆酒缸僵卧榻上人為言酒自不冰先生將不為寒所病乎子新笑曰人病尚酒病不可療也其好飲如此臨終辭鄉里託以他適明日卧於党氏園亭大石上視之已逝矣伯仁吊之云適安居士舊知聞廓達靈根厭世紛辭罷親朋便歸去一籌今日又輸君

中州集

金文最卷九十四
傳
岳行甫小傳
元好問

金文最卷九十四
傳

岳行甫小傳

元好問

行甫字仁老鄜州洛川人在關中最有詩名泰和初
有以仁老時病詩達之道陵者道陵大加賞異授以
官不就士論高之舊所傳沾泥柳絮燕銜去鎖月梨
花鷺喚開本前人詩又苦無佳致世俗識真者少悞
謂仁老所作乃閔傳之曾見仁老詩百餘篇佳句甚
多續當就秦中好事家搜訪之中州集

党
屬姓者奔
从党

迂齋先生周馳小傳

元好問

馳字仲才濟南人經學出於醇德先生王廣道賦學
出于泰山李時亨至於黨趙又其忘年友也資性古
雅而以襟量見稱大定中任太學屢以策論魁天下
私試亦頻中監元家素饒財鄉人強以子弟從之學
所得束脩皆散諸生之貧者貞祐之兵濟南陷不肯
降携二孫赴井死鄉人葬之宅後之壽樂堂遼東人
吳子與嘗從仲才學能記其所著亞父撞玉斗賦及
他文數篇中州集

英

劉太常鐸小傳

元好問

鐸字文仲冀州棗強人承安五年進士元光二年入
為太常博士正大初改兵部員外郎以武昌軍節度
副使致仕癸巳歲病歿于京師自號柳溪先生有集
傳于家武成王著作序言文仲生未能言已識百餘
字及授學穎悟過人為入誠實少許可不徇流俗不
慕榮利蓋實錄云子敏字庭幹亦學詩今居洛中中

州集

李扶風節小傳

元好問

金文最

二

節字正臣涇州人呂造榜進士以詩名關中資性滑
稽談笑有味而臨事以幹局稱歷威我扶風令初名
守節哀宗即位去守字哀宗知其名謂侍臣言吾不
欲人避上一字李守節何故避之良久曰臣子敬君
避之亦可正臣有詩云梧頭打出和糴米丁口簽來
自願軍讀之則時政可知矣中州集

劉勳小傳

元好問

勳字少宣本出洛陽元魏遷洛陽一十萬家實雲中
故其父祖而上為雲中人至少宣客居濟南樂其風

憐

鷓

土遂占籍馬少日任太學與兄譙庭老俱有聲場屋
間南渡後專於詩學往往為人所傳其先世本衣冠
家風流蘊藉都無科舉氣見于文字者亦然嘗有詩
云萬里風沙冷病客幾年刁斗厭寒更人憐直道違
時好自喜閒身與世疎擊筑漫流燕客淚佩蘭誰識
楚臣心濟南云午風襟袖知秋早甲夜欄干得月多
又云船行著色屏風裏人在回文錦字中百和香薰
風過處萬盤珠落雨來時此類甚多少宣長於尺牘
落筆皆有可觀其樂府如算躡庭院春陰淡之句尤

可喜也中州集

李澥小傳

元好問

澥字公渡相人少從王內翰子端學詩能行書工畫山水就所長論之詩為長性寬緩笑談有味居京師十五年日游貴人之門所至以上客延之善處世不為人所忌嫉惟有前輩典刑累舉不第年六十餘卒于通許陳留之間中州集

秦畧小傳

元好問

畧字簡夫陵川人父事軻有詩名工作大字簡夫少

舉進士不中即以詩為業詩尚雕刻而不欲見斧鑿痕故頗有自得之趣悼亡一詩高出時輩殆荆公所謂看似尋常最奇崛成如容易却艱難者耶年六十卒臨終留詩云軀殼羈棲宅兒孫邂逅恩雲山最佳處隨意著詩鬼簡夫自號西溪老人有集行於世子彦容為黃冠師今在平陽中州集

張琚小傳

元好問

琚字子玉河中人父鉉字鼎臣大定中第進士仕至同知定國節度使事子玉刻意於詩五言其所長也

留

如初至華下云老雨梧桐夜孤燈蟋蟀秋客同州云
秋風留客館夜雨借僧氈詩人喜稱道之至有張五
字之目集號韋齋中州集

馬編脩天來小傳

元好問

天來字雲章人止謂之元章介休人黃裳榜經義進
士博學多技能畫入神品百年以來無出其右者屏
山常言天下辯士有三王仲澤馬元章純甫其一也
元章住太學十九年貧苦之極人所不能堪然其談
笑自若也大安初調潁州司候靈壁簿召為國史院

元
全

編脩官正大九年病歿於京師年六十一劉紹宣有
贈詩云波瀾口類談玄駛土木形骸與世違疇昔麻
鞋見天子只今道服勝朝衣蓋實錄也元章多作詩
欲別出盧全馬異之外又多用俳體作譏刺語如云
木偶衣冠休嚇我瓦伶口類欲謾誰嚙骨取肥屠肆
狗哺糟得醉酒家猪如此之類不得不謂之乏中和
之氣至其賦丹霞下寺竹云人天解種不秋草欲界
獨為無色花雪云夜來窗外渾疑月今日墻頭不見
山來云先生睡起騎驢看太素一游非世間龍門云

白含雲竇雪青補石門天則知詩者亦當以功揜過
耳中州集

申編脩萬全小傳

元好問

萬全字百勝高平人先無夷字百福崇慶二年進士
百勝少有聲太學中貞祐二年乙科調福昌簿不赴
隱居盧氏山中以讀書為業作詩有靜功然不多見
也正大中召為史館編脩從行省慶山南征道中有
詩云回首秋風謝故廬崎嶇又復逐戎車人生行止
元無定一葦江湖縵所如不數日溺水死人以為讖

云中州集

崔遵小傳

元好問

遵字懷祖北燕人父建昌字曼卿大定二十五年進
士仕至同知武安軍節度使事懷祖事繼母孝與人
交有終始遲重少語未嘗及人短長少日在太學有
賦聲南渡後不就舉遷居崧山二十年課僮僕治生
生理亦粗給前輩如趙吏部子文張左丞信甫馮毫
州叔獻或懷祖丈人行皆與之詩酒相往來懷祖喜
賓客有醞藉從容文雅使人久與之處而不厭也嘗

留

有宿少林詩云青山已有十年舊小雪又為三日留
其他往往稱是中州集嘗與之語鄙昧未敢
王主簿革小傳
革字德新一名著臨潢人以蔭補官碌碌筦庫餘三
十年正大中以六赴廷試賜出身調宜君簿為人
醞藉善談笑密公與之唱酬相得甚歡初在太原作
詩有赤心遭白眼笑面德嗔拳之句公甚愛之有詩
寄之云柳塘雲觀千鍾酒笑面嗔拳五字詩蓋志此
也及第後呈同年云孤身去國五千里一第遲人四

得

交

十年大為間間所稱德新文游滿天下獨許欽叔與
予為莫逆云年七十八終于雲中中州集

衛承慶小傳

元好問

承慶字昌叔襄城人父文仲承安中進士以孝友淳
直稱于鄉里官至文登今年七十餘卒臨終沐浴易
衣冠與家人訣怡然安坐誦東坡赤壁樂府又歌人
間如夢以下二句歌闕而逝昌叔資冲澹有父風及
識路宣叔王逸眉文伯起故其詩似之中州集

澹

劉昂霄小傳

元好問

昂霄字景元別字季房陵川人父俞字彬叔明昌二年進士仕為承發司常勾泰和中予識景元于太原人有言是家讀廣記半月能背誦者予未之許也戲取市人日曆鱗雜米鹽者令讀之一過目無脫遺大率景元之學無所不闕六經百氏外世譜官制與兵家所以成敗者為最詳為人細瘦似不能勝衣好橫策危坐掉頭吟諷幅巾奮袖談辭如雲四座聳聽噤不得語故評者謂承平以來王湯臣論人物李之純玄談號稱獨步景元則兼眾人之所獨愈叩而愈無

窮不知去古談士為遠近餘子不論也嘗用門資叙調慶陽軍器庫使不就諸公方薦試宏辭而景元病不起矣臨終夢賦山泉云帶雲縈遠澗和月到疎林又云萬里馮唐老中年骨傳歸未幾下世年三十七

中州集

田紫芝小傳

元好問

紫芝字德秀滄州人父齊以蔭為部掾德秀少孤養於外家定襄趙氏故多居于忻年十三外祖廣寧治中命賦麗華引語意驚絕人謂李長吉復生資性穎

金文最
悟一覽萬言年二十讀經傳子史幾遍為人疎俊而
以蘊藉見稱與同郡王元卿齊名貞祐初避兵臺山
倉卒為游騎所馳遇害年二十二士論惜之 中州集

王萬鍾小傳

元好問

萬鍾字元卿秀容人父甫字用之通經史淳質有儒
行亦以知醫見稱兄萬石字器玉住太學有賦聲用
之妻死不更娶二子俱無家室井回之事率親為之
貧居陋巷中破屋蕭然不蔽風雨而弦誦之聲不絕
也元卿少有逸才讀書有後先不欲速成詩文閒適

似其為人客至清談終日人不敢以俗事浼之與同
郡田德秀齊名號王田評者謂規製宏博王不及田
而瀟灑無塵土氣田亦非王比也元卿嘗有詩寄予
關中云千里呂安思叔夜二年社燕伴秋鴻賦梅花
云漢宮月下三千額好在春風一抹痕笑吾兄敏之
云蘭迳水流三月暮桂林風落一枝春古詩尤蕭散
有自得之趣兵火中皆亡失之矣初用之間北兵入
塞即以吾州為不可守去之太原五年不敢歸貞祐
二年州破死者十餘萬人而用之亦以是日病歿於

太原較其時皆三月三日巳時也人謂用之先見固
可稱然生死定數亦自不能免云元卿父歿之後
與其兄居于平晉之金城里明年兵復至兄被害元
卿欲收葬之時游騎充斥親舊勸勿往元卿持不可
曰兄死不收留此身欲何用耶流涕而去尋亦被禍
時人甚哀惜之元卿長予一月死時年二十七矣中

州集

雷瑄小傳

瑄字伯威坊州人以薦書從事史館調入作司使博

元好問

留

學能文時輩少有及者并州人李汾與伯威同在史
館以高蹇得罪伯威作詩送之頗譏翰林諸人不能
少忍至與一書生相角逐使之狼狽而去有即君未
足番商隱官長從教罵廣文之句云明日春風一杯
酒與君同酌信陵墳人甚稱之中州集

王毫州賓小傳

元好問

賓字德卿毫社人貞祐二年進士由虹縣令人為尚
書省令史壬辰京城受圍毫州為單父軍楊春所據
春以事出德卿與故譙縣尉王進反正朝廷授進集

慶軍節度使德卿同知使事明年夏六月車駕幸蔡
道出于亳德卿逆謁上與語慰勞者久之詔行六部
尚書事仍賜世爵後數日部曲崔七輩以軍食不給
送款執德卿與副使呂軍往市中釣且行且拜泣涕
不休德卿毅然無所屈大呼曰但殺但殺不能從汝
也是日遇害德卿學詩甚力故所得亦多如風生傳
令箭星落受降城煙外算鍾催倦馬林間殘照聚歸
鷓倉小軍爭未邨荒虎食牛又贈剗上人云楞嚴讀
罷爐烟冷澹坐山堂閱世人言懷云功名不到書生

手坐撫吳鉤惜壯圖題馬邱寺壁云落葉擁窓僧入
靜孤燈穿屋客吟秋人甚稱之中州集

李夷小傳

元好問

夷字子遷後改名佖宛邱人苦於作詩賦古鏡云盤
盤古皇州夢斷繁華歌一鞭春事忙畊出隴頭月土
蝕背花昏蹄涔駭龍蹲須髯怒欲張縮手不敢捫又
云壽光閔人多曾有此客否欽叔諸人甚愛之中州

集

郭邦彥小傳

元好問

邦彥字平叔本鄆縣人僑居陽翟遂占籍焉興定五年進士調永城簿以退讓見稱生世不幸處于頑嚚傲三者之間鬱鬱不自聊年未四十而死寄庵先生愛其詩甚嗟惜之

中州集

史學小傳

元好問

學字學優延安人兄才字才長住太學有聲學優正太中省試第一人釋褐舞陽簿辟盧氏令卒官妻李氏國初河南尹成之孫女小詩殊有思致學優嘗客京師有所眷久而不歸李作詩寄之云百年風樹底

誰淚到君前學優得詩即日命駕

中州集

侯冊小傳

元好問

冊字君澤以門資仕與杜仲梁張仲經劉京叔游用是得名嘗作樂府云玉堦春草傷心碧錦瑟華年過眼空又云千金買斷青樓月爛醉桃花扇影風人多愛之壬辰歲病京師園中作詞云回首鳳皇城下路人不見月茫茫明日君澤死其後京城亦邱墟矣

中州集

王元粹小傳

元好問

金文最

七

憐

元粹字子正初名元亮後止名粹平州人系出遼世衣冠家年十八九作詩便有高趣性習專固世事不以累其業故時輩無能當之者正大末用門資叙為南陽酒官遭亂流寓襄陽襄陽破隻身北歸寄食燕中遂為黃冠師有十月風霜侵病骨數家針線補殘衣之句親舊有怜其孤苦欲為之更娶者子正業已高舉主太極道院竟不能自返年四十餘癸卯九月病卒詩人淄川楊叔能挽之云匹婦主中饋雖貧生理存五言造平淡隻影卧黃昏謾下陳蕃榻虛沾文

舉尊北平家世絕銜恨入荒原從弟鬱亦攻詩方之其兄蓋商周矣中州集

王鬱小傳

元好問

鬱字飛伯少日作樂府擬古別離有黃鶴樓高雲不飛鷓鴣洲寒星已曙之句人多傳之其後入京師大為李欽叔所稱與之詩云詩句媿國風下者猶楚辭贈詩者甚多有云憶昔頽亭見飛伯恍若夢中逢李白又云紫徑仙人今淵雲騎風御氣七尺身又云良金元有價白璧况無瑕又云王郎少年詩境新氣象

恠澹含古春筆頭仙語復鬼語只有温李無他人飛
伯用是頗自貴重云 中州集

王太常繪小傳 元好問

繪字質夫濟南人天會二年進士武陟道中詩云梧
葉重勝迎日露蒼秧薄要護霜雲人頗稱之任至太
常卿有注太白詩行于世 中州集

王禮部競小傳 元好問

競字無競安陽人宋末登科仕國朝至禮部尚書兼
翰林學士承旨年六十四大定四年卒無競善作大

党

字字或廣長丈餘而結密如小楷京都宮殿題榜皆
其筆趙禮部以為古今第一手唯黨篆差可配耳一
孫名道通字彥深今為黃冠師 中州集

杜佺小傳 元好問

佺字真卿武功人宋末有詩名于關中兒時嘗作藥
名詩有杜仲吾家好弟兄自然同姓又同名之句及
以五言百韻上乾州通判馬涓涓大加賞異阜昌中
登科蒞官亦有聲焉菟太真墓過客多題其詩甚多
道陵詔錄其詩得五百餘首付詞臣第之真卿詩在

高等舊有錦溪集亂後不復見矣子師楊亦能詩尤
工書翰奉天楊煥然云然中州集客之賦其語甚多

李寧州之翰小傳

元好問

字周卿濟南人宣和末擢第人有勸叅童貫可以徑
至館職者周卿謝絕之國兵破洛州縛見元帥誘之
使降語及君臣之際辭情慷慨自分一死帥怜之遂
被錄用後守寧州陷田侍郎珏黨籍除名徙上京遇
赦復官終于東平倅有漆園集行於世子靈石尉謙
孫德元今在鄉里

中州集

韓內翰汝嘉小傳

元好問

汝嘉字公度宛平人父昉遼末狀元仕國朝至宰相
嘗作武元聖德神功碑為作者所稱公度皇統二年
進士累遷真定路轉運使坐公事遷清州防禦使召
為翰林侍讀學士卒中州集

王吏部啓小傳

元好問

啓字希舉大興人正隆二年進士累遷戶部員外郎
通州刺史用宰相萬公薦權右司郎中章宗即位不
一歲遷工部侍郎即以河南北路提刑使拜吏部尚

董

書使宋使還出為絳陽軍節度使致仕還鄉里與左丞薰公叅政馬公宣徽盧公尚書郭公為九老會年七十九卒子師揚字仲雄南渡後隱居崧山時年已六十餘經傳子史皆手自抄之如健舉子結夏課然希顏說仲雄在太學同舍號為閉戶王先生其謹厚蓋家法云孫造字成叔今居東平

中州集

元好問

會字公錫高平人人道院文元公之後宣和末中武舉仕為太子洗馬天眷二年經義進士為人美風儀

董

氣象宏博澤人經靖康之亂生徒解散公錫稍誘進之貧不能就舉者必厚為津遣在官下則分俸以給之至于李承旨致美昆仲亦出其門士論歸馬歷虞鄉猗氏臨晉三縣令以興平軍節度副使致仕年七十八終于家詩號泣水集虞鄉縣齋云官况薄于重榨酒瓜期近似欲殘基王官谷云煙藏芳樹遠雲補斷山齊鄉人至今傳之孫國章字公憲李承旨外孫教授鄉里樂於提誨諸生經指授者肅然如在官府進退拱揖皆有可觀蓋其家法云

中州集

府州又為古仕
履王見上書華
先傳

王內翰遵古小傳

元好問

遵古字元仲父政金吾衛上將軍三子遵仁遵義元仲其季也元仲四子庭玉字子温内鄉令終于同知遼州軍州事庭堅字子貞有時名庭筠字子端庭揆字子文 中州集

王汾州璫小傳

元好問

璫字君玉太原人天眷二年進士弟珙器玉珣汝玉皇統九年同榜家世業醫有陰德聞里中嘗有金蠶金馬之瑞君玉仕至汾陽軍節度使鄉人榮之號三

桂王氏行尚書省左右司郎中仲澤其從孫也金馬在部掾清卿房迄今寶之 中州集

李特進獻可小傳

元好問

獻可字仲和遼東人太師金源郡王石之子太師遼末狀元仲和世宗元妃之弟大定十年史紹魚榜進士歷州縣人翰苑累遷戶部員外郎以事貶清水令召為大興少尹遷戶部侍郎終于山東東西路提刑使衛紹王即位以仲和元舅贈特進道國公子道安特旨符寶郎 中州集

入

雷溪先生魏道明小傳

元好問

道明字元道易縣人父遼天慶中登科仕國朝為兵部郎中子上達元真元化元道俱第進士又皆有詩學元道最知名仕至安國軍節度使算年居雷溪自號雷溪子有鼎新詩話行于世元道春興云燕來燕去烏衣巷花落花開穀雨天高麗館偏涼亭云涼或作梁碧海半彎蝸角國春風十里鴨頭波中秋云丹桂知經幾寒暑冰壺別是一山川其所得者也中州集

學易先生雷思小傳

元好問金馬

思字西仲渾源人天德三年進士大定中任大理司直持法寬平至今稱之仕至同知北京轉運使事有易解行于世弟志字尚仲亦第進士仕至永定軍節度使西仲季子淵最知名中州集

王大尹脩小傳

元好問

脩字脩然范陽人皇統二年進士資稟鯁峭甫入仕即以材幹稱大定中皇子曹王尹大興脩然為少尹王移鎮北門復以同尹從之前後多所規益朝廷稱焉遷咸平轉運使改知瀋州坐為怨家所誣奪官宰

相有為辦理者得鄭州防禦使章宗即位召拜禮部
尚書以選為大興尹兩月政成發姦擊強剖繁理劇
百年以來無有出其右者尋為護前者所排繫獄累
月天子知其非罪出之脩然幅巾歸范陽明年起為
定國軍節度使致仕卒遺命無請謚無立碑然至今
言名臣者必及焉中州集

高工部有鄰小傳

元好問

有鄰字德卿遂城人數歲入小學州將為子娶婦驂
御盈路同舍兒競觀之德卿讀書自若也大定三年

第進士歷州縣為尚書省令史時相議詘詞賦專明
經德卿以賦有諷諫之義反復詰難竟得不罷爾後
擢第者廷試時務策亦自德卿發之明昌初累遷安
國軍節度使父飛狐令某嘗尉南和以公事活千餘
人德卿實生是邑父老有身及當時事者扶杖迎勞
歡呼馬前德卿亦為立碑尉廳不踰月子嵩猶子鑄
同榜登科時人榮之泰和中使宋還拜工部尚書致
仕卒德卿孝友廉介長於吏事所至興學校敦風化
以儒雅自錄飾耆舊至今稱之嵩字士瞻第進士季

子凝字士美正大初監察御史最知名 中州集

宋孟州楫小傳 元好問

楫字濟川長子人年十九天德三年擢第除著作即
母老丐歸養許之泰和三年以省掾從吏部尚書梁
肅使宋副趙王府長史直臣獵淮上射一虎斃之濟
川有詩記其事語意俊拔泗州守刻石於鎮淮堂濟
川官至孟州防禦使子元吉字祐之明昌二年進士
元圭字達之泰和三年進士皆有名於時曾孫宏道
今在武陟 中州集

高轉運德裔小傳 元好問

德裔字曼卿鶴野人高才博學弱冠擢第累遷登聞
檢院同知太府少監平陽少尹開州刺史豐王傅卒
於西京路轉運使工於為文字畫尤有法所題卷軸
今猶有存者嘗以樗軒所書比之氣韻形似無毫髮
少異樗軒自望者甚高何至學曼卿乃暗與之合真
異事也子元道殿中侍御史 中州集

路冀州仲顯小傳 元好問

仲顯字伯達冀州人家世寒微其母有賢行教伯達

瞻

讀書國初賦學家有類書名節事者新出價數十金
大家兒有得之者輒私藏之母為伯達買此書博衣
節食累年而後致戒伯達言此書當置學舍中必使
同業者皆得觀少有新固吾即焚之矣伯達正隆五
年進士明昌初授武安軍節度使鄉人榮之雲翔用
兵伯達奉使江左還獻賜幣以佐軍未報而伯達死
章廟詔以所獻還其家夫人傅氏曰此非吾夫意復
上之有司不聽夫人付之州學買上田二千畝有奇
以贖生徒故相馬琪德玉時判州事聞于朝賜號成

德夫人伯達二子鐸字宣叔鈞字和叔俱有名于時
宣叔為諫官諫章廟元妃李氏出細微不應上儲有
累聖德又其兄弟恃寵納賂將有楊國忠之禍坐謫
訕除名宣叔布衣還鄉里傅夫人臨終教宣叔曰汝
以憂國愛君故極言直諫天子明聖特暫有所蔽計
他日必復起汝前事須再言勿有所顧藉也墓碑不
之載故表出之中州集

張代州大節小傳

大節字信之五臺人天眷中進士與興陵有藩邸之

舊愛其真淳甚倚重之歷橫海軍節度使咸平大興
尹吏部尚書河東北路兵馬都總管明昌初請老特
授雁門節鉞除其子嵩叟忻州刺史以榮其歸信之
好獎進士類滄州徐趨太原王澤大興呂造經其指
授卒成大名士論以風監婦之嵩叟字夢弼亦第進
士歷嵐潞懷三州節度終於集慶軍屏山謂吏事不
及乃父而以長厚見稱子待舉臺掾選授奉御正大
末從車駕東狩不知所終孫紹祖在東平中州集
趙轉運 趙轉運 趙轉運 趙轉運 趙轉運 趙轉運

颯

懋字叔通黃山先生諷之父也宋末汪彥章任鄆州
教官叔通為學正嘗預酬唱故其詩文皆有源委國
初登科仕至同知南京路轉運使事中州集

郭祕監長倩小傳

元好問

長倩字曼卿文登人皇統丙寅經義乙科仕至祕書
少監兼禮部郎中修起居注與施朋望王無競劉崧
老劉無黨相友善所撰石決明傳為時人所稱有崑
崙集傳于世子天驥中州集

金文最

三

齊東野語云世于夫朝...
 英傑與靈賦...
 少豐...
 吳...
 十六...

金文最卷九十五

傳

郭錄事用中小傳

元好問

用中字仲正平陽人大定七年進士歷浮山簿陝州
 錄事卒年三十一有寂照居士集郝子玉毛牧達鄭
 仲康為之引其賦醋魚云身卧不知雲子白氣酣聊
 作木奴酸按博物志西羗仲秋日取鯉子不去鱗破
 腹以赤秫米飯鹽醋合糝之逾月則熟謂之秋鮓故
 仲正云然又賦雪云灞橋柳絮人千里楚澤蘆花水

太常

棣

半扉殊有詩人思致恨不假之以年耳

中州集

趙之傑之傑小傳

元好問

之傑字伯英大定人本名宗傑避諱改大定十六年
進士歷西京提刑副使隸州防禦使終于太常卿使
宗還言事云宗人文敝之極且脆弱不足為慮邊部
為可慮也其前識如此子繪名進士早卒孫季卿在

燕中 中州集

趙轉運鼎小傳

元好問

鼎字德新藥城人大定十六年進士喜作詩頗知道

詩

學屏山所許如此仕至西京路轉運使元日詩云拜
嗟筋力隨年改飲覺屠蘇到手遲惜不多見也子中

立字正卿第進士文譽甚著 中州集

田轉運特秀小傳

元好問

特秀字彥實易縣人大定十九年進士仕至太原轉
運使喜作師為周德卿李之純所賞感興云散木不
材寧適用虛舟無意任乘流百年身世槐安國千古
人情羨頡頏賦古塲云締構百年人換世消沉千古
烏盤空他類此彥實所居里名半十行第五以五月

高密州公振小傳

五日生小字五兒二十五歲鄉府省御四試俱中第
五年五十五八月十五日卒造物之戲人如此中州集

高密州公振小傳

元好問

公振字特夫正隆初進士歷南京留幕終于密州刺
史詩有家學賦南園江鄉有翠蓋紅粧無俗韻綠陰
青子更多情之句惜不多見也中州集

宗御史端脩小傳

元好問

端脩字平叔一字伯正汝州人大定二十二年進士

傳 宗御史端脩小傳

衛紹王避世宗諱改宗為姬而天下止以宗平叔目
之好學喜名節操履端勁慕司馬溫公之為人自為
諸生時見者必悚然敬之明昌中自省掾拜監察御
史車駕東狩是歲大寒人有凍死者平叔諫止之元
妃兄弟李喜兒輩干預朝正平叔上書以遠小人為
言道陵知其為喜兒發詔喜兒就問御欲朕遠小人
小人為誰其以姓名對平叔奏小人止喜兒兄弟耳
喜兒以聞李氏兄弟皆被切責竟以訐直貶官平叔
自守愈篤是是非非議論一出于正大為朝廷所知

降詔褒諭以全州節度副使平叔妻死不更娶
潔居二十年士論高之永寧游彥哲調汝州司候將
之官問為政平叔言為政不難治心養氣而已彥哲
不領明日復來云夏初入官且臨先生鄉郡請問從
政而先生乃以治心養氣為言思之不能得願終教
之平叔曰子寧不知此耶治心則心正心正則不私
養氣則氣平氣平則不暴不私不暴為政之術盡于
此矣平叔墓碑及傳聞聞公所作稱其剛稜疾惡有
鐵面陳了翁之風人不以過云姪孫汝作正大末保

山棚有功入守汝州力盡城復陷兵人欲降之不屈
而死

中州集

張戶部翰小傳

元好問

翰字林卿秀容人大定二十八年進士為人有蘊藉
如素官然累遷監察御史翰林直學士貞祐初戶部
侍郎車駕南渡出為河平軍節度使召拜戶部尚書
草創之際經費空竭雖米鹽細物皆倚之而辦予嘗
見于戶曹邠州一書生言時事相與詰難凡數十條
率不思而對雖反復計度者亦自不能到信通濟之

良材也宣宗旦暮相之會卒年五十五弟脩字飛卿
承安五年進士同知河東北路兵馬都總管事猶子
天葵字仲常黃裳臨登科子天任字西美近侍局副
使死于宗州之變 中州集

李好復小傳

元好問

好復字仲通安喜人明昌二年進士榆次令有能聲
入為警巡使嘗以事縛一護衛道陵有投鼠之喻出
為歷城令終于滑州刺史 中山集

楊祕監邦基小傳

邦基

邦基字德茂大定中進士仕至祕書監禮部尚書文
筆字畫有前輩風調世獨以其畫比李伯時云 中州
集

呂陳州子羽小傳

元好問

子羽字唐卿大興人大定末進士仕至陳州防禦使
元光末為酷吏所誣以乏軍興繫獄比赦至唐卿自
縊死朝臣有辨其寃者詔復官希顏為制辭云毀譽
之來在仁賢而不免是非之論至久遠而乃公人謂
唐卿於此語為無媿屏山故人外傳呂氏自國朝以

跋

來父子昆弟凡中第者六人以六桂名其堂貞幹字周卿尤自刻苦酷嗜文書著碣石志數十萬言皆近代以來事迹幽隱謫怪詼諧嘲評無所不有在史館論正統獨異衆人謂國家止當承遼大忤章廟旨謫西京運幕量移北京致仕自號虎谷道人晚年感末疾又號呂瘦子自作傳以見志閒閒公亦以為篤志君子也弟士安字晉卿卿雲字祥卿子鑑字德昭皆名士唐卿其從子云 中州集

趙鹽部文昌小傳

元好問

文昌字公權平陽人明昌二年進士任至遼東路鹽使博學好持論周常山甚愛之子觀字維道從事史院資謹厚不忤于物閒閒公許其字畫進進不已可到古人云 中州集

韓內翰玉小傳

元好問

玉字溫甫其先相人五世祖繼寧任石晉為行軍司馬從出帝北遷居析津曾孫知白仕遼為中書令字為中書門下平章事賜田盤山遂為漁陽人曾祖錫字難老任國朝以濟南尹致仕溫甫明昌五年經義

為陷
空格

詞賦兩科進士入翰林為應奉應制一日百篇文不加點又作元勳傳稱旨道陵嘆曰勳臣何幸得此家
 作傳耶恭和中建言開通州潞水漕渠船運至都陞
 兩階授同知陝州東路轉運使事大安三年都城受
 圍夏人連陷邠涇陝西安撫司檄溫甫以鳳翔總管
 判官都統府募軍旬月得萬人藉秦州場買馬官
 香及鳳翔冒買馬七百寶雞埋沒官鐵他州郡弓弩
 數千以給軍出屯華亭與夏人戰敗之獲牛馬千餘
 時夏兵五萬方圍平涼又戰于北原夏人疑大軍至

是夜解去當路者忌其功驛奏溫甫與夏寇有謀朝
 廷疑之使使者授溫甫河平軍節度副使且覘其軍
 先是華州李公直以都城隔絕謀舉兵入援而溫甫
 恃其軍為可用亦欲為勤王之舉乃傳檄州郡云事
 推其本禍有所基始自賊臣貪容姦賂繼緣二帥貪
 錮威權既止夏臺之師旋致會河之敗又云齊魏以
 高壘為能堅蒲絳以穿空為得計累糧坐廢盡膏血
 于生民棄甲復來竭資儲于國計要權力而望形勢
 連歲月而守妻孥又云命令不至京師奈何盼盼四

集之師懸懸半歲之上人誰無死有臣子之當然事
至于今忍君親之弗顧勿謂百年身後虛名一聽史
臣只如今日目前何顏以居人世公直一軍行有日
矣將佐違約國朝人不從者輒以軍法從事京北
統軍便謂公直據華州反遣都統楊珪襲取之皆置
極刑公直曾為書約溫甫溫甫不預知其書乃為安
撫所得公直書三一與京兆宣撫一與溫甫及使者
覘溫甫軍且疑預公直之謀即實其罪溫甫赴官道
出華州被囚死于郡學臨終書二詩壁間士論寬之

溫甫先賦怪松云昂藏殊未展偃偻旋自縮惜爾雲
外姿耐此膝下辱又云木高衆必摧地厚敢不踴河
中皆汎汎湖底自鬱鬱未幾被禍人以為議云子不
疑字居之小字錦郎以父死非罪擔不祿仕丙申之
夏過予冠氏出其父臨命時手書云此去冥路吾心
皎然劉直之氣必不下沉兒可無慮世亂時艱努力
自護幽明雖異寧不見爾予為之惻然中州集

王都運擴小傳東坡先生集卷之六元好問

擴字克之永平人明昌五年進士累遷同知德州防

欽定四庫全書
樂使事山東饑詔馳驛赴官且以賑貸事付之時棟
州饑尤甚而不在發粟之數充之擅開倉救之朝廷
不之罪也泰和七年旱夏充之以監察御史受詔審
寃因為同列言往事審寃一切以末減為事至殺人
者之罪亦貫出之地下之寃當誰理之乎使還言鞫
設三司不便大畧言三司之設特以剝剝為事大定
間一曹望之為戶部天下倉廩府庫皆實百姓無愁
怨之聲存乎其人不在改官稱也今三司官皆戶部
舊員掾屬亦戶曹舊吏豈有愚于戶部而智于三司

者乞復戶部之舊無駭民聽可也崇慶初遷河東北
路按察僉事上書言時病四一將不知兵二兵不可
用三事不素定四用人違其長貞祐二年太原受兵
充之之功為多最後權陝西西路轉運使行六部尚
前政太原喬世權實燕人趙伯成子文輝為稱職充
之表表自見雖處細務亦有法掾屬奔走從事無敢
後者評者為子實寬緩敬為不忍欺子文慎密敬為
不能欺皆未必能然獨王公之不敢欺為有徵云年
六十三致仕卒子元慶字善甫歸德行六部郎中次

子元亨 中州集

趙吏部伯成小傳

元好問

伯成字子文宛平人明昌五年經義詞賦兩科進士
博通書傳有真積之力性沉厚言必中理從在太學
日人以趙骨鯁目之累遷侍御史拜中丞陝西西路
轉運使靜難節度使哀宗即位召為吏部尚書坐為
飛語所中罷官卒于崧山中潞人宗文之說其臨終
甚明了也 中州集

盧待制元小傳

元好問

元字子達玉田人父啓臣字雲叔第進士仕官亦達
自號漚水先生和趙元發劉師魯葛藤韻云乳鬼生
長角麤湯結厚冰木終成假佛髮不礙真僧莫認指
為月須明以是燈拈花微笑處只記老胡曾子達幼
而敏惠年未二十試于長安為策論魁擢第後又中
策魁明昌初章廟設宏詞科命公卿舉所知子達與
郭徽周詢張復亨就試凡七百並中選遂入翰苑累
遷至待制二兄長庸弟曾名進士又俱擢高第時人
以燕山竇氏比之屏山故人外傳云爾子安字希謝

翔字仲升正大末登科

中州集

范滑州中小傳

元好問

中字極之大興人承安中進士累官京西路司農少卿滑州刺史好賢樂善有前輩風流貞祐中高琪當國專以威刑肅物士大夫被摠撫者皆辱與徒隸等醫家以酒下地龍散投以蠟丸則受杖者失痛覺此方大行于時極之有戲云嚼蠟誰知味最長一杯卯酒地龍香年來紙價長安貴不重新詩重藥方時人傳以為笑極之嗜讀書一以資于詩詩亦往往可傳

壬辰卒于京師年五十七

中州集

趙禮部思文小傳

元好問

思文字庭玉永平人明昌五年進士貞祐中陷沒都城間關南渡遂為朝廷所知歷虢州刺史汝州防禦使金安集慶兩軍節度使召拜禮部尚書壬辰卒官為人誠實樂易自少日有君子長者之目南狩以後趙吏部子文楊禮部子美趙禮部周臣陳司諫正叔與庭玉皆完人終始無玷缺者也弟庭珪同榜登科三子敬叔介叔方叔今居鄉里

中州集

李坊州芳小傳
元好問

芳字執剛大興人承安二年進士歷乾坊兩州刺史
同知都轉運使事為人敬賢下士款曲周至聞人一
善極口稱道士論以此歸之又精于吏事累以廉能
進秩正大末致仕歿于洛陽之難

盧宜陽洵小傳
元好問

洵字仁甫高平人李承旨致美見所作上梁文勉使
就舉六十一歲呂造端登科歷河南府教授河陽丞
宜令致仕後居伊陽年八十三卒仁甫有詩學以輩

原及赤壁圖詩著名招飲云南園仙杏猩紅破北渚
官醪玉汗醇已約尊前成二老全勝月下作三人
中州集

刁涇州白小傳
元好問

白字晉卿信都人呂造端乙科歷涇州幕官入補省
掾卒作詩極致力樂府尤有風調今散失不復見矣

中州集

劉戶部光謙小傳
元好問

光謙字達卿潘州人父澤字潤之為部掾斷獄有陰

府州

三才集

三

問

德劉之昂與之酬唱其詩有云侯門舊說安如火陋
巷今猶冷似冰半夜杯槃長袖舞白頭書冊短檠燈
用是不敢以府史待之達卿泰和三年進士資幹
局處事詳雅為朝廷所知累官司農少卿病瘡許州
宣宗勅國醫診視之卒年五十六好問為舉子時識
于登封相得甚歡尊酒謔笑有味使人不能忘也中
州集

毛提舉端卿小傳

元好問

端卿字飛卿彭城人父矩桓州軍事判官歿王事飛

卿二十歲始知讀書游學齊魯間備極艱苦飢凍疾
病不以廢業凡十年以經義魁東平泰和三年擢第
累遷提舉權貨司戶部員外郎性剴明疾惡過甚坐
與監察御史相可否為所中傷降鄭州司候改孟津
丞將復用矣會卒子思適今居東平

康司農錫小傳

元好問

錫字伯祿寧晉人其祖嘗與兄弟分財他田宅無所
問止取南中生口十餘人縱為名而已以故家獨貧
父奕為里胥性純篤縣令者倚之以細賄及令為御

伯

史所劾矣自念言直則令被罪終世不齒渠官長而
我以事證之何以立于世乃自縊而死令竟以無迹
可尋獲免伯祿既養于外祖田氏田氏見田祿骨節
異他此謂當有望使之應童子舉飲食卧起躬自調
護備極勞苦得解赴都一日日暮行菱葦中懼為同
行所遺至背負伯祿而行及長師柏鄉王翰周輔東
脩不能備周輔與諸公共賙賂之黃裳楊擢第歷櫟
陽簿警巡判官辟彭原令補省掾考滿遷開封府判
官拜監察御史言宰相侯摯師安石非相材提點近

給

羣

治

侍局宗室安之聲勢熒熒請託公行不可使久在禁
近朝議偉之選授右司都事京南路司農丞破上蔡
諸縣郡不逞把持之黨以河中浴中充行六部郎中
從軍城陷投水死伯祿孝于母友于其弟有恩義于
朋友從政則死心以奉公為民古所謂公家之利知
無不為者惟伯祿為然同年生如雷希顏冀京父宗
飛卿之等名士數十人世以比唐日龍虎榜至論氣
質尚以伯祿為稱首云

中州集

張戶部德直小傳

元好問

德直字伯直平陽人叔祖邦彥字彥才張楫楊登科
以當川令致仕有松堂集行于世嘗有詩云青山澹
澹水溶溶盡出蒼祇點化工無限燒痕渾綠染可憐
喬木待春風父迪祿字仲英明昌初進士歷岐山上
黨二縣令卒于省掾伯直貞祐三年進士釋褐新平
簿辟藍田令秩滿父老詣行臺留再任去之日為立
生祠移沔池通許召補省掾選授右警巡使終于同
知武勝軍節度使事子城今居永寧 中州集
李宜陽過庭小傳 元好問

中字多

也

過庭字庭訓武亭人貞祐二年進士歷宜陽永寧滎
陽三縣令所去見思入為右曹掾斷獄寬平當妖賊
李亨首坐所誅誤數百人皆從輕法正大中擢右三
部司正 甲終于昌武軍節度副使少日從太原王正
之學故詩文皆有可觀人初與交者多不能合久之
知其為淳質長厚人壬寅四月暴卒于東平子華字

華甫 中州集

田錫小傳

元好問

錫字永錫宛平人興定五年進士調新蔡主簿閒居

元好問

五

南陽驥立山下資豪爽自少日有聲場屋間作詩甚多
多中蘇墳一篇有英靈還却眉山秀依舊東風草木
天之句世關傳之 中州集

張介小傳

元好問

介字介夫彭城人正大元年經義第一人歷鞏穀熟
二縣令幼有賦聲為人有蘊藉嘗贈詩人楊叔能末
章云我貧自救如沃焦君來過我亦何聊為君欲寫
貧士歎才思殊減荒村謠楊初以荒村謠得名故云
中州集

宗景蕭小傳

元好問

景蕭字望之濟川族孫正大六年進士辟令泰安未
赴遭亂望之於劉景玄為外兄故其詩頗獲沾沾嘗
有荒山銷盡古今魂之句詩家稱焉 中州集

李警院天翼小傳

元好問

天翼字輔之固安人貞祐二年進士歷滎陽長社開
封三縣令所在有治聲遷右警巡使汴梁既下僑寓
聊城落簿失次無以為資辟濟南漕司從事方鑿園
柶子不與世合衆口媒藥竟罹非命輔之材具甚美

且有志于學與人交款曲周密久而愈厚死之日天下識與不識皆為流涕予謂天道悠遠良不可知而天理之在人心者亦自不泯也 中州集

張參議澄小傳

元好問

澄字之純別字仲經本出遼東烏惹族國初遷之隆安祖黃縣府君移官洛水回家焉之純早孤能自樹立避地洛西率資無旬日計而泰然以閉戶讀書為業嘗從辛敬之趙宜之講學故詩文皆有律度兵後居東平詩名藉甚如云齊客計窮思蹈海杞人癡絕

謾憂天壞壁粘蝸艱國步荒池漂蟻失軍容此類甚多 中州集

郭宣道小傳

元好問

宣道字德明邢州人系出衣冠家人物楚楚而有老成之風貞祐中客南陽名士定興張履坦之罷鄧州觀察間居此縣之石橋見德明愛之招致門下飲食教督委曲周備遂有聲場屋間正大末沒兵中 中州

集

睡軒先生趙晦小傳

元好問

雨
傳
社補

可州

晦字光道管城人宋末代州法曹秀容主簿汴京破後不復仕自號睡軒居士子洵子都大定二十年進士真定路總管判官孫綱三赴廷試以蔭補官終于永壽令曾孫居禮之讓今在燕中 中州集

浚水王先生世賞小傳 元好問

世賞字彥功汴人與尹無忌王逸賓趙文孺相周旋明昌中保舉才能德行賜出身釋褐鞏州教授終于鹿邑簿有浚水老人集傳于世 中州集

南湖靖先生天民小傳 元好問

天民字達卿滏陽人其父國初官原武因而家焉少日嘗兩魁鄉試自望者不碌碌所與交如龐才卿楊茂才劉之昂王逸賓皆一時名士晚年買田南湖葺亭園植竹樹以詩酒為事自號南湖老人年七十九卒子文煒德昭從孫顯子昂 中州集

鮮于溥小傳 元好問

溥字彥仁宋文臣子駿之後高祖淳淳之子孝標標之子壽吉壽吉之子坦皆擢進士第而仕亦達彥仁坦之子以門資仕終于櫟陽令濟源盤谷天壤佳處

或竟字格注 顯 名御

金文最

坦父子居其間飲酒賦詩翛然塵垢之外至今人以
高士目之彥魯子忠厚今居鄉里 中州集

史士舉小傳

元好問

士舉字仲升滎澤人漢功臣弘肇之後高祖所賜鐵
券故在其大父官濟源樂其山水因家焉父神山令
激石琚榜進士仲升以蔭補官歷銅鞮三川兩縣令
初任京兆錄事以歲旱擅開倉賑貧身往太一湫禱
雨尋獲嘉澍用是得名為人惟重知義理褒衣緩帶
消搖山水間宛然一老書生也貞祐之亂避于太行

保聚失守老幼皆出降仲升義不辱投絕澗而死年
七十九孫庭玉字德秀今居山陽 中州集

王敏夫小傳

元好問

敏夫五臺人作詩工于賦物甚為趙宜之所稱雁門
前輩中有許蛻子遷以武皇廟詩著名又酒渴後四
句云眼底恨無雲夢澤胸中疑有沃焦山南窻花影
三竿日指點銀瓶照病顏有集傳河東往往稱此倪
民望字具瞻屏山所謂倪侯頭如筆其鋒不可當者
有種松詩云種松莫種柳種柳莫種松堅脆非所計

雅俗寧與同可是種松無隙地却教憔悴柳陰中張
韶九成寄朔州苟輔臣云陳雷膠漆輕餘子楚漢風
雲屬少年李忠直卿賦雪云不將柳絮春風比好作
梨花月夜看至于蘇吉莘老李鵬翼冲霄與具瞻之
子仲儀詩文多可傳喪亂之後惜不能記憶之矣中
州集

王利賓小傳

元好問

利賓字茂實襄城人朴直純素作詩有古意似其為
人然亦未嘗以示人也家與衛昌叔隣居而不相往

騰

來計平生所交惟不肖而已予一日過襄城知茂實
病就卧內候之乃見壁間所黏五言古詩十教首竄
改重疊往往可傳然後知茂實所以交予者特以詩
故耳渠既不言予亦無從知之惜登時不騰寫今忘
之矣中州集

郝先生天挺小傳

元好問

天挺字晉卿陵川人家世儒素伯父子颺有詩名號
東軒老人先生少日有賦聲早衰多疾厭于名場遂
不復就舉貞祐之兵避于河南往來淇衛間為人有

崖岸耿耿自信寧落薄而死終不一傍富兒之門年
五十七卒於舞陽臨終浩歌自得不以死生為意其
平生自處為可見矣好問十四五先人令陵川時從
先生學舉業先生教之曰今人賦學以速售為功六
經百氏分碟綴緝外或篇題句讀之不知幸而得之
不免為庸人况一敗塗地者乎又曰讀書不為藝文
選官不為利養唯通入能之又曰今世仕宦多用貪
墨敗官皆苦于飢凍不能自堅者耳男子生世不耐
飢寒則雖小事不能成子試以吾言求之先生工于

詩時命好問屬和或言令之子欲就科舉詩非所急
將無徒費日力耶先生曰君自不知所以教之作詩
正欲渠不為舉子耳子思溫字和之孫經字伯常今
居順天中州集

孫邦傑小傳

元好問

邦傑字伯英雄州容城人曾祖堅國初有功官至龐
州刺史伯英少日任太學有時名所與游皆名士興
定初知世將亂棄家為黃冠師中州集

張瓌小傳

元好問

册

璪字君玉大名朝城人嗜作詩年已老而刻苦殊未
減為人謹愼有禮見稱諸公間卒年六十八子鑄鎮
今居鄉里 中州集

呂大鵬小傳 元好問

大鵬字鵬舉密縣人自言宋名相申公之裔宣宗頻
歲南伐鵬舉作詩欲以撼主兵者云縫掖無由挂鐵
衣劍花生澀馬空肥燈前草就平南策一夜江神泣
涕歸其以氣岸自許皆此類也 中州集

金文最卷九十六

兩傳 元好問

高永小傳 元好問

永字信卿出于盤陽大族父元字善長教信卿作舉
子讀書畧通即棄之去為人不顧細謹有幽并豪俠
之風賓客入門則盡家所有者為具不為明日計人
以此愛之貞祐初避兵太原與李長源居于廣平寺
有盜穴墻而入長源性恇怯聞騷聲噤不敢語盜
盡挈信卿所有而去長源徐曰綠林之子至矣於是

哭

信卿生理大狼狽南渡居嵩州出入屏山之門其學
遂進初名夔字舜卿又名揆屏山改焉真定王之奇
士衡攻雜學屏山目為怪魁王從之內翰為賦善笑
詩奉聖馬餌升公敢為大言著書十萬言號北新子
大畧以談兵為主且曰古人兵法非不盡但未有北
新子五十里火兩耳信卿皆與之游故其詩豪宕譎
怪不為法度所窘有冰柱雪車風調觀阻龍篇及大
雨後見寄可概見矣正大壬辰病没于京師年四十
六中州集卷之六

曹用之小傳書錄事少卿元好問林
用之歸德人幼有賦聲屢中甲乙詩亦有功嘗戲作
鬼仙語云瀏瀏竹間雨熒熒窗下燈相逢不相顧含
淚過巴陵詩有本事中山楊正卿能道所以然真人
作鬼語也中州集

趙達夫小傳元好問當
達夫太原人性嗜讀書而不事科舉南渡後居維氏
山中安貧守分故終世窮悴壬辰之兵遇害中州集
邢安國小傳元好問當

趙州

金文最

二

安國字仲祥沁州武鄉人少日有賦聲四十歲即不
應科舉以詩酒自娛避亂客沁陽十餘年後北歸備
極艱苦其見于詩者如此往時李長源傳仲祥柳花
一詩渠甚愛之今以丹崖集校之與傳者不同當是
長源曾與商畧之耶中州集

張溫小傳

元好問

溫字元佐上黨人祖仲容字才翁宋末登科仕至屯
田員外郎以好士名天下致仕後有詩云病身衰退
謝明朝北洞閒眠晝寂寥十畝晚禾烟冉冉一林脩

竹雨瀟瀟黑花遮眼秋不落白雪撲頭春未消世事
悠悠吾老矣一壺濁酒且逍遙至今為鄉里所傳元
佐泰和六年李演榜乙科登第詩樂府俱有名于時
中州集

馬舜卿小傳

元好問

舜卿名肩龍以字行宛平人先世遼大族有知興中
府者故又號興中馬氏祖大中國初登科節度全錦
兩州父成誼字宜之張楫榜登科京兆路統軍司判
官舜卿在太學有賦聲宣宗初人有告宗室從坦殺

人從坦字履道一時賢將帥處猜嫌之地人以為必死而不敢言其寃舜卿以太學生上書大畧謂從坦有將帥材方今人物無有出其右者臣一介書生無用于世願代從坦死留為天子將兵書奏詔問汝與從坦交分厚耶舜卿對臣知有從坦而從坦未嘗識臣從坦寃人不敢言臣以死報之宣宗感悟赦從坦授舜卿東平錄事委行臺試驗宰相侯莘公與之語不契留數月罷歸將渡河與排岸官紛競篋中搜得軍馬糧料名數及利害事目疑其姦人之偵伺者繫

歸德獄根勘適從坦至立命出之正大四年冬薄游鳳翔德順州將爰申以書招舜卿舜卿欲往鳳翔搃管以敵兵勢甚張吾城可恃德順不可守勸勿往舜卿曰爰申平生未嘗識我一見為知己我知德順不可守我往必死然以知己故不得不死也乃舉行橐付族父明之為死別冒險而去既至不數日受圍城中義兵七八千而已州將假舜卿鳳翔搃管判官守禦一以委之凡受攻百日食盡乃陷軍中募生致之不知所終時年五十三詔贈某官配食褒忠廟舜卿

劉孫子孫世傳
上宿刑

年少時過襄垣題詩酒家壁辭氣縱橫時輩少有及者如云玉鞭再過長安道人面依前似花好殷勤勸我梨花春要看尊前玉山倒他語類此中州集

豫字彥由阜城人仕宋知濟南府事汴京下立張邦昌為大楚皇帝宋滅楚更立彥由國號齊建元阜昌八年廢為蜀遷黃龍府改封曹有集十卷行于世二子麟猷孫通海陵潮叅知政事四世孫瑛今在太原中州集

府刑

虞令公仲文小傳

仲文字質夫世南之裔武州寧遠人仕為遼相歸朝授樞密使平章政事封秦國公四歲作詩賦煎餅有魚目蟬聲之句人以神童目之中州集

張丞相孝純小傳

孝純字永錫滕陽人宣和末知太原國兵圍守踰年人相食幾盡乃下朝廷怜其忠換相職後以相齊致仕汴京建行臺起為左丞相踰年得請歸鄉里二兄尚安健鄉人為作三老圖薨謚安簡子公藥字元石

情

三才圖會

五

昌武軍節度副使致仕孫觀字彥國世為文章家曾
孫原之字茂宏承安二年進士中州集

張左相汝霖小傳其子元好問

汝霖字仲澤遼陽人家世貴顯父浩字浩然以門資
仕揚歷中外遂升端揆進拜太師封南陽郡王五子
仲澤平章政事莘國公汝為字仲宣河北東路轉運
使汝翼仕不達皆進士也汝方字仲賢自號丹華老
人汝猷字仲謀俱至宣徽使父子兄弟各有詩傳於
世王子端內翰太師之外孫其淵源有自云中州集

劉右相長言小傳

元好問

長言字宣叔東平人宋相莘老之孫而學易先生斯
立之猶子也父蹟年三十五終于儀真令工詩能文
有南榮集傳東州今獨余家有之宣叔正隆宰相詩
文能世其家今不復見矣中州集

右相文獻公耶律履

元好問

履字履道東丹王之七世孫學通易太玄至於陰陽
歷數無不精究嘗以鄉賦一試有司以露索為耻遂
不就舉蔭補國史掾興陵朝累遷薊州刺史入翰林

為脩撰歷真學士待制禮部尚書特賜孟宗獻榜進士第俄預淄王定冊功拜叅知政事明昌元年進右丞薨年六十一興陵嘗問宋名臣孰為優履道以蘇端明軾對上曰吾聞軾與王誥交甚款至作歌曲戲及姬侍非禮之甚尚何足道耶履道進曰小說傳聞未必可信就使有之戲笑之間亦何得深責世徒知軾之詩文人不可及臣觀其論天下事實經濟之良才求之古人陸贄而下未見其比陛下無信小說傳聞而忽賢臣之言明日錄軾奏議上之詔國子監刊

行自號忘言居士有集傳于世三子辨才武廟署令善才工部尚書楚才中書令四孫鈞鉉鏞鑄中州集

張平章萬公小傳

元好問

萬公字良輔東阿人正隆二年進士仕長山令有惠政人為立祠入為右司員外郎太師淄王愛之許以宰相器明昌初累遷御史中丞以言事忤旨除彰國軍節度使召為大興尹拜叅知政事以母老丐歸養出判東平河中濟南丁內艱起復擢平章政事封壽國公為相知大體有敦龐者艾之目既致政而眷頌

未衰復起判濟南安撫山東便宜行事未幾得請薨
于家謚文貞繪像衍慶宮配享章宗廟廷中州集

董右丞師中小傳
元好問

師中字紹祖邯鄲人後徙洛州皇統九年進士承安
中入政府直道自立而以通材濟之泰和初元妃李
氏方寵幸兄喜兒為宣徽使有楊國忠之權一日德
州教授田庭方上書言事云大臣持祿近臣怙寵此
言路之所以塞也道陵頽謂紹祖言大臣持祿當謂
公等近臣怙寵者為誰時喜兒侍立殿上紹祖倒笏

指之曰莫非謂李喜兒之屬否上頷之紹祖嘗言作
宰相不難但一心正兩眼明足矣少日以詼諧得名
及在相位亦未嘗廢談笑然不害其為國朝名相也
俄致政賜第京師後三年薨有燕賜邊部詩傳于世
紹祖師王內翰彥潛而與之同榜登科彥潛沒後待
其子恩禮重不減骨肉論者謂孫鐸振之事其光明
之張毅伯英愛其弟伯玉舉世無為比至于紹祖之
待其師之子則古所未有也有漳川集傳于家中州

集

卷之六

代

有

孫太師鐸小傳

元好問

鐸字振之恩州人大定十三年進士明昌中擢戶部尚書時已有相望及考滿以戶曹繁重且未有可待者特旨進一官再任而同列二人俱以入相矣振之賀席中戲舉青州老柏院布衣張在詩云南隣北里牡丹開公子王孫去不回惟有庭前老柏樹春風來似不曾來為御史所劾降授同知河南府事以詩送之者云想到洛陽春正好南陵北里牡丹開聞者大笑振之後入政府遷尚書右丞薨贈太子太師作詩

甚多其賦玉簪有披拂秋風如有待
 乘回涼月更多情之句甚為詩家所稱
 中州集

梁參政瑾小傳

元好問

瑾字國寶別字瑩中范陽人大定十六年進士歷州縣稍遷警巡使治尚嚴肅權貴斂迹朝廷知其才累試繁劇由中都路轉運使使拜戶部尚書俄參知政事資方政敢言大事北兵動立和議人有笑其懦者卒如其言未幾薨于位虎賊咤曰梁瑾在族矣其為人可知
 中州集

使字多

賈左丞益謙小傳

元好問

益謙字亨甫本名守謙避哀宗諱改焉宣宗朝叅知政事出知濟南移鎮河中南渡後召拜左丞尋致仕居鄭州哀宗即位史官乞國宣廟實錄遂及衛紹王初虎賊既弒遂乃立宣宗宣宗之人至謂衛王失道天命絕之虎實無罪且於主上有推戴之功獨張信上章言虎賊大逆不道當用宋文帝誅傅亮徐羨之故事章不報爾後舉朝以大安崇慶之事為諱及是謂亨甫大安中嘗拜御史中丞宜知衛王事乃差編

奏

因

脩官一人就訪之亨甫知其旨謂來者言知衛王莫如我然我聞海陵被弒而世宗皇帝立大定三十年禁近能暴海陵蟄惡者得美仕史官脩實錄誣其淫毒狠鷲遺臭無窮自令觀之百可一信耶衛王勤儉慎惜名器較其行事中材不能及者多矣吾知此而已設欲飾吾言以實其罪吾亦何惜餘年朝議偉之正大三年年八十薨子賢卿願卿翔卿皆以門資仕今一孫仲明在東平中州集

丞相壽國高公汝礪小傳

元好問

相

汝礪字鼎甫應州金城人大定中進士揚歷中外居
戶曹三司為最久宣宗十年小心畏慎夙夜匪懈篤
于古人造膝詭辭之義謀謨周密人莫得而聞元光
末宣宗上仙公亦薨於位君臣之契義均同體者于
斯見之平生嗜讀書南渡之後機務倥偬未嘗一日
廢書不觀臨終留詩有寄謝東門千樹柳安排青眼
送行人之句時年七十一謚配宣宗廟庭至今士
論謂公才量渾厚足以為守成之良相恨所遭不時
耳中州集

胥莘公鼎小傳

元好問

鼎字和之代州繁峙人父持國大定中為太子司藏
有功母后家章宗即位擢拜尚書右丞和之大定二
十八年進士至寧初都城受兵由戶部尚書叅知政
事宣宗即位除泰定軍節度使不赴改判大興貞祐
二年拜尚書右丞車駕南渡出為汾陽軍節度使移
知平陽權河東南路宣撫使四年授樞密副使權右
丞兼職如故五年正月朝京師進平章政事封莘國
公行臺關中未幾兼左副元帥明年以溫國公致政

彼

封英行臺衛州以病薨于位雷希顏為作神道碑云
黃霸為良吏稱首及為丞相與張敞論列功名大減
王允當漢祀之衰計誅董卓近古社稷臣然不赦涼
州人旋致僱汜之禍蕭俛之清介崔植之論議皆足
為唐名臣而俛議銷兵植餓朱克融輩不畀一官遂
再亂河朔或量不足或才畧有所窮權不足以濟事
智不足以知時故也以姚崇之賢惟其不知道未免
為揀時之相其他可知也國家有通明相曰英國胥
公尚魚數公之長予謂希顏此論似涉過差至於為

國朝名相以度量雄天下則在公為無媿矣在長安
日乞致仕表云興造功業方聖主有為之時表裏山
河豈愚臣養病之地送弟有之云世事正須高著眼
宦途休厭少依頭他文類此弟恒常之子嗣祖今在
燕中

中州集

張左丞行中小傳

元好問

行中字信甫呂州日照人祖莘鎮西軍節度副使父
暉御史大夫以武安軍節度致仕先行簡易無體勝
第一人信甫大定二十八年進士衛紹王朝虎賊已

末

除名為民賂遺權貴得復用信甫言其必反及弒逆
自為太師尚書令澤王信甫時為禮部尚書人謂必
為所殺甚危之一日虎下禮部鑄監國寶信甫持不
可虎雖怒然亦竟不能殺也宣宗即位授叅知政事
丞相高琪專權用事聲勢焰焰人莫敢仰視論議之
際唯信甫與之抗朝廷稱焉所居拙軒有為作銘者
其引云發玄豎未形之謀則先識者以為明犯強臣
不測之威則疾惡者以為剛蓋實錄云元光末出為
靜難軍節度使哀宗即位首命召之遷尚書左丞後

者

二年致政卒於崧山之崇福宮信甫家世儒素雖位
宰相而奉養如寒士日書經史五百字為課寒暑不
廢四五十年故於書無所不讀詩殊有古意也中州

集

楊戶部慥小傳

元好問

慥字叔玉代州五臺人承安五年進士歷州縣入為
尚書省令史拜監察御史侍御史京西大農司丞京
南司農鄉戶部侍郎權尚書自入戶曹即有相望資
雅重事無巨細處之皆有法至於知朝廷大體則又

非他人所能及也京城受兵權參知政事明年卒於
河平叔玉文工於詩而人不以能文稱特未見其文
耳中州集

鄭內翰子聃小傳

元好問

子聃字景純大定人少日有賦聲時輩莫與為敵天
德三年第三人登科士論仍以為屈海陵不之許也
正隆二年詔景純再試擇能賦者八人先以題付之
以困景純且將視其中與否罪賞之及開卷景純果
第一人楊伯仁張汝霖中選劉幾秦戩李師顏輩皆

被黜海陵終不以景純為工與被黜者兩罷之趙獻
之賀啟云丹桂有枝不失舊物青錢萬選無媿古人
其為名流所稱道如此累官吏部侍郎改侍講學士
卒其賦醪醑有玉斧無人解脩月珠裙有意欲留仙
之句甚為詩家所稱中州集

孟內翰宗獻小傳

元好問

宗獻字友之開封人大定三人鄉府省御四試皆第
一供奉翰林曹王府文學兼記室參軍以疾尋醫久
之授同知單州軍州事丁母憂哀毀致卒劉無黨題

其詩卷後云簪紱忘情累山林閱歲陰選官堂印手
說法老婆心世路嗟前却人生變古今公乎真不死
名姓斗之南相人孔嗣訓挽云二十年間事才名一
夢新衰羸驚喪母哀毀竟亡身竟返愁楓夜情留淚
草春黃公酒壚在此去只悲辛汴人高公振特夫云
見說平生夢前途盡目前乘除雖有數凶禍竟何緣
禮樂三千字才名二十年仁人遽如許無路問蒼天
又云誰謂詩成識清水果自焚人嗟埋玉樹天為落
文星數詩雖不盡工姑并記之有以見先生於出處

之際死生之變造物者皆使之前知其以天下重名
界之者為不偶然云中州集

趙文學承元小傳

元好問

承元字善長先世汴人兵火間寓旅河間遂占籍焉
大定十三年詞賦第一人除應奉翰林文字兼曹王
府文學以疎俊少檢得罪王府貶廢久之遇赦量叙
卒於臨洮中州集

張太保行簡小傳

元好問

行簡字敬甫大定十九年詞賦第一人家世儒臣備

於禮文之學典貢舉三十年門生徧天下南渡後遷
禮部尚書太子太保翰林學士承旨薨謚文正楊內
翰之美銘其墓稱敬甫天性孝友太夫人疾不解衣
者數月居喪哀毀過禮事其父御史大夫自幼至終
未嘗少違顏色與諸弟居三十餘年家門肅睦人無
間言率勵子弟不知為驕侈雖處富貴與素士無異
平生無汎交無私謁慎動周密動循禮法居無怠容
口無俚言身無徑行雖古君子無以加故天下言家
法者唯張氏為第一言禮樂言文章言德行之純備

者亦唯張氏之婦有集三十卷傳于家敬甫賦燕云
王氏烏衣巷盧家白玉堂寒食云餽粥難越留故事
風花鶯柳開春城中秋云露凝灑氣露瑤席雲迤清
光護桂宮此類甚多也中州集

張內翰檝小傳

元好問

檝字巨濟先世秦州長春人有官於山陰者遂占籍
焉曾祖頤宗銀青榮祿大夫祖惠懷遠大將軍父天
白號縣簿巨濟明昌五年詞賦第一人仕至鎮州
刺史為人蘊藉善談論文賦詩筆截然有律度時

駭馳

人甚愛重之陝州詩云駭浪奔生馬荒山卧病馳永
寧劉氏園亭云菊老芙蓉衰梨柿葉爭絳叩門人不
應一犬吠深巷此類甚多中州集對處大將軍以天

元好問治中長言小傳春入有言於山元好問

長言字子秀濟南長清人客居兗州之滋陽祖俊行

臺南榜父時昇任忠傑榜曾高以來登科者六世矣

子秀少日慕張忠定之為人教名詠避衛紹王諱改

幼孤養于從祖能自振厲好學工詞賦間有前人句

法性本豪俊使酒任氣及游京師乃更折節遂以謹

馬

厚見稱酒酣耳熱故態稍出嘗以第一流自負屏山

獨深知之不以為過也平生多奇夢果魁天下士論

厭服在翰苑十年出為河南府治中被召以道梗不

得前卒于亳州子魯瞻魯安今一孫在汝州中州集

李治中著小傳元好問

著字彥明真定人高才博學詩文得前人體工於字

畫頗尚玄言承安二年經義第一人在翰林七年出

副定州召為戶部員外郎坐大中黨事謫臨洮府判

官量移西京路按察司判官遷彰德府治中城再陷

元

避于塢上兵人招降大罵不從掘塢倒而死中州集

擬柳先生王中立小傳 大中黨事元好問

中立字湯臣岢嵐人博學強記問無不知少日治易
有聲場屋間家豪于財賓客日滿門所以待之者備
極豐腆其自奉則日食淡湯餅一杯而巳四十年喪
妻遂不更娶亦不就舉選齋居一室枯淡如衲僧如
是三四年乃出時人覺其談吐高濶詩筆字畫皆
超絕若有物附之者問之不言也間問趙公知平定
先生往謁之與之詩云寄語閒閒傲浪仙枉將詩酒

字字多

汚天全黃塵遮斷來時路不到蓬山五百年因言唐
世士大夫五百人皆仙人謫降中有為世味所著迷
而不反者如公與我皆是也一日來都下館於閒閒
公家中秋夜飲酒賦詩且就公索墨水一槃公如言
與之明旦不告而去壁間留龜鶴二字廣長一丈而
墨水具在不知以何物書之也朝士來觀者車馬填
壘都下競傳王先生仙去矣久之先生從外至問二
字以何物書之不答題詩其旁云天地之間一古儒
醒來不記醉中書旁人錯比神仙字只恐神仙字不

動

如先生平生詩甚多有醉袖舞嫌天地窄詩情狂壓
海山平之句他亦稱此人有問世外事者亦一二言
之好作擘窠大字往往瞑目為之筆意縱放勢若飛
聞開公甚愛之屏山嘗見先生商畧前代人物引先
儒論議數十條在目前如人人自相詰難然後以已
意斷之以為辨博中第一流人也臨終預尅死期如
言而逝州將石倫葬之忻州時年五十六予嘗從先
生學問作詩究竟當如何先生舉秦少游春雨詩云
有情芍藥含春淚無力薔薇卧晚枝此詩非不工若

以退之芭蕉葉大梔子肥之句校之則春雨為婦人
語矣破却工夫何至學婦人先生晚年易名雲鶴自
號擬栩云中州集

王先生予可小傳

元好問

予可字南雲吉州人父本軍校南雲亦嘗隸籍年三
十許大病後忽發狂久之能把筆作詩文及說世外
恍惚事南渡後居上蔡遂平郟城之間在郟城為最
久遇文士則稱大成將軍於佛前則諦摩龍什於道
則謝天玄俊於貴游則威錦堂主人為人軀幹雄偉

駟

元

家

貌亦奇古戴青葛巾項後垂雙帶狀若牛耳一金錢
環在頂額之間兩頰以青澀之指為翠靨衣長不能
掩脛故時人有哨腿王之目落魄嗜酒每入城市人
爭以酒食遺之夜宿土室中夏月或尸穢在旁蛆蟲
狼藉不卹也人與之紙落紙數百言或詩或文散漫
碎雜無句讀無首尾多六經中語及韻學古文奇字
字畫峭勁遇宋諱亦時避之人或問以故事其應如
響諸所引書皆世所未見談說之際稍若有條貫則
又以誕幻語亂之麻知幾張伯玉與之游最狎說其

所作詩以百分為率可曉者才二三耳題崧山石淙
云石裂震華清月秋蓋石淙之石皆狀若湖玉其高
有五六十尺石之文如蟲蝕木如太古篆籀奇峭秀
潤一一在潭水中親到其處知詩為工也蔡州北懸
壺觀仙榆云壺樹苔波月清皴醉後云一壺天地醒
眠小宮體云萬疊雲山飛小雁射虎首句云風色偃
貂裘即閣筆自戲云此虎來矣樂府云唾尖絨舌淡
紅甜又自戲云欲下犁舌獄耶和太白山詞云金盆
水不暖翠雀咏晴苔又云鳳蹴瑤華散龍銜桂子香

西瓜云一片冷截潭底月六彎斜卷龍頭雲烹茶云
簾捲綠陰花外月玉山水雪醉扶翁凌霄花云啼鳥
倒銜金羽舞驚蛇斜傍玉簾飛成錦堂樂府云鳳環
捧席帶香屏鯨杯倚伎和雲捲此類尚多人亦多贈
南雲詩者李子遷云石鼎夜聯詩筆健布囊春醉酒
錢麓真南雲傳神詩也壬辰兵亂為順天軍將領所
得知其名竊議欲挈之北歸館於州之瑞雲觀南雲
明日見將領自言云我不能住君家瑞雲觀也不數
日病卒後復有見之淮上者中州集

照了居士王或小傳

元好問

或字子文洛州人承安中進士資剛決不可犯為尚
書省掾知管差除與郎官相可否即棄官去往來登
封廬氏山中改名知非字無咎自號照了居士居山
中二十年布衣蔬食井田自親時人哀苦之而知非
處之自若也少日為文工于四六詩亦有功和二宋
落花韻四首云曾見嬌窺宋玉墻忽驚遺夢到延涼
聚塵非分侵凌玉流水無情葵送香錦鞮謾拖終隔
面綵灰雖吐若為腸蒼苔碧草無窮恨木石癡兒亦

紫

自傷可人未厭出鄰牆回首空殘翠幕涼好事只傳
懷夢草殊鄉誰致返魂香塵凝燕子慵開眼烟暗馬
冤空斷腸穠李絳桃俱異物為歌薤露寫餘傷綠影
浮空只自傷賞心死著未能忘瓊枝不解留春色銀
燭空曾照夜妝肺腑已傳蜂蜜盡肌膏仍與燕泥香
情知青帝回車日合有祥風老退房韶華終竟合凋
傷獻笑榮懷忍遽忘露壓不禁昏淚臉風披無奈醉
愁妝芳菲頓減園林趣狼藉空餘陌路香却憶班姬
浪辛苦一生都得幾專房既學佛作決定歌禪家以

為證道新豐之後無有及者初出京有詩云親疎俱
穩人倫了婚嫁齊成俗意周一筆盡鈎塵債斷都無
虧欠大家休休休休休愛著何時是徹頭風息浪平人
已渡笑携明月下孤舟崧山中云撒手寧論萬丈崖
脚跟未肯點塵埃東君也自魔君教著青紅眼底
來來何遲去何早二五不多十不少一聲柄木徧虛
空誰識堂堂真照了又贈安居士國寶云不招措大
嗔不喚王子文不惹禪和笑不名王照了他人怕人
嫌照了要人嫌人人有面樹有皮努力方便勤粧嚴

臺

粧嚴也由賢不然也由賢鼻孔莫遣他人穿又荅國
寶云幻人誰拙復誰能游戲何妨傀儡棚凡事不堪
君莫怪儂家面目得人憎又云忽然識破虛空我六
合縱橫更有誰正大壬辰叅知政事宗室思烈行臺
洛陽以知非有重名力致之使叅議事城陷不知所
終子升卿有賦聲早卒 中州集

宋進士李申之小傳

元好問

貞祐末行臺都尉南征獲武經進士李申之于盱眙
左右司郎中劉光謙達卿潤文官李獻能欽叔愛其

才辨欲活之以避嫌不敢也乃託以問事機令軍中
羈管之申之作詩贈主囚者云一飯感君無地報寸
心許國只天知明朝定作長淮鬼馬革仍煩為裹尸
又云胷中萬古橫鍾阜一死鴻毛斷不移又獻書都
尉云金國歲歲南侵計所得不能一二州而軍力折
耗殆盡今歲此舉亦曾慮人有議其後何以禦之乎
為公計者不若此南軍大舉斂兵而退雖屢出無功
得全師而返猶可自救不然師食彈困頓于堅城之
下讒間一行則公受禍不久矣某軍敗而死固其所

也乞于盱眙城下責以不降之罪以一死見處使人
人知之則都尉亦于名教有功書上之明日申之謀
道歸不果乃殺之欽叔說其臨刑回面南向欣然就
殺甚嗟惜之予謂申之曾中萬古橫鍾阜與王知非
烈日初心不敢謾皆烈丈夫語故附見於此中州集

金文最卷九十七

傳

無事道人董文甫小傳

元好問

文甫字國華潞人承安中進士為人淳質恬于世味
於心學有所得人知尊敬之而不知其所以得也子
安仁亦學道父子嘗閒居竇豐閉戶不出以習靜為
業朝夕不繼晏如也國華歷金昌府判官禮部員外
郎昌武軍節度副使正大中以公事至杞縣自知死
期作書與家人及同官又作詩貽杞縣令佐詩畢擲

筆于地以扇障面而逝有和太白山明和尚牧牛圖
詩刻石于洛陽其引云夫人有等差教分頓漸上根
之人一聞千悟不落階級中智而下必由漸進此人
牛次第不得不立心性動靜微妙有無學者所宜諦
觀也以人牧牛是動而有制從有以觀其徼也進進
而不已則漸至于回首馴服從無以觀其妙者也有
入于無徼及于妙固善矣又不如靜而無礙之為愈
也靜而無礙又不如兩忘雙泯之入神也若夫人牛
兩忘明月獨照恍然俱失所在當是時也吾將離形

去智神亦無功同于大通與道為一則向之人牛亦
筌蹄中一微塵耳吾儒所謂盡心盡性者無外于是
因借明和尚韻再下一轉語會心者必能知之詩不
錄中州集

薛繼先小傳

繼先字曼卿猗氏人少日三赴廷試南渡後隱居洛
西山中課童子學事母孝與人交謙遜和雅所居人
化之子純孝字方叔有父風容有詐為曼卿書就方
叔取物者曼卿年已老狀貌如少壯人客不知其為

曼卿而以為方叔也而與之書曼卿如書所取物付
之雖其家人亦不以語之也監察御史石玠子堅行
部過曼卿曼卿避不之見或言君何無鄉曲情耶曼
卿曰君未之思耳凡今時政未必皆善石御史一有
所劾則必謂自我發之同惡相庇他日并鄰里有受
禍者其畏慎類此正大末司農卿楊慥叔玉丞康錫
伯祿薦曼卿與汴人高仲振武陟宋可武清張潛磁
陽曹珏大名王汝梅隱操不減古人朝廷議授以官
以兵亂不果曼卿喜作詩工於賦物如松化石云瘦

見千年傲霜骨鍊成一片補天心時人稱焉壬辰之
亂病沒于宜陽仲振字正之系出遼東其兄領開封
鎮兵正之幼就舉選年四十後即以家業付其兄娶
妻子居嵩山於書無不讀而以易皇極書為業安貧
樂道不入城市山野小人亦知敬之王汝梅張潛從
之學三人行山谷間人望正之風袖翩然如欲仙而
未舉也張王說正之嘗遇異人教之養生呼吸吐納
日以為常靈氣時至安坐不動而骨節曼曼有聲恍
惚中時與真靈接對所談皆世外事既不以語人故

無得而傳潛字仲升有志節慕荆軻聶政之為人三十歲乃折節讀書太學諸人高其行義有張古人之目客嵩山從正之學易五十歲始娶妻妻魯山孫氏亦有賢行夫婦相敬如賓負薪拾穗行歌自得大用與之同業而生理優贍怜高張之貧時餽餉皆謝不受鄉里為仲升劓瓜田瓜熟仲升約中分之以償其勤眾不忍但小摘而去仲升亦棄瓜不收眾如約然後取食之嘗行道中拾得一斧夫婦計度移時乃持歸就訪其主婦之所居寺庄有兄弟分財致諍者其

弟指仲升所居曰我家如此獨不畏張先生笑人耶天興之兵避于少室絕頂時世已亂寇效暴橫無復人理仲升不甘與之處閉口不食七日而死婦隨亦投絕澗中汝梅字大用律學出身伊陽簿秩滿遂不出性嗜讀書動有禮法生徒以法理就學者兼以經學授之後生輩服其教無敢為非義者可字予之貞祐之兵其姑嫁大姓豪氏夫與子皆兵死而貲產獨在姑以白金五十笏遺予之予之受不辭一日姑得豪之味屬立為後挈之省外家予之置酒會鄰鄰且

謂姑言姑往時遺可以金可以橐氏無子故受之姑
今有子矣此金橐氏物非姑物也我何名取之因呼
妻子昇金出婦之橐氏鄉里用是重之大兵再駐山
陽軍中有聞予之之名者問知所在質其子使人招
之曰肯從我者禍福與公共之不然公之子死矣親
舊競勸之往予之不從曰吾有子無子與吾兒之死
與生皆有命焉豈以一子故併平生所守者而亡之
乎其後予之竟以無子死珏字子玉早歲有賦聲誠
實樂易世俗機械事皆所不知喜賓客疑於接物無

宏

書生氣習從之游者樂之而不厭也六人者喪亂後
惟子玉居弘州十二年乃終中州集

溪南詩老辛愿小傳

元好問

愿字敬之福昌人其大父自鳳翔來居縣西南女儿
山下以力田為業敬之自號女儿野人年二十五始
知讀書取白氏諷諫集自試一日便能背誦乃聚書
環堵中讀之書至伊訓詩至河廣頗若有所省欲罷
不能因更致力焉音義有不通者搜訪百至必通而
後已有一事關十年者由是博極郡書於三傳為尤

精至於內典亦稱該洽杜詩韓筆未常一日去其手
作文有綱目不亂詩律深嚴而有自得之趣性野逸
不脩威儀貴人延客敬之麻衣草屨足脰赤露坦然
於其間劇談豪飲旁若無人高獻臣為河南治中聞
其名引為上客及獻臣為府尹所誣敬之亦被訊掠
幾預一網之禍自是以敬之之名為諱絕不與交
不二三年日事大狼狽田五六十畝歲入不足一牛
屢為途胥所奪竟賣之以為食衆雖嗷嗷張口待哺
惟負高氣不能從俗俯仰迫以飢凍又不得不與世

有日
接其枯槁憔悴流離頓踣往往見之于詩元光初予
與李欽叔在孟津敬之自女兒來為之留數日其行
也欽叔為設饌備極豐腆敬之放箸而歎曰平生飽
食數每見吾二弟必得美食明道路中又當與老飢
相抗去矣會有一日辛老子僵仆柳泉韓城之間以
天地為棺槨日月為含襚狐狸亦可螻蟻亦可耳予
二人為之惻然敬之佳句極多如自怜心似魯連子
人道面如裴晉公萬事直須稱好好百年端欲付休
休院靜寬留月窻虛細度雲浪翻魚出浦花動鳥移

友 舍

枝之類恨不能悉記耳予嘗論敬之士之有所立必藉國家教養父兄淵源師友講習三者備而後可喻如世之美婦多出於膏腴甲族薰醲含浸之下閭閻間非無多色一旦作公夫人則舉步羞澀曾大家婢不如其理然也故作新人材言教育也獨學無有言講習也生長見聞言父兄也至於傳記所載西子乃苧蘿山采薪氏之女越君臣教之容止七日而納之王遂能惑夫差傾吳國豈常理也哉敬之落落自拔耿耿自信百窮而不憚百辱而不沮任重道遠若將

死而後已三十年亦可謂難矣南渡以來詩學為盛後生輩一弄筆墨岸然以風雅自名高自標置轉相販賣少遭指摘終死為敵一時主文盟者又皆汎愛多可坐受愚弄不為裁抑且以激昂張大之語從臾之至比為曹劉沈謝者肩摩而踵接李杜而下不論也敬之業專而心通敢以是非白黑自任每讀劉趙雷李張杜王麻諸人之詩必為之探源委發凡例解絡脉審音節辨清濁權輕重片善不掩微類必指如老吏斷獄文峻網密絲毫不相貸如衲僧得正法眼

徵詰開示幾于截斷衆流人有難之者則曰我雖不
解書曉書莫如我故始則入怒之罵之中而疑之已
而信服之至論朋輩中有公鑒而無姑息者必以敬
之為稱首蓋不本於教育不階于講習不出于父兄
而卓然成就如此然則吾敬之者真特立之士哉中

州集

李講議汾小傳

元好問

汾字長源平晉人系出雁門曠達不羈好以奇節自
許避亂入關京兆尹子容愛其才招致門下留二年

去之涇州謁張公信甫一見即以上客禮之自是游
道日廣然關中無一人敢與相軒輊者元光末用薦
書得從事史館舊例史院有監修宰相為之同脩翰
長至直學士兼之編脩官專纂述之事若從事則職
名謂之書寫特抄書小史耳凡編修官得日錄分受
之纂述既定以藁授從事從事錄潔本呈翰長平居
無事則翰長及從事或列坐飲酒賦詩一預史事則
有官長掾屬之別長源素高亢不肯一世乃今以斗
食故人以府史蓄之殊不自聊高張諸人率以新進

語

驅丞

入館史家凡例或未能盡知就其所長且不滿長源一笑故刊脩之際長源在旁則蓄縮慘沮握筆不能下長源正襟危坐讀太史公左丘明一篇或數百言音吐洪暢旁若無人既畢頷四坐漫為一語云有秉筆諸人積不平而雷李尤所切齒乃以嫚罵官長訟于有司然時論亦有不直雷李者故證左相半踰年不能決右相師公以傷風化為嫌遣東曹掾置酒和解之不得已乃罷尋入關明年駟數馬來京師日以馬價佐歡道逢怨家則畫地大數而去又明年恒山

公仙在鄧之西山長源往說之署行尚書省講議官既而恒山與叅知政事思烈相異同頗謀自安懼長源言論欲除之遁之泌陽竟為所害長源孝友廉介過人者甚多寧寒餓而死終不作寒乞聲向人人亦以此愛之平生以詩為專門之學其所得為尤多如洛陽才子懷三策長樂鐘聲又一年清鏡功名兩行淚浮雲親舊一囊錢烟波蒼蒼孟津渡旌旗歷河陽城長河不洗中原恨趙括元非上將才三輔樓臺夫歸燕上林花木怨啼鵲空餘一掬傷時淚暗隨昭陵

旌
歷

石馬前同輩作七言詩者皆不及也辛卯秋遇予襄
城盃酒間誦關中往來詩十數首道其流離世故妻
子凋喪道塗萬里奔走狼狽之意雖辭旨危苦而耿
耿自信者故在鬱鬱不平者不能掩清壯磊落有幽
并豪俠歌謠慷慨之氣此詩兵火中散亡今就其少
作予所能記憶者錄之

中州集

李戶部獻甫小傳

元好問

獻甫字欽用欽叔從弟也兄欽止欽若皆中朝名勝
家故將種而同時四進士人門之秀照映一時欽用

博通書傳於左氏及地理之學為精為人有幹局心
所到則絕人遠甚故時人有精神滿腹之日歷咸陽
簿辟行臺掾屬正大初夏人請和朝廷以馮子駿往
議欽用預行夏使有口辯馮善人無以折之往復之
際至以歲幣為言欽用不能平從旁進曰夏國與敵
邑和好百年今雖易君臣之名而為兄弟之國使兄
而輸幣寧有據耶曰兄弟且不論宋日曾與吾家二
十五萬匹典故具在君獨不知耶金朝必欲脩舊好
非此例不可欽用作色曰使者尚忍言耶宋以歲幣

解君家而賜之姓岸然以君父自居夏國君臣無一
悟者誠謂使者當以為諱乃今公言之使者果能主
此議以從賜姓之例敝邑雖歲捐五十萬某請以身
任之夏使語塞和議乃定使還朝廷錄其功授慶陽
提帥府經歷官尋辟長安令京兆行臺所在供須之
繁急于星火欽用所以處之者常若有餘縣民賴之
以安入為尚書省掾壬辰之兵奏充行六部員外郎
守備之策時相倚任之以功遷鎮南軍節度副使兼
右警巡使車駕東巡死于蔡州之難時年四十所著

詩書文號天倪集者留京師欽用死其家亦破非同
年華陰王元禮購得之幾有人琴俱亡之恨然則文
字言語之傳與否亦有數存于其間耶

中州集

司馬侍郎朴小傳

元好問

朴字文季溫公之猶子宋兵部侍郎以奉使見留居
于祁陽授以官託疾不拜遨遊王公之門以壽終文
季工書翰有晉人筆意興陵萬機之暇嘗購其遺墨
學之有雪霽同韓公度登圓福寺閣和李劬之詩今
畧載于此積雪日出杲雪飛梅已殘朋游要及時閣

鄰有遊觀乘此蕪穢平快覽天宇寬霽色混銀界曠
整連江千山如白毫相滉溢清揚端一氣轉浩渺萬
里皆瀟漫優哉賦梁苑想像排廣寒此下不可讀當
俟善本考之 中州集

滕奉使茂實小傳

元好問

茂實字秀穎姑蘇人初名裸徽宗改賜焉以太學正
兼明堂司令與樞密路允迪翰林脩撰宋彥通奉使
割三鎮太原尋奉密詔據城不下國相怒囚使人于
雲中欽宗北遷秀穎謁見涕泣請從行王者不之許

倚 類

放允迪彥通南歸茂實留雁門與兄宗正丞福字伯壽
淮南發運使倚共居久之家人至自汴梁秀穎往來
并代之間布衣終身臨終令黃幡裹尸而葬仍大刻
九字云宋使者東陽滕茂實墓士大夫哀其忠為之
起墳于雁門歲時致祭好問兒時先大夫教誦秀穎
臨終詩然亦僅能記末章數語而已庚子春自山東
還鄉里值鄉先生雁門李鍾秀挺求秀穎詩文鍾秀
云喪亂以來家所藏書焚蕩都盡避兵山中民家偶
於破箱中得秀穎詩一編紙已敗爛前序秀穎自作

愧

可辨者百餘字大畧言能安於死生之分而不能忘
感繫不平之氣又曰蘇屬國牧羊海上而五言之作
自此始予敢援以為例後叙是筆吏林泉野老秀古
年七十八手錄三膝始末號東陽滕秀穎鳳山思遠
記者詩數百首可讀者什六七臨終一詩缺三五字
而已非筆吏此集則秀穎之事無以見於世予意先
生名節凜然不吾人其文字言語宜有神物護持雖
埋沒之久而光明發見決有不可掩焉者因備述于
此亦使秀古之名託之而不腐云 中州集

通理何先生宏中小傳

元好問

宏中字定遠先世居雁門叔祖青出武弁任忻州兵
馬使因家焉祖行宣西遊遇先不返行宣之子子奇
子霖政和中中武舉高科子奇秉義郎武州宣寧尉
子霖忠翊郎守豐州安豐皆皆沒王事定遠子奇子
也幼僮儀觀秀整雅以奇節自許宣和末方賊擾
江浙定遠以太學武舉進士陳破賊三策徽宗褒諭
謂近日言事者所可比已而破賊如定遠策遂知名
宣和元年集英殿試策中第二調滑州韋城尉汴京

非

仙

非

報

被圍州郡多避走獨韋不下兵退統制武漢英奏辟
欽宗御札召赴軍前以路塞不果因請兵真定宣撫
司時副帥种師中兵已潰宣撫司檄定遠副漢英守
銀冶路既而太原破西路無完城定遠等提兵竝山
而東將赴援京師俄漢英戰死定遠收合散亡立山
棚七十四所號令所及千里而遠難食數月人不敢
相食詔以為武節大夫河東河北兩路統制接應使
是後國朝兵日盛所守唯銀冶一城而已帥府募人
生致定遠天會五年二月糧盡被擒大帥昭刺憐其

忠解縛授以官定遠投牒于地曰我常以此物誘人
出死力若輩乃欲以此嚇我耶帥嘉其不降屈又問
欲還鄉否定遠謀南奔陽以願歸為會監送使臣有
先與定遠相攻劫者懇之囚西京府君廟二年帥一
日召之授以官又不拜使之充軍亦不從取家屬填
城黃龍府益偃蹇不行帥怒褫衣欲斬之定遠忻然
就戮曰得死所矣擁之行已數十步帥終不忍召還
問爾授官不願充軍又不行填城又不行軒又不懼
畢竟欲何如定遠徐曰生死在公奚問為帥怒解繫

斬

之西京獄得州人保任者數十族乃放歸請為黃冠
時神霄宮廢道道士舊以徽宗為東華君將毀其像
定遠為起紫微殿遷像事之年六十三正隆四年病
歿自號通理先生所著成真通理二集藏于家州將
傅慎微幾先贈詩云故人何定遠造物不虛生骨骼
稜稜瘦詩篇字字清世皆尊道義我獨見忠誠尊酒
分攜後何時蓋復傾其餘與朱少章輩唱酬甚多皆
為所推重載之墓碣之陰中州集

醉軒姚先生孝錫小傳

元好問

孝錫字仲純豐縣人政和四年登科調代州兵曹國
朝兵入雁門州將議以城降官屬懼怯投死無所仲
純投床大斲畧不以為意帥府就注五臺簿未幾移
疾去因家五臺善治生亭榭場圃富於遊觀賓客日
盈其門州境歲饑出家所藏粟萬石賑貧之多所全
濟鄉人德之中年之後以家事付諸子放浪山水間
詩酒自娛醉軒其自號也資稟簡重喜怒不形于色
棄官時年二十九至八十三乃終名士大夫為詩以
弔者數十人先生長于尺牘所著雞肋集喪亂以來

年

止存律詩五卷而已今畧載于此次冠卿韻云節物
後先南北異人情冷暖古今同次趙獻之韻云紅纈
退風花著子綠鍼浮水福抽秧溪墅早春云久客交
情諳冷暖衰病骨識陰晴春日和德克云烟染綠絲
迷別浦雨催紅糝綴長條新詩云愁邊日晷偏疑短
夢裏江鄉未當歸盤無兼味慙留客夢獸多岐不到
鄉賦雪云酒敵餘威翻索莫詩含幽思倍清新雨云
岸漲魚吹沫山空石轉雷雪云舞風初學絮帶雨不
成花峯山寺云谷虛繁地賴境寂散天香雲生古木

元子

千章秀山抱晴川一掌平懷士會云詩忙疎酒醜俸
薄減厨煙感懷云玄晏算年常抱病子山終日苦思
歸古詩尤有高趣恨不復見之矣中州集

朱奉使弁小傳

元好問

弁字少章宋吉州團練使天會六年以通問見留命
以官託目疾固辭猝然以錐刺之而不為瞬用是得
歸凡居雲朔二十年自號觀如居士有曲洧風月堂
詩話行于世紹興十二年皇子生大赦宋使洪皎張
邵朱弁南歸中州集

金文最
遺然子趙滋小傳

元好問

滋字濟甫本出馮翊其祖貞元間來為南京漕司戶籍判官卒官下妻子不能歸遂為汴人濟甫少日出閭里間其曉音律善談笑得之宣政故家遺俗者為多及長馱于游蕩乃更折節取古人書讀之學書學畫學詩學論文立志既堅力到便有所得為人強記默識不遺微隱唐以來名人詩文往往成誦如目前考論文義解析脉絡殆若夙昔在文字間者画入能品詩學亦有功如黃石廟等作今代秉筆者或亦未

可輕議閒閒趙公書法為今代第一手學者多倣之但得其形似而已濟甫筆勢飛動頗得公不傳之妙宗室昨公文采風流照映一時而濟甫以布衣從之游商畧法書名画昨公亦以真賞稱焉陰德太一故宮樓觀臺沼門戶道路花木水石悉能歷數之聽者恍然如親到其處至于宋名賢所居第宅坊曲與其家行輩群從孫息媿姪排比前後生長鄰里者不加詳也嘗過長清一禪寺與僧談僧言五派傳授圖大不易作濟甫笑曰易與耳因索筆作圖坐中他日以

姻
雖

舊本證之不毫末差也丁酉歲歿于東平時年五十
九中州集

先大夫詩小傳

元好問

鄉先生權叅政事代郡楊公叔王讓先人墓銘今畧
載于此先生姓元氏字德明秀容人唐禮部侍郎次
山之後自幼讀書世俗鄙事終其身不挂口為人誠
實樂易洞見肺腑雖童子以言欺之亦以為誠然也
先大夫歿遺產無幾先生布衣蔬食處之自若家人
不敢以生理累之童奴有竊拾東家之棗者立命還

并

之貧人負債則往往令折券以貸之也累舉不第放
浪山水間未嘗一日不飲酒賦詩春秋四十有八終
于家先生作詩不事彫飾清美圓熟無山林枯槁之
氣居東山福田精舍首尾十五年東嶠其自號也有
集三卷藏于家銘曰貪夫狗財智士死名宇宙古今
萬轍混拜我機弗張我戶弗扃天宇泰然物莫敢撓
飲芳食菲岩岫杳冥玉佩瓊瑤御風泠泠魯山之醇
次山之清閱世幾傳猶有典刑邈哉先生明昌承安
間科舉之學盛大夫士非賦不談人知先人有聲場

察

屋間其以詩文為業則不知也先人捐館後十年好
問避兵南渡游道日廣世始知有元東岩之詩楊尚
書之美云彼美元夫子學通知觀瀾孔孟澤有餘曾
顏膏未殘林觀祭顯卿云文章變古名新體孝弟傳
家守舊規雷內翰希顏云詩句妙九州孝友化一川
王右司仲澤云讀書楓樹林曳杖白石灣至今文彩
餘虎子仍斑斑李長源云衣冠巢許自高雅岩壑變
龍非棄捐餘人不能悉記家集亂離以來凡三失之
今所存者特吾益之兄及門生輩所記憶者耳小子

十字元本不情爽
看後係查

俸

不暗于事機不能高蹈遠引戀嫪升十徽萬一以取
繁維之禍殘息奄奄朝夕待盡誠懼微言將絕謹以
古律詩四十首附之中州集之癸冊庶幾來者知百
餘年間作詩如先人而人或未之見其餘抱一槩之
操泯泯默默終老而無聞者豈勝計哉是又可深嘆
也中州集

敏之兄詩小傳

元好問

敏之諱好古性識穎悟讀書能強記務為無所不窺
年二十就科舉時先東岩公已捐館太夫人年在喜

君

金文景

元

杜仁傑

不空下因

懼望其立門戶為甚切及再上不中意殊不自聊又
娶婦不諧日致惡語遂以狷介得疾嘗作望月詩有
莫怪更深仍坐待密雲或有暫開時之句人或言詩
境不開廣非佳語也歎曰吾得年不永境趣能開廣
否未幾没于北兵之禍年三十一中州集

真靜崔先生傳

元好問

先生姓崔氏諱道深字元甫觀之蔭口真靜其號也
賦性雅質無俗韻嘗讀三教書洞曉大義識者以為
載道之器事父母以純孝聞廬墓三年去家

襲
叶
迺

在
掃
迺

為道士師東海劉長生是得其傳頃婦將陵之韋家
柴卜棲焉假醫術執所謂積善之基富貴者無取
貧窶者反助所給是以四遠無夭折人咸德之粗
土王彰嫉是必欲致之死地而後已一日與先生遇
諸廣輒挽襲偃仆以凶封厥吻而去之彰以為死矣
少之復甦過者驚問狀曰我疾作爾如是後亦不復
芥意居無何弟子劉志口口請布金山昊天觀居焉
邊人揚涓畢琳意拙有所詰約以仲冬來過是不
至時大雨雪畢因擁歸家庭間獲片楮開看爾先生

筆
俗

天
頂格寫

讓二子寒盟之章也復有橫山馬志定路志亭事先
生有日矣將去以詩為贖扁諸所居之堂留詩宛然
留壁間如新染翰者其神異有類如此當負祐做擾
挺身南渡因僑執之純陽觀駐宿未幾履滿戶外
越興定辛巳八月廿九日端坐南向而逝恬壽八十
有一凡先生平生所為所行所得唯門人郝志堅獨
具其體云贊曰
贊曰天口所貴乎得道之士者時其口來順其所去
而已矣非直以乘雲氣跨箕尾解水火遺冠為導

以幡幢殿以聲樂然後以為昇天之證吾讀一列仙
傳涉此說者是助夫古之隱者深山窮谷中恬然委
蛻閱千百載而下不知其幾千百人不幸不為世所
知至於泯滅而無所傳幸而為好事者紀錄而又過
神其事俾後世不能盡信惜哉吾復逆揣隱者之心
恐不如是汲於駭一時之觀聽也如先生則不然不
內不外非有非無吾以為黃耶其教戒精嚴有過
乎釋氏吾以為緇耶其業履孝悌又出乎先儒將前
聖之萬法輒混而為一區間者遺馬路以燎垣之頌

物字府字
楊

也

楊名關

此文刻錄太息

飛

墮一物畢以雪庭之書游戲乎三昧此亦一豈先生
之本一心歎要之以慈儉禮讓為立身之本以詩
書語孟為教人之符及其一逝兀然一端坐如宴
居浩乎同造物者游悠乎將元氣者歎與俱是以息
綸一出名一隸清都號曰真靜不亦宜乎 石刻拓
本

白雲菴大論師義公傳

元好問

濟南素號佳山水距府城三十里因龍洞名者奇秀
為衆山甲層峯峭拔上凌雲霄諸口雄勝之所置精

舍曰口聖游觀愛戀不忍捨心快氣爽若超出塵外
予謂此口口口常人居之乃為口口口果然有
大論師名宗義者俗姓楊氏隸人童真梵行樸古口
口口口元祐三年師口口口為僧欲叅了義
游東西二京者歲六周後知濟南口口和尚大口口
口口依口口口口口口口口口口口因明論
古口口論口竦動郡口來咨叩請謁者肩相口口口
口口口口口口而口岑寂口口年壽八口主僧
口口讓山葺口口口共口口口若口口口喜其幽邃

清曠為雲口終焉之地口口口口口口口口谷口
口口口口口口口口舉佛事為四口口口口已贊
建寧堵波名曰報恩又為口口口口素口口口口
為口口口五小口口淨域是日也口口清朗人情勸
怡無口口口作口口口口吾今身已口口口口於
古口口口口口口口附口今口口口口口口八十
報口口口口請師二十負口口口口口口口口
口口口口口口口口口口口口口口世諸佛口
印口口十方賢口皆口敬口口口口口口口口口口

接連寫下同

口口口將來口口口口口世隱口口三十年八十無
口口口口口口口口口口口口口口蒼龍遶口口口
口口口口口口口予檢聞師言又得實口口州龍興寺
華口院口口口口口口口口口口口口口口著之
名口口流輩聞風口口口口口口口口德樂道人以口口
口口口口口口口口口口口口口口師口口口請口口
人也下闕

濟南府章丘縣鄉貢進士穆下闕
皇統癸亥歲四月晦日 石刻拓本

步於百尺竿頭茲緣緇素之依歸有請省廷而允可
唱少林之曲調踞靈巖之道場信堂堂龍象之姿赴
肅肅人天之會白雲堆裏不妨依舊經行碧眼胡邊
無惜斬新拈出永洪睿算廣震潮音謹疏皇統九年
八月日疏 石刻拓本

靈巖寺滌公開堂疏

失名

今請滌公長老住持濟南府十方靈巖禪寺為國
焚修開堂演法祝延聖壽者
竊以達磨不西來孰能薦祖盧公既南渡始見分枝

雖無毫髮示人要在承風取證例開法施各踞名方
厥有濟南靈巖佛寺利洽鄒齊襟吞兗魯二百年叢
林浩浩三千里香火憧憧飛閣蓮宮粹容金界不期
偉匠焉振宏綱伏維滌公長老守文三代接武四禪
應歷下之機緣續方山之勝跡踏遂使白蓮真跡無根
而鬱鬱騰芳青社餘光不鏡而綿綿照世正好高提
祖印獨步大方祝吾皇萬載之昌圖繼古佛一乘之
慧壽謹疏大定二十三年九月日疏 石刻拓本

請照公和尚開堂疏

黨懷英

謹請照公和尚就濟州普照禪寺陞座為大眾演
法上祝聖壽者

竊以千百億佛同證妙明二十五輪俱修圓覺正真
既立語默自融而馳求者將頭覓頭演唱者以指喻
指世道交喪源流益微故對病用藥須賴良醫而運
斤成風必歸善斲不離於坐乃有當仁照公和尚臨
濟真宗晦堂嫡派從虎須邊得法向饅頭下承機宗
說俱通性空雙泯現莊嚴王作佛事開漚鉢門為道
場有為而未嘗為常任而無所住陽春白雪久閱妙

音明月清風獨游勝境不露作家手段誰提古德心
宗而况祇陀樹自有餘陰優曇花難逢一現今則師
祖推出叢林聳觀雖堂下從來草深而戶外行將屨
滿休慳一雨普潤諸方振揚最上佛乘仰祝無疆聖

壽謹疏明昌六年二月日疏

石刻拓本

請琮公禪師住持淨因禪寺疏 失名

敦請琮公長老禪師住持魯山縣淨因禪寺為國
開堂祝延聖壽者

伏以無始以來只笑他人異處有古而下不知大事

因緣紛紜末世邪宗汨沒眾生正見十方幻化莫辨
寶華三界虛空誰分影響伏維琮公長老禪師具正
法眼起大悲心再揚曹洞之宗風復繼淨因之祖業
况昔年清社備嘗為眾求仁今日魯陽何必藏頭露
影既副傳衣之囑居當報國之恩好將本分鉗鎚拈
出希奇手段無勞謙德佇聽潮音謹疏泰和二年九
月日疏 石刻拓本

請淨因堂頭禪師琮公疏

失名

今請淨因堂頭禪師琮公為國拈香開堂演法上

壽

祝聖歷無疆者

伏以古錦含春不犯機核之事劫壺空外寧涉造化
之功欲明此段因緣須假英特之士琮公長老操志
孤標已具凌雲之氣遊方參叩蓋存立雪之心既然
得處分明行履不妨穩密烏雞半夜啼開月窟之門
白馬奔嘶相口蘆花之色閒弄金梭玉線綴成無縫
之衣更看木女石人唱起胡茄之曲好箇天然格調
堪酬佛祖之恩宜拈一瓣之香仰祝聖人之壽請示
現前三昧正當演法開堂無煩再四遲疑願作神通

游戲謹疏大安三年月日疏石刻拓本

請印公和尚開堂疏

謹請印公堂頭作寺山住持為國開堂祝延聖

壽者

伏以法有無邊之義均度有情佛開不二之門動歸

真諦故能仁以有為闡教達磨以直指明心末法以

來開士稀有行阿師笑禪為空寂猶頭參容謗教

為思維干戈支持山牖自開瓶山釵釧山稱異金酥

酪醍醐各誇一味聖雖時遠道待人宏敬惟印公堂

頭幻歷講筵長參性理其饒益足以資後學其談辨

足以應無窮鄉里之所歸依天龍之所回向而况道

遙字宙福田本羅什譯經之場實定慧談空之境山

違眾欲或墜家風眷圭峯一帶林泉竟山為主而曹

溪千載衣鉢山絕山願振一音俯矜再請謹疏元

光二年二月日疏石刻拓本

趙子容之河州贈行糾疏李俊民

適齊而請難為繼富之周在宋者辭宜有遠行之贐

且聞大夫之無者貸豈惟君子則贈以言矧夫易足

五

之廉望有肯來之惠

莊靖集

顯真觀重修三門疏

李俊民

昔年樓觀之居幾成而壞今日煙霞之侶既往復來

相與合謀共圖起廢今則度材計費鳩役募工尚虞

經始之難須借贊成之力敢希信士同結勝緣

莊靖

集

請楊仲顯同任神霄宮疏

李俊民

伏念 白首鶴經頗愧山陰之士青雲鶴駕望來華

表之仙某夙業琳宮近經灰劫所願煙霞伴侶風月

閒人共堅宏道之心庸敢棲真之地伏惟先生主張

宗教壯觀元門雖所樂者巖居亦何妨於市隱當如

修靜暫辭蓮社而來那在季真更乞鏡湖之賜幸無

固拒曲示光臨

莊靖集

請寶泉因長老碧落開講疏

李俊民

一把蓋茅便是開山之祖九年面壁並無立雪之人

不舉話頭曷傳心印伏惟堂頭和尚開花震旦雷震

叢林每笑古靈放光不許豐于饒古宜示諄諄提耳

之誨以破昏昏無眼之禪行處道場誰非法器寶泉

曲豆干

放

巖下拈起拄杖便行碧落雲間放下鉢囊且住宜無
多讓少振家風 莊靖集

留請因老住持碧落治平院疏 李俊民

五葉開時不昧栽松之境一庵破後忽來結草之人
但恐緣疎豈求且過隙光難挽講席易終方悵悵乎
法中之王何屑屑乎桑下之戀當須摩頂授記何在
擺手便行發藥叢林復萃鉢瓶之衆主張教闕載揚
鍾鼓之音少屈高懷俯從衆望 莊靖集
請雲長老開堂疏 李俊民

竊

竊以團團坐上共話無生煩惱林中便覽重悟方悵
達磨去後卻嫌彌勒生遲試拈一瓣之香為闡三乘
之教伏惟雲公長老機峰峻捷戒行孤高曾向維摩
問禪不許丹霞下著以一則語振祖師將墜之風於
萬斯年祝聖主無疆之壽早陞法席佇聽潮音 莊靖
集

開元寺重修經閣疏

李俊民

劫火騰空忽碎雨花之界業風蕩地漸摧龍藏之基
不救其危將歸於盡欲復翬飛之勢必須鳩儻之工

邱

見義則為當仁不讓量財助役施雖毛髮之輕隨喜
結緣行若立山之積敢希善衆共啟誠心樂贊其成
有光於後莊靖集

張村寺為佛寂滅設齋疏

李俊民

下

驚

十方蘭若久為灰劫之塵六祖叢林未覩花開之兆
達磨歸去後彌勒上生遲雖鐵石人皆有向道心於
瓦礫中誰是說法者因緣佛事舉似家風暮鼓晨鐘
敬破龍蛇之地千山萬水喚回瓶鉢之流莊靖集

史正之酒疏

李俊民

旨

伏念君子有酒既多且止衆人皆醉奈何獨醒可以
忘憂速宜就飲聊共孔文舉之客坐莫聽劉伯倫之
婦言惠然肯來永以為好莊靖集

燕子和重脩陽城縣廟學疏

李俊民

窺
仁咏
能修泮宮魯美僖公之化不毀鄉校鄭高子產之風
天未喪文人能宏道本縣文宣王廟梁木將壞俛墻
未規牧兒為薪刈之場童子無咏歸之地思與衆共
期于一新是皆好事者為之未見有力不足者當人
莫讓同氣相求庠序未遑久仰詩書之治弦歌不絕

復還禮義之鄉莊靖集

陵川縣重脩廟學疏

李俊民

壞

大成教立其尊百世之師釋奠禮行敢怠二丁之享
今則仞墻毀廟貌無依雖漢之庠序未遑在魯則弦
歌不絕大凡被三遷之教者有能用一日之力乎得
助者多圖成也易梁其壞矣第形安仰之嗟學果廢
邪能免不修之刺儻蒙許可請惠好音莊靖集

本州廟學築墻疏

李俊民

學久不修幾廢大成之教廟雖如故志摧萬仞之基

所

時然後興文斯未喪自行束修以上者豈無一簣之
往馬斯助者多其成也速敢希同志共力鳩功莊靖

集

段正卿西學請劉漢臣疏

李俊民

鄭校不脩舉是在城之子鄒館既假悉為受業之人
須鳴其待問之鍾方鼓此入學之篋漢臣殿元先生
吾黨領袖士林範模凡一卷而立之師不三年而至
於毅行束修以上者就有道而正焉春暮風雩未遂
詠歸之志秋涼燈火會看同隊之親無倦發蒙當請

所

王善莊靖集

李君卿藥局會疏

李俊民

秦緩未來罕悟膏肓之疾孟孫猶在復何藥石之憂
生不可輕命由所養固嘗媿扁鵲之先見豈徒望叔
敖之陰功細詳肘後之方共濟籠中之物用雖一粒
重若萬金知伯休之價乎守之不貳受康子之饋者
違則敢嘗 莊靖集

張伯宜藥局疏

李俊民

朱精所業猥叨三世之醫欲濟人於賴有萬金之藥

云

豈示小補非敢自私 莊靖集

李德方畫十王糾疏

李俊民

善惡兩途難逃陰責幽明一致各有司存生而上柱
國之榮死則南面王之貴不寫尊嚴之像曷伸夤奉
之誠尚賴同心共求妙手 莊靖集

葬枯骨疏

李俊民

禮備後人奚取衣薪之葬序迎春孟正宜掩骼之時
况久慘于毒痛尤不堪其暴露可為矜恤當共瘞埋
庶為亡魂一同薦拔 莊靖集

金文最

金文最
葬枯骨疏

李俊民

禮詳月令其垂掩骼之文辭按離騷尤重招魂之些
蓋所哀者民命其可後于天時爰收暴露之遺俾及
厝安之兆且希同志共贊陰功

莊靖集

抄簡疏

李俊民

浩浩玄宮密運資生之化冥冥長夜良多不返之魂
未知所依是誠可憫爰軫薦修之念但無幽贊之人
與我同誠畢茲能事

莊靖集

李俊民

抄紙疏

焚紙錢而祭唐之遺事用紙衣而葬周之儉風習以
為常俗莫能易然念鬼神之感豈求享祭之豐不腆
冥財曷伸哀歎庶能周恤須賴勸緣

莊靖集

抄經疏

李俊民

譯而為經作者為聖豈惟貫道之器是亦升天之階
將有事于靈壇可不資于精業仍希善衆共積陰功

莊靖集

陽城縣楊敬之重修太清觀四聖閣疏

李俊民

歸

奕奕靈宮爰啟棲真之地巍巍重構忽搖經始之基
不救其危將歸于壞本觀四聖閣者光揚道域威護
法門歷歲月而漸深因風雨而就毀欲復翬飛之勢
方圖鳩僦之功莫不聞風而悅之多見得道之助者
宜堅信向同結勝因香火緣中載肅太清之境鼓鍾
聲裏一新華夏之音莊靖集

段正卿請講師孫仲遠疏

李俊民

初罹多故長昧大方雖存耻過之心未有投誠之地
不依法履曷薦愚衷伏惟提點大師洞觀元機表儀

羽衆謂此道善於利物况其力可以回天咸仰登壇
無辭枉駕倘垂惠肯何幸如之莊靖集

喬舜臣酒疏

李俊民

百年能得幾時斗酒可以自勞好向幕天席地縫意
所如免使明月清風笑人不飲况直麴蘖事了何妨
指點索嘗肯令坐上之尊空不比街頭之價貴一時
勝友共醉新醅莊靖集

穎陽鎮修宣聖廟疏

李俊民

欲復漢庠雖在未遑之際當思鄭校常存不毀之心

席

宏

歸采

備

念道實在於人弘文豈由乎天喪今茲穎士不負孔
門舞雩而有詠歸之風在城尚多挑達之子欲擇私
芹之地重修釋菜之儀備禮執經得從茲而北面連
年取第庶不減於西城莊靖集

忻州修學疏代郝侯作

始定終綏守文之期式遵有教無類作人之効可徵

言念吾州久崇廟學傳侯完復於天德小康之際

字

名慎微要公增築於大定承平之時

位之高明副師儒之嚴重華表俯窺於雙鶴廟學下有雙鶴

觀連岡雄鎮於九龍學在九龍最上弦歌絕井邑之譁章

甫易弓刀之舊孫內翰之科名相踵孫名九鼎字國初狀元郡

人姚隱君之文石具存學記醉軒先生所作名不圖

劫火之餘遽有園蔬之嘆願慙小已猥守大藩方舉

廢之是圖亦少文之當變昔魯僖以泮宮發頌齊宣

由稷下垂聲不能廣廈以庇賢良媿萬夫之觀政况

乃玄壇竝峙佛屋載新開檀施於奔馳戰效之場化

金碧於頽盼頻呻之頃何私有百神之秩而公無二

仲之祠既責任之有歸豈經營之敢後下車修庠序

元

顧

顧

歸

金文景

竊

宏竊

歸

之教猶竊恨其違扶杖思德化之成夫何遠之有孰
相茲役我懷其人遺山集

清真道院營建疏
元好問

奉為本庵欲創聖位以為焚誦祝延之所其工費有
賴弘持謹投諸方上善共締清緣者竊以像設嚴真
儀之奉齋厨維淨侶所安祝贊有歸功緣為大方經
營之伊始宜助藉之相先凡我同人幸垂一諾謹疏
戊申六月日遺山老人疏遺山集

請太一宮提點李大師住天封疏

元

襄

元

元好問

太室蕙衡霍之秀天封維僂聖所廬劔飛而古柏仍
存石潤而仙蒲未老孰為真隱再暢玄風揚潘馬之
徽音續覃劉之正脉李公大師源分渦水名動漢庭
靜一得精微之傳冲退為衰薄之鎮惟望拜之祠既
舉而司真之治方虛敢因黃鶴之書敬促青牛之駕
壁門金闕瞻星漢以非遙玄都石壇佇嵩呼之復振
善哉行矣今正是特遺山集

興國院改律為禪請住持疏二首

元好問

軌轍交馳塵勞先起皮毛盡落真實具存星河同是
一天淮濟更無別水談空說有何妨捩轉話頭指東
畫西究竟不離當處眷茲興國初議安禪誰堪選佛
道場來舉開山公案集公清風匝地滿月當秋不甘
北覲之鈴錘自得壽寧之衣鉢僧嗣壽寧月光明既露難
擬蓋藏賓主相諳共為推挽雲山改色鐘鼓同聲暫
從華表之游盡革青氈之舊法筵龍象同歸佛祖之
權大地山河永祝南山之壽善哉行矣今正是時

歸

福慧兼全萬為希有人境相值一變從新載惟祖父
之田園遠歷隋唐之歲月透龕仍在露塔相望雖齋
鼓粥魚粗供朝夕而樹林水鳥未極幽閑幸我賢侯
特紆深眷謂打地之清風未遠而開門之勝概空孤
變遷既異于古今授受寧論於甲乙誰其作古自有
當仁固知不出當家終亦難逃公議月輪桂樹斬新
別出一枝佛國旃檀何暇更求他木某公清標孤峻
道照虛明袖裡圈繩穿透向上諸人鼻孔林間几席
坐斷天下衲僧舌頭既為大事因緣化身合與末法

斷繩

衆生援手自教自禪之已竟誰賓誰主以何言勿云
鶴戀舊巢自是龍行故道高提正令行十三八糖之
權永為皇家延百億萬年之壽無勞擬議便可承當
遺山集

曹子歸葬疏

元好問

松柏歲寒莫重死生之託金蘭天屬亦有急難之求
久要不忘交情乃見通甫曹君牧之風調張祐才名
誰謂雍容閑暇之平生而有零落棲遲之暮景風霜
十月身去國而不歸蓬藿一丘事蓋棺而未了且行

歸邱

船

路有匍匐之救豈徒哀無賙賻之文凡我同盟忍忘
斯義城旁冢地何如溫序之鄉閭汴上麥舡會有范
家之父子遺山集

金蓮社開明疏

竊以慧燈永照須憑玉葉之光性燭長明決得金蓮之耀內沐三光
之秀外消四假之名步虛躡空探玄搜妙洗來瑩淨之鄉出入芳馨
之路各懷珠璧共捧瓊瑤顯要全神須令養氣清通斯訣請掛芳銜
重陽全真集

玉花社疏

王嘉

竊以玉花乃氣之宗金蓮乃神之祖氣神相結謂之神仙陰符經注云
神是氣之子氣是神之母子母相見得做神仙起置玉花金蓮社在於西
州務要諸公得認真性不曉真源盡學旁門小術此是作福養身之法並
不干脩契之道脩性命之事稍為失錯轉乖人道諸公如要真脩行飢來
吃飯睡來合眼也莫打坐也莫學道只要塵俗事屏除只要心中清淨兩
個字其餘都不是脩行諸公各懷聰慧每日齋場中細細省悟庶幾不流

下接金蓮社開明疏

金文集
落於他門行功乃別有真功真行晉真人云若要真功者須是澄心定意
打疊神清無動無作真清真抱元守一存神固氣乃是真功也若要真行
者須是脩仁蘊德濟貧拔苦見人患難常行拯救之心若化誘善人入道脩
行所行之事先人後已與萬物無私乃真行也伏願諸公早垂照鑒重陽
全真集

金文集
卷九十九

雜著

秦寧宮鐘款 秦和六年

竊以將崇至道敢忘神宇之修欲振真風須假鯨音
之作故鳩哲匠用鑄洪鍾縻金索以高懸建寶樓而
迭擊庶使群迷聞至音而開覺抑令滯魄仗餘韻以
超升伏願集此善緣仰增聖算時和歲稔國泰民安
普暨一切有情莫不均蒙福利 金石萃編

僧尼度牒

王寂

邱

右伏以聖時遭際梵教宏揚方治具之畢張宜法輪
之常轉以爾拈花授記刻草逢師既得度以比丘身
當求證于菩提果護持戒體精進道心往憑香火之
因緣增祝君王之壽算 拙軒集

道士女冠度牒

王 寂

範圍至道衣被含生太和薰靈寶慧香多暇適希夷
真境以爾脫離世網攀慕仙梯諷藥笈之元文佩金
壇之秘錄損之又損優游踐黃老之言純乎其純請
淨贊唐虞之治 拙軒集

清

協

擬元稹長慶新體戒諭

趙秉文

余新即大政承元和師旅之後軍國庶務有所未明
尚賴股肱元輔文武庶僚同寅戮力叶贊太平之功
如聞有司罔克勸相翫歲愒日習以成風因循者首
歲月以養資罷懦者託疾病以廢庶爾既若此余何
賴焉爾尚明時余言用乎汝聽掌刑者無以私情破
公法俾有寃抑之情典選者無以小節妨大務俾有
留滯之歎掌計者出納之吝固防濫予取不以道亦
傷吾民無縱哀刻俾有流離之嗟曰諫官御史汝惟

耳目其有大利害具以聞無毛舉細事以塞責曰守
令兵役之後吾民甚苦無怠撫養無為姦賊曰採訪
使敢奉察吏是汝之責汝其察吏治以催科為名律
侵漁者曰將帥汝典戎律勗爾偏裨傲爾師徒殄殲
乃仇以以復我高祖文皇之境土爰暨將校汝皆功
臣之後無忝爾祖考其尚蹈果毅無敢冒我糗糧無
私彼爾卒伍無與親民之官妄分彼此且我列祖暨
乃祖乃父胥及逸勤勲在王府以有此境土共享太
平之福相在小民尚不忘累聖涵養之恩况我有官

營

君子世受厚恩身被厚祿營已自私獨不為朝廷惜
乎嗚呼厥亦惟我憲考賞明罰公眾職修理成法具
在我其敢弗率爾尚一乃心敬乃事厥有成績朕不
汝吝其或弗欽邦有常刑朕不庸釋治業赴功可不
勉歟

澧水集

詠歸詞

趙秉文

歸去來兮風乎舞雩詠而歸既勿忘而勿助抑何喜
而何悲時未來而莫領事既往而為追化新新而不
停習念念而覺非譬已飢而方食孰既寒而忘衣無

顧

一毫之私意信天理之精微我思古人矐乎若奔仰
驚前軌游心聖門習矣而察探之斯存坐見于興飲
見于樽利何為兮樂蹈善何為兮孔顏匪義路兮焉
由匪仁宅兮孰安嚴三省以日儆防六欲而常關戒
屋漏以慎獨尚衣衾而中觀存夜氣之牯亡收放心
而知還漸雲開而霧廓俄鳶飛而鯢洄歸去來兮請
從沂上之游娛曾點之舍瑟終不慕乎由求既盡心
而不貳亦樂天而何憂天地均仁于萬物播一氣乎
郊疇陸有不澤水有方舟野陽浮兮藪澤光風泛兮

林邱草漸漸而茁長水源源而交流觀物態之熙熙
廓予懷之休休已矣乎力天力兮時天時我初無將
亦無留捨聖道兮將安之存心以養性守死以為期
慮道學之荒蕪遂日耘而日耔廓七篇兮孟訓詠二
南兮周詩會天人而一貫窮理盡性吾何疑 滄水集

焚驢志

王若虛

歲己未河朔大旱遠邇焦然無主賴鎮陽帥自言憂
農督下祈雨甚急厭禳小數靡不為之竟無驗既久
恠誣之說興適民家有產白驢者或指曰此旱之由

也雲方興驢輒仰號之雲輒散不留是物不死旱胡
得止一人臆倡衆萬以附帥聞以為然命亟取將焚
之驢見夢于府之屬某曰寃哉焚也天禍流行民自
懼之吾何預焉吾生不幸為異類又不幸墮于畜獸
乘負駕馭惟人所命驅叱鞭箠亦惟所加勞辱以終
吾分然也若乃水旱之事豈其所知而欲寘斯酷歟
孰誣我者而帥從之禍有存乎天有因乎人人者可
以自求而天者可以委之也殷之旱也有桑林之禱
言出而雨衛之旱也為伐邢之役師興而雨漢旱卜

宏 救

甚

愛

武請烹弘羊唐旱李中敏乞斬鄭注旱之術多矣盡
亦求諸是類乎求之不得無所歸咎則存乎天也委
焉而已不求諸人不委諸天以無稽之言而謂我之
愆嘻其不然暴巫投魃既已迂矣今茲無乃復其殺
我而有利于人吾何愛一死如其未也焉用為是以
益惡濫殺不仁輕信不智不仁不智帥胡取焉吾子
其屬也敢私以訴某謝而覺請諸帥而釋之人情初
不憚也未幾而雨則彌月不解潦溢傷禾歲卒以空
人無復議驢 淳南集遺老集

金文最

五

虛

詞

而顧罹

月

哀雁詞并序

王若虛

昔予居故人安仲和家將殺雁食客見而不忍為
其作哀之之詞今三十餘年矣近讀趙公誠殺生文
有動于心因追錄之以附其後雖文采不足觀者
取其意可也

鳥之遠害宜莫如鴻浩浩長風寥寥遠空邈乎冥濛
去萬里無窮顧乃不幸而網雖之中刀机是委饕殮
是充嗔嗟乎其恫爐且熾鼎且沸宰夫礪忍而欲前
坐客垂涎而思噬而猶神意自若低回睥睨不知禍

保
割

知

業

期之行至可不哀邪捕者伊何貪于貨鬻用者伊何
悅乎口腹我利我欲物罹其酷是以知人雖有生之
至靈而亦其至毒也高而林莽深而川淵遠而窮邊
裸鱗介羽胎卵濕化皆有以致之而陳乎其前割割
鬻膾蒸燔烹煎濯腥滌翔窮甘極鮮一邑之內一朝
之間已有不可勝言者矣人亦嘗以已而推之乎一
毛之去皆知惜寸膚之損皆知病所以自待如此其
至也而獨于物不為之少憐雖吾之智力可役而君
之而彼之蠢愚至死而不能訴然其賦形稟氣同得

孰
慘

誠
業

于天故亦未嘗不苦則慘而樂則舒惡天關而重生
全奈何暴珍不恤以為當然孰恤其寃懲其愆豈天
有厚薄固以彼而奉此乎抑初無所主而自生自殖
自攘自擊勢强者勝而專不然何其太偏也庖厨之
遠君子以為仁已既不忍則假手于他人夫其畏怖
之情敲斲之悲可以想而知也何必見之之素臨之
之親聞之曰物我類也類無分別滋味之在我可賒
性命之于彼極切至哉言乎即是佛說亦何必持乎
識律推明罪觀地獄之變相指刀兵之凶劫人惟為

饒舌之所謾是以安為而不屑嗚呼戒之敢告來哲
潯南遺老集

李氏家譜

李俊民

按大唐天潢玉牒顯帝之後生大業大業生媧媧娶
有喬氏之女感月光貫昂而生咎繇咎繇生伯翳伯
翳之後世為士師至里成避桀之亂遷居伊侯之墟
食李實乃改為李氏此言咎繇之後以理獄為功遂
姓理氏其後子孫或改里氏至伊侯之墟避難遂改
里為李也成生利正當商湯之時利正生昌祖昌祖

李氏家譜

二

仕陳為大夫因居苦縣昌祖生明明為陳相英瀨鄉
之北立廟因有相城明生慶賓慶賓生靈飛一名慶
謂所言陳國乃古之陳國非周時所封胡公滿之國
也自李成至虔會五世相承年代相類當此之時太
皞之後已為陳國及周封舜後當是此陳既滅乃封
胡公而王其地也靈飛之妻真妙玉女感日精之夢
而生老君此一說也又按本記云老君生而能言指
李木曰此我姓也隋內史舍人薛道衡老君祠庭碑
云感日載誕莫測受氣之由指李為姓未詳吹律之

彰

印

本是也又棲觀祖師傳云老君因聖母攀李木而生
謂曰此汝姓也三家之說經傳備載之今並明之以
彰聖人之宗緒矣至紂王時居岐山之陽西伯命為
守藏史武王克商名為柱下史其子名宗仕魏為將
軍有功封于段于宗之子注注之子宮宮之遠孫假
假仕漢孝文帝假之子解解為膠西王叩太傅因家
於齊風俗通云李伯陽之後出隴西趙群頓邱渤海
中山襄城江夏梓潼范陽廣漢梁國南陽十二望唐
高祖淵二十二子其韓王元嘉守澤州武氏盜國宗

瑩

之

構

室潛謀恢復事露皆被害妃房玄齡女妃亡四子於
 碧落聖佛谷追薦母氏黃公譔善篆磨崖碑存焉其
 後裔孫因家于澤或隱或仕宋初李植字彥材熙寧
 間中武舉科隨范文正公西征官至右侍禁墓誌云
 葬于澤州晉城縣五門鄉從先瑩也三子持構授高
 祖李憲之忘其所出生曾祖猷猷生祖行可行可二
 子長子邵次之才之邵一子曰楫楫子六人長儀應
 進士舉恩榜二子亡有女在北弟馬興男閏即在餘
 亡之才三子長植次構次俊民字用章植三子曰挺

裔

曰搗曰振挺男世英謂南馬鋪監沒王事搗謀謙甫
 進士第一科孟津機察男世寧監福昌酒構洛陽茹
 店商酒監男鐵塊女蓬仙在北俊民男揚伊闕商酒
 監楊一子道兒甲戌兵火值甲午二十餘年間皆物
 故矣獨閏即在楫之孫也二子皆幼為李氏之胤癸
 卯年四月初一日丁未譜莊靖集

龜鏡山人陳時發屏風

李俊民

道尊孔氏妙窺三絕之編市隱君平坐閱百錢之肆
 在憂患而作者其精微之教乎儻學者加以數年則

滕

愚者必有一得龜鏡角折五鹿閣東九師以變者為
占其應也如響滕公之室屈子之居晉隗炤之索金
漢張伯之懷璧知來者逆情見乎辭筮而不從動則
有悔莫靈如卦定因三畫之重或泄此書未免六丁
之取蓋有聖人之道以斷天下之疑秦鏡雖亡幸斯
文之未喪楚龜已朽賴其策之無遺而以言讀則不
告莊靖集

副元帥討亂臣諭將士

李俊民

伊感自貽久露滔天之惡帝德乃大尚寬棄市之刑

儻滋蔓而不除將噬臍其難悔某官某誘竊戎柄包
藏禍心飛書構敵國之師詭計為奔軍之將幸免崇
山之外放敢兆蕭牆之內憂眾叛親離人怨神怒雖
欲不忌器而投鼠或恐以蹊田而奪牛若執小嫌有
傷大義忠于為國奮不顧身少正兩觀之誅彼自取
爾趙盾一字之貶我其免乎無為彼先勉出乃力莊
靖集

劾張唐臣酒過

李俊民

欲解憂於杜康佳期難遇俄立威於甯越和氣有傷

解

侯

氏自速辜酒以為禮序點揚輝而語杜菁歷階而升
 罰以兕觥宵以童殺彼醉不臧縱意所如受爵不讓
 多言數窮登牀而忤鄭公脫靴而忿力士鷓夷過左
 阿君之家沐猴舞平恩候之第自以為適不知敗德
 自以為真不知喪身至有汝陽涎流公孫腹溢賀監
 眼花夷吾舌出未歌驪駒先賦相鼠犯朱虛之令激
 灌夫之怒拳安劉伶之助帽脫張旭之項與墮地之
 遐罵到官之鄭不聞南康之納狂客不見後閣之遣
 窮賓在側雖有二豪所指豈惟十手醉猶未醒死而

復甦初遂武坐之蠅便可去矣誰謂宋門之火如此
 惡邪仰天而呼烏烏向空而書咄咄幾年程普方思
 公瑾之交一旦楚元罷設穆生之醴宜加薄責用儆
 非彝蓋省前愆勿貽後患莊靖集

酒檄

山堂酒不至
戲檄以督之

李俊民

人生貴在意適吾輩况復情鍾念樂事之難并須同
 欲之相濟山堂主人作真率會闕見在身掉船尋賀
 老於稽山齋具邀淵明於栗里盜甕而飲者醉指瓶
 而索者嘗伶婦無言宋犬不吠乃有忘刑爾汝痛讀

關

樓

館

離騷了一生於蟬螯視二豪如螺贏以其無公田而
 種林故不待百歲而乙漿莫請寧逢惡賓亦可便稱
 名士獨不與李將軍為地方且共江諮議論兵徒使
 汝陽涎流想見子幼耳熱醒猶未解釀可速傾得到
 於齊請鑿青州之事或薄如魯未免邯鄲之圍惠而
 不傷吝則有悔余言不食衆怒難犯 莊靖集

焚問舍券

李俊民

高堂主人好客不倦肇開東閣大闢南館坐上簪盃
 戶外屢滿客有趨趨而不獲進者乃持問舍之券而

徒

榮

隗

見焉其文曰不尺樓前問舍萬人海裏藏身誰念入
 室相如四壁從立自笑移居東野一物全無略叙幽
 懷勿嫌多事不欲起樓背上借宅種竹當門執蘭開
 徑訪菊不欲犬吠於門梟鳴於木鬼嘯于梁鼠穿于
 屋所望取友必端聚賓以賢筵為祭倒席因賈前鄰
 不可不迎枚不可不延醴如楚設榻似陳懸無使籍
 恥臣蔣雲羞吏宣諤諤者去唯唯者來紆餘者悅卓
 榮者哀豈樂正子後長者而不見而燕昭能自愧始
 而築黃金之臺乎主人讀畢怒而投之地客懷歸以

館

語鶴鳴鶴鳴曰吁夫心契則言入目擊則道存豈不
見鳥能擇木木豈能擇鳥哉子欲以垂雲之翼投覆
卵之巢其可邪乃取其券而焚之客于是浩然長往
不數日主人及於禍而客免焉莊靖集

求田

李俊民

願為聖人泯但得一廛田大庇天下士安用萬間屋
我館既定我鄰既卜人壽幾何生理易足約以自處
能者養福非敢望設醴楚元指囿魯叔馮驩食魚子
思餽肉乃有鄭相蒟蘆薛公首蓓陰將軍之葱葉麥

萍

逐

飯石季倫之葦蕪豆粥吏部公之藜藿天隨生之杞
菊商山隱士之紫芝少陵野老之黃獨請學為圃中
有樊遲之祿至於華元羊羹庾悅鴟炙監州螃蠏典
籤熊白雖不至於嗟來而客不可以不速蓋在人者
已所不為在已者人所不欲以小人之心為君子之
腹是則釜不須轆鼎不須覆犬不須吠蠅不須逐無
事而食有覩面目噫忘其朵頤之凶以養吾之老饕
何其耐辱莊靖集

悼犬

李俊民

金文最

卷

快

余家有畜犬始善終惡衆勸烹之姑息間其惡彌甚戊戌秋烹以饗衆衆意頗快余獨惻然悼之非土性而畜常戒于書祖陽而氣烹敢違于禮生豈不好禍皆自求爾心則獸心食者人食其志不如槃瓠其力不及韓盧盜如在齊吠如在桀楚人之井為汝溺宋人之酒為汝酸孝子為之去妻里媪為之逐婦徐勉不敢以還宅楊布不敢以易衣飢則乞鄰飽則反噬不敬而養雖猛何為稍能聽指跟於蕭何自可得終老于栢直孔門弟子寧無弊蓋之思噲等少

憐

逐

年爭效鼓刀之勇有此行者其能免乎蓋與衆而棄犬豈無故而殺牛雖然逐兇難忘上祭之情可奈嗾獒終速桃園之禍莊靖集

擬秦王擒竇建德降王世充露布

正大元年應辭科程文

元好問

臣聞天地之大無不容王者所以悉臣而悉主雷霆之擊無不滅神兵所以萬舉而萬全其有怙姦自終同惡相濟雖合縱連衡而自為得計而禁暴誅亂者理有固然輔車之勢未成連頸之刑已及陳餘之輔

肉

趙歇竟成泚水之亡公孫之得隗囂何據咸門之酷
明鑒不遠覆轍相尋我國家統接軒符亂除秦跡斷
鰲足以立四極射旄頭而靖八荒南征北怨而俱荷
來蘇西被東漸而無思不服獨茲狂狡猶爾跳梁竇
建德王世充者闖茸下材昏迷小醜要領不足以膏
斧鉞名姓不足以污簡書僭號位以自居意兵刑之
莫及狐鼠不神于畫出鷹鳩當化于陽和敢為犄角
之謀自隔照臨之造魚肉兆姓塗炭二方稔惡貫以
既盈諒靈誅之莫追五侯共憤期分項羽之尸四冢

轍

既成待葬蚩尤之骨臣與諸將等致行天討動稟睿
謀謂魏既滅則虞自亡故燕可先而齊當後肅將禁
旅進次東都賊既身來義當面喻人有請師之舉天
開悔禍之期今不自歸後將無及計即從于馴伏乃
更肆于憑陵不虞當輒之難遽有背城之役臣等先
登進擊深入合攻戰聲騰洛水之波怒氣動邙山之
色紛投戈而敵野殷流血之成川健將既殲餘衆皆
潰世充則堅壁自固特求援之方來建德則掃境赴
期曾胥亡之不悟臣等鼓已捷之勇迎自送之師破

竹未比乎發機建銳莫喻其乘勢武宇方啟突騎直
前諸將引陣以當其衝微臣卷甲以出其後疆覬自
警蟻虱相悲以彼氣之既歸當我軍之方銳亂難復
整徒誇軍属于鵲山勢不久存果見豆亡于牛谷臣
以既擒夏賊尋詣洛師示之已獲之俘縱其所遣之
使世充外謀已敗內勢又窮知無地而可逃乃詣軍
而自縛一卒不損二盜克平其東都吏民等虐政久
罹王靈甫及金鼓動發生之氣旌旗導長養之風莫
不動地懽呼戴天感泣廓妖氛而一掃混文軌而大

顧

同升平之期自今以始茲蓋伏遇皇帝陛下沉幾先
物神武應期從容高拱乎九重之中纖悉周知于萬
里之外日將旦而羣陰伏願小竊之何施天不言而
四時行宜雋功之丕應臣某等謬司戎律初乏將材
仰憑折筭之神俯遂請纓之志七旬來格微勞深愧
于禹征萬壽無疆善頌敢忘于武拜遺山集

麻杜張諸人詩評

元好問

麻信之杜仲梁張仲經正大中同隱內鄉山中以作
詩為業人謂東南之美盡在是矣予嘗竊評之仲梁

營

詩如偏將軍將突騎利在速戰屈於遲久故不大勝則大敗仲經守有餘而攻戰不足故勝負略相當信之如六國合從利在同盟而敝於不相統一有連鷄不俱棲之勢雖人自為戰而號令無適從故勝負未可知光弼代子儀軍舊營壘也舊旗幟也光弼一號令而精彩皆變弟恐三子者不為光弼耳遺山集

故物譜

元好問

予家所藏書宋元祐以前物也法書則唐人筆迹及五代馮本為多畫有李范許郭諸人高品就中薛稷

畫

六鶴最為超絕先大父銅山府君官汲縣時官賣宣和內府物也銅碌兩小山以酒沃之青翠可摘府君部役時物也風字大硯先東巖君教授鄉里時物也銅雀研背有大錢一天祿一堅重綴密與石無異先隴城府君官冀州時物也貞祐丙子之兵藏書壁間得存兵退予將奉先夫人南渡河舉而付之太原親舊家自餘雜書及先人手寫春秋三史莊子文選之等尚千餘冊并畫百軸載二鹿車自隨三研則瘞之鄭村別墅是歲寓居三鄉其十月北兵破潼關避於

往

女几之三潭比下山則焚蕩之餘蓋無幾矣今此數物多予南州所得或向時之遺也住在鄉里常侍諸父及兩兄燕談每及家所有書則必枚舉而問之如曰某書買於某處所傳之何人藏之者幾何年則欣然志之今雖散亡其綴緝裝褱籤題印識猶夢寐見之詩有之維桑與梓必恭敬止以予心忖度之知吾子孫却後當以不知吾今日之為恨也或曰物之閱人多矣世之人玩於物而反為物所玩貪多務取巧偷豪奪遺簪敗履惻然興懷者皆是也李文饒志平

元

趨

泉草木有後世毀一樹一石非吾子孫之語歐陽公至以庸愚處之至於法書名畫若桓玄之愛玩玉涯之固護非不為數百年計然不旋踵已為大有力者負之而趨我躬之不可必矣我後之邇哉予以為不然三代鼎鍾其初出於聖人之制今其歎識故在不日永用享則曰子子孫孫永寶用豈為聖人者超然遠覽而不能忘情於一物耶抑知其不能必為我有而固欲必之也蓋自莊周列禦寇之說盛世之誕者遂以天地為逆旅形骸為外物雖聖哲之能事有不

趨

滿一笑者况外物之外者乎雖然彼固有方内外之
辯矣道不同不相為謀使渠果能寒而忘衣飢而忘
食以游於方之外雖眇萬物而空之猶有託焉爾如
曰不然則備物以致用守器以為智惟得之有道傳
之無媿斯可矣亦何必即空以遺累矯情以趨達以
取異於世耶乃作故物譜丙申八月二十有二日洛
州元氏太原房某引遺山集

郡守天池祈雨狀

元好問

維太歲甲辰四月辛未朔二十四日甲午忻州某官

等惶恐百拜獻狀天池龍君殿下惟神血食一方膏
潤千里靈應之迹著見有年某等資品凡陋德薄任
重不能撫安閭里召迎和氣自開歲以來雖嘗被一
溉之賜既雨而旱今已十旬夏苗欲枯秋稼無望民
庶嗷嗷將遂逋播匪我神明則將疇訴乃消吉日謹
遣管内僧某道士某躬詣靈湫奉迎甘澤某卑職所
限止于道左恭俟雲輿風馬尚辱臨之不勝懇禱之
至謹狀遺山集

至謂林處心其...
 新五正直式恭...
 立晉初曾某...
 無嫌嫌糾...
 魏正朔...
 重不...
 陳十...
 善...

金文最卷一百十

雜著

曹南商氏千秋錄

元好問

曹南商氏族姓所起見於遠孫正奉大夫贈昌武軍
 節度使衡所著千秋錄備笑蓋自少典而降得姓者
 十四契始封商以子命氏十三世而至湯十七世而
 微子代殷後為偃王又二十六世於秦於兩漢于曹
 魏六朝隋唐詳見于家譜者以節度君推世次系出
 陳之長平長平殷高宗之家在為遠祖司空伯唐史

顯

號入

顯隆

有傳太和中再領天平節鉞子羽舉進士藩府辟召
 不至通顯子盈孫僖宗聞其有禮學擢為太常博士
 終於大理卿贈吏部尚書子暄暄之子處讓處讓之
 子嶽已上失其官號俱為唐人嶽之子諱懷欽入五
 代十年生周顯德三年劉燦榜擢第終於宋建隆四
 年朝奉郎試大理評事知曹州南華縣事致仕因家
 於曹享年九十四詳見譜謀蓋自司空而後為鄆人
 南華而後為曹人避宋宣祖諱改姓商氏逮節度君
 九世矣南華之子擅淳化三年孫何榜擢第累官至

園

即

繼

比部郎中生七子宗聖宗傳宗回宗弼宗旦宗奭宗
 昱宗傳宗弼宗旦三子登科宗傳咸平三年陳堯咨
 榜擢第初仕蜀川後乃隔絕不知所終宗弼大中祥
 符五年徐奭榜擢第累遷至中書舍人仁宗朝時譽
 藹然有卿輔之望其後不樂仕進年未五十乃挂冠
 築堂曹南之西園名曰晦道時賢高其勇退盛為稱
 道之享年七十娶冀氏封金華縣君生八子倚備儼
 傳佑儀似偕倚備傳儀四子登科郎節度君六世祖
 也宗旦字繼周天聖五年王堯臣榜擢第官至朝奉

金華縣

豐

繼

郎知桂陽監平陽令享年五十二娶卞氏生四子伊
灝侑侑詳見墓誌長子伊伊子諶倚元豐五年黃裳
榜第一甲第三人擢第初任太原教授太學博士後
元祐黨事興碑其名於餘官之列一子中立備皇祐
三年馮京榜擢第三子穆之伯之適之傳字夢臣皇
祐五年鄭獬榜擢第繼登說書科授國子直講終於
光祿寺丞出知魏州朱陽縣事亦足以知當時重守
令之選也享年六十一累贈太中大夫娶李氏封恭
人詳見墓誌即節度君五世祖也生七子千之元之

承

立之延之坦之成之貫之元之貫之登科依嘉祐四
年劉輝榜擢第終於通直郎致仕享年七十四娶張
氏生五子先之才之孝之說之直之先之說之登科
元之熙寧九年徐鐸榜擢第終於承議郎濟川鉅野
令熙寧金山寺碑在焉娶蕭氏四子因團冉丙因登
科先之元豐五年黃裳榜擢第終於衡州茶陵令貫
之字以道後改名又元祐六年馬洵榜擢第張君向
辟為計司屬官終於朝散郎知懷州武德鎮致仕享
年六十七娶張氏封安人即節度君之高祖也生六

邱

子周同周冊丹甫皆業進士說之建交五年李易榜
擢第授鄧州文學後攝濟陰主簿阜昌二年通判興
仁軍府事張君檄文商文學素勤學古可使入官今
保舉堪赴吏部注擬差遣竟不就享年六十娶傅氏
即龍圖公之女孫也四子默點勳黜默然後改名休復
字子泰風儀秀整襟量夷曠博學有文老居汴梁娶
江氏即金紫公鄰篋女孫也有陶丘先生文集行于
世諶九舉終場建中靖國元年恩賜進士第終於虔
州大庾令因紹聖四年何昌言榜擢第終於通仕郎

聲宗

從解

從

望

顯

開德府臨河縣令三子大有大毅大臨周宣和元年
以父守朝散郎致仕奏補累官至通直郎開德府濮
陽縣丞一子驤岡字元壽建炎二年逆劉錫太尉解
危滄州奏補拱輔從事入金朝換忠勇校尉享年七
十二即節度君之曾祖也初娶周氏再娶鄭氏二子
駒馳冊字元功丹字大忠後改名愈字師心為施內
翰朋堂詩酒之友生二子驥駸皆早世甫字子華俱
以儒業顯于鄉里學者宗之祖駒字士龍兩赴庭試
天資和雅博學強記教授鄉里泰和元年五月十五

稽

定

日以壽終享年七十一祖母郝氏封宜人三子長永
 錫字難老次敷錫字福老次康錫字吉老難老用公
 貴及封朝請大夫致仕妣王氏濮陽郡太夫人三子
 仲曰衡字正叔滑州豪俠有古人風季曰衍字信叔
 穎悟早世公朝請君之長子也字平叔幼從祖學長
 師鄉先生李若訥若訥愛其才每器重之年二十五
 擢崇慶二年黃裳榜詞賦進士第釋褐主郟州洛交
 簿以廉能換郟縣尋辟威戎令時興定已邠歲飢民
 無所於糴公乃開倉賑濟然後白之行臺賴以全活

眾

敵

關

聲勢

慶

爾

者甚眾夏六月地震城郟摧圮夏人乘釁入寇公率
 領藩部土豪守禦應敵保以無虞秩滿縣人為之立
 祠再辟原武令以例嚴入為尚書省掾歷糧草邊關
 知管差除三房考再滿授戶部主事兩月擢授監察
 御史姨母鄰國夫人不時入禁中干預政事殷勢甚
 張公拜章極言自是鄰國被台乃敢進見宗室帥
 山奴軍淮南歸州失利朝廷置而不問公建言自古
 敗軍之將必正典刑不爾則無以謝天下詔為決杖
 八十因而退嚴戶部侍郎權尚書曹温時一女在掖

五文最

二

從

克

偕克

從

庭從史親舊干預權利其家人填挿諸司貪墨張露

而臺官無敢言者公歷數其罪詔罷温戶部改太后

府衛尉公再上章若臣言温可果罪當貶逐温無罪

則臣為妄言豈有是非不別而兩可之哀宗為之動

容乃出温為汝州防禦使未幾改右司都事朝廷知

公蓋將大用矣改同知河平軍節度使事不赴奏克

樞密院經歷官遙領同知昌武軍節度使事丞相完

顏莘公領陝西行臺奏公偕行克左右司員外郎仍

佩以金符密院表留有旨行臺地重急於用人可從

從

藍

能元典

敵

從能

丞相奏自是臺務一決于公矣明年召還行臺再奏

留之又明年丁內艱乃得還平章政事蕭國侯公塞

京東河決奏公以左右司郎中從行正大八年十月

起服中充秦藍總帥府經歷官正月河潼失守召主

帥入援二月九日軍至陝將由閒道之長水界與北

軍遇相拒大雪中士卒飢凍不能戰主帥元興棄衆

降敵公為北軍所得令去中公瞋目大呼曰汝欲脅

從我耶我終不能降迴望關瞻拜曰主將無狀亡兵

失利臣之罪責亦無所逃但一死報國耳遂拔佩刀

繼

陵

宏

自頸時年四十有六褒贈正奉大夫昌武軍節度使

初娶鄧氏繼娶鄭氏並封濮陽郡夫人子男二人長

日挺字孟卿業進士次日援字仲經女一人適進士

劉茂孫男七人琥璘璿皆業進士璋瓛瑄及女孫

二人尚幼初河間許古道真以直言極諫稱于德陵

朝正大初詣闕拜章言八座皆非其材省寺小臣有

可任宰相者不大升黜之則無以致中興章奏召道

真赴都堂問孰為可相道真以尚書省掾商衡對當

是時上新即大位經略四方思所以弘濟艱難者為

己司

為

能

鹽

能

禍

甚力道真既得請居伊川即命驛召致之復右師諫

天下相望風采道真亦慷慨願以人所不敢言者為

天子言之及論天下事首以公為可相則公之材可

知矣公事長上以禮接下以誠與人交敦終始家居

怡然毋愠容性嗜學藏書數千卷古今金石遺文人

所不能致者往往有之南渡以來士大夫以拯世之

學自名高者闊略而無所統紀下者或屑屑于米鹽

簿書之間公天資雅重遇事不碌碌人所不能措手

者卒優為之苟可以利物則死生禍福不復計平居

卷之六

以大事自任而人亦以大任期之評者至今以公用
違其長使之卒然就一死為斯世惜也故好問銘其

墓云云按公所藏及記錄者有唐武德三年遠祖司

空勛國公開山誥有體質平允才器敏洽宣力義旗

功上恭造珠可吏部尚書宣和內府物也已下皆晦道

錄家自餘玉牒受之楚尾毛觀後給事中知曹州興仁

軍府事三衢處襄贊元濟北李那商老任庭至鄧忠

臣山東路提刑使濟陰賀公叟楊庭東平路轉運使

鄉先生李上達及子省元防方平濮州軍事判官林

參

楚

盧玉

榮

參

篇

奉

棟姚建榮興祖尚書左丞壽國公金城高汝礪嚴甫

同知臨洮府事兼積石州刺史平陽孔天監偉明尚

書右丞汶水賈守謙益之諫議大夫潯南許古道真

戶部尚書權叅知政事臺山楊造叔玉尚書左丞日

照張行忠信甫平章政事蕭國公東阿侯摯莘卿大

司農戶部尚書相人張正倫公理等書札詩編在家

翰林應東明王鶚百一嘗作誥詞云出知外縣凜乎

其德讓之遺入掾中臺魁然有宰輔之望禮部閑閑

趙公許與公有鵬飛九萬里風斯在下之語其為時

建文錄

豐竊從

淵

雨

檣遲顧

從並館

執

玉

賢所推重如此尚何待僕言正叔以通家之故請為
千秋錄作後記因得伴右之或疑商氏名德相望而
報施未豐者竊以水喻之今夫流泉出石罅間從濫
觴之微涓涓而不絕及其合支流會衆川儲蓄淵渟
盡洄洑舒徐之態鼓之以長風驅之以迅雷泄雲雨
而涵鬼物雖有千石之舟十丈之牆遲迴顧盼而不
敢發蓋從微至著而有本者必如是耳今孟卿館嚴
侯之門者十餘年侯温然執擁篲之敬海內名勝率
以清廟之器許之諸郎至立秀發生長見聞宜有不

資于人而自媿者正叔年甫六十安閑樂易福祿方
來他日羔鴈成群極人門盛事當信僕言之不妄云
癸丑二月吉日河東元好問裕之謹書 遺山集

優伶語錄

楊宏道

堅白子居於般溪之上不慕榮利喜為文章田食井
飲與世浚然藁尔山城再罹大兵雞犬不聞四郊草
荒一官不調未獲祿食親舊離散無所假貸祇服避
地之訓歲九月而有汴梁之行所以赴銓調訪親舊
也傳曰適百里者宿舂糧適千里者三月聚糧生業

爾

白

卷之八

九

能

欲

既失安在其能三月也行次濟水之陽有同途者亦欲踰大河之南不負不荷若有餘齋言語輕雜容止狎玩怪而問之曰我優伶也且曰技同相習道同相得相習則相親為相得則相恤為某處某人優伶也某地某人亦優伶也我奚以資糧為言竟自得之色浮于面聞之有感于余心者夫人之所以貴乎為士者為其道存焉耳仁義道之本與仁以安人義以利人使人利而安之相親相恤者近為優伶世之弄人也而有是哉而有是哉因且自念修身慎行讀書著

歎

獨

論

興定

淵欲

或決

顯

碌

能

獻

文幾年于今矣獨無所同然乎我側聞某官大夫名德之日久矣未嘗望清塵拜下風得接粲花之倫今也路出東原興定元年東平府錄事雷晞顏名淵欲致謁于左右擬而未敢進也俄而自笑曰何期大夫之淺耶仁義之道在彼而不在此乎我曰為期固乎大夫決巍科馳令聞自致于青雲之上汝身不顯于世名不稱于人沉滯碌以窮于途旅果同乎堅白子曰轅下之駒德不配驥然亦馬也謂之非馬可乎或者不能對因錄優伶之語以為獻伺侯門外進之麾之唯命小亨集

金文最

錄大梁事

劉祁

趨聲 八 懼 決參 關

金正天八年辛卯冬十一月余居淮陽北兵由襄漢東下時老祖母老母在南京趨往省為既至京師邊轂益急聞北兵阻荆江與平章政事完顏哈達等謀縱北兵東渡將以勁騎入江北兵既渡皆殊死戰哈達兵不能過遂帥入都尉退保鈞州北兵襲之不進時朝廷憂懼不知所為然天下勁兵皆為二帥所統倚以決存亡又命參知政事圖克坦烏登殿前都檢點完顏重喜提兵扼潼關九年正月下詔求言于

從

會

者

東華門接受陳言文字日令一侍從官居門待言者雖多未聞有施行者蓋凡得士庶言章先令諸朝貴如御史大夫費摩阿固岱戶部尚書完顏努森等披詳可然後進多為諸人革映百無一達者余時亦憤然上書且求見口陳曾翰林修撰李大節直于門余付之且與論時事李曰今朝廷之力全在平章副樞者此一戰如何余無可奈何矣時正月十七日也翌日報聞十六日鈞臺與北兵戰酣會天大雪沒膝我師皆凍不能支轉戰良久北兵復自孟津南渡與南

惡能

俊使

來諸兵會我師遂大敗伊喇蒲阿就擒完顏哈達竄
 于地穴中為所發見殺都尉苗英高英樊澤中郎將
 完顏綽華善諸驍將皆死京師大震下詔罪已改元
 開興為守禦京城計四面置帥府置行戶工部和斯
 濟雅博斯納帥北面李新帥東面范正之帥南面完
 顏實訥阿卜帥西面富察君平張俊民張師魯舒穆
 魯世勳分領戶工部事時平章政事兼樞密司完顏
 巴薩樞密院副使持嘉哈希用事二人奸佞無遠略
 士庶皆惡之末帝信用不能斥去識者知其誤國矣

爾

御從

從

俄聞陷鈞州又陷許州許帥布掄死之二月陷陳州
 陳帥紐赫努色尔死之京畿諸邑所至殘毀末帝在
 宮中時聚后妃涕泣嘗自縊為宮人救免又將墜樓
 亦為左右救免尔史大夫費摩阿固尔吏部侍郎劉
 仲周等詣北兵告知不從三月北兵迫南京上下震
 恐朝議封皇兄荆王守純子肅國公某為曹王命尚
 書右丞李蹊等奉以為質子于軍前擢應奉翰林文
 字張本為翰林院侍講學士尔從以北北兵留曹王營
 中李蹊等回具言彼雖受之待北援京城將不免攻

金史卷一百一十五

三

稍

從洵

虛

趨

明日北兵樹礮攻城大臣皆分主方面時京城西南
 隅最急完顏巴薩主之西北隅尤急持嘉哈希主之
 東北隅雖緩丞相完顏薩布主之獨東南隅未嘗攻
 時人情洶洶皆以為旦夕不支末帝親出宮巡四面
 勞軍故士皆死戰帝出從數騎不張蓋縱路人觀余
 時在道左欲詣陳便宜忽見一士捧章以進帝命左
 右受之諭曰入宮看讀當候之余謂此時當馬上覽
 奏行事今云入宮又虛文也遂趨去已而其事竟無
 聞北兵攻城益急礮飛如雨用人渾脫或半磨或半

能

顯

號

號

高胤

雖莫能當城中大礮號震天雷應之北兵遇之火起
 亦數人灰死軍士又自城根暗突_門出殺傷甚眾總領
 富察古納高顯劉奕皆以力戰有功衆庶推之皆擢
 為帥使分守四面相接應時自朝士外城中人皆為
 兵號防城丁壯下令有一男子家居處死太學諸生
 亦選為兵_{諸生}訴于官請另作一軍號太學丁壯已而朝
 議以書生輩廷羸不任役將發為礮夫諸生劉百熙
 楊煥等數十人伺上出詣馬前請自効上慰諭令分
 付四面戶部工作委差官由是免礮夫之苦平章已

從

執

刻

薩怒諸生之自見上也趣召赴都以緩期杖戶部主
 事田芝又分令諸生監送軍士飯食視醫藥書礮夫
 姓名又令于城上放紙鳶鳶書上語招誘脅從之人
 使自拔以歸受官賞皆不免奔走矢石間又夜舉燈
 毬為令使軍士自暗門出劫戰令諸生批後燈滅者
 死諸生甚苦之俄以燈毬未具杖刑部郎中舒穆魯
 世勣以前戶部侍郎李渙代之巴薩本無守禦才但
 以嚴刻立威譽夏四月八日始輟攻下詔改元天興
 傳聞北朝有命令勿擊衆謂攻三日不解城將隳已

館

館館使

執趨館

而城上望見北兵焚礮車衆皆以相賀俄聞北兵不
 退駐兵邏之由是知禍未艾也士庶往往縱酒肉歌
 呼無久生心秋七月北兵遣唐慶等來使且曰欲和
 好成金主當自来好議之末帝託疾卧御榻上見慶
 等掉臂上殿不為禮致來旨畢仍有不遜言近侍皆
 切齒既歸館餉勞是夕飛虎軍數輩憤慶等無禮且
 以為和好終不能成不若殺之快衆心夜中持兵入
 館大譟殺慶等館伴吏鄂屯安濟庫二人及晝亦死
 遲明宰相趨赴館視之軍士露刃詣馬前請罪宰相

遲

宰相

勞禍

虛

遑遽慰勞之上因赦其罪且加犒賞京師細民皆騷
呼踴躍以為太平識者知其禍不可解矣八月恒山
公武仙提兵自鄧赴京師上命副樞哈希出兵援之
至密縣遇兵哈希遽退走仙兵與北兵轉戰于鄭州
之西南會圖克坦烏登亦提兵東來相遇戰久之由
哈希兵不相接皆敗仙引餘兵南歸烏登亦西走哈
希還京師士庶罪其誤國上不得已廢為民時京師
被圍數月倉廩空虛尚書右丞李蹊坐糧不給下獄
已而免死除名擢前戶部侍郎張師魯為戶部主糧

儲事時民間皆言官將搜百姓糧人情洶洶甚欲
以為憂冬十月果下令自親王宰相以下皆存三
月糧計口留之人三斗餘入官隱匿者處死命御
史大夫費摩阿固岱率總知開封府圖克坦伯嘉
主之其餘朝廷侍從官分領其事凡主者所往劍
戟從焉戶閱人語不少緩用鐵錐監之石杵震之
城中士庶人不爨以待或搜獲隱匿者械于街雖
皇兄后妃家皆不免軍士突入妃主驚逃驅繫奴
婢使之指陳所匿京師巨家著姓被罪者甚多總

議
已

領富察鼎珠尤酷甚杖殺無辜數人凶黠輩因之
為奸利由是百姓離心識者知其必亡十二月朝
儀以食盡無策末帝親出東征丞相薩布平章布
薩右丞完顏溫綽工部尚書權參知政事李蹊
樞密院判官白華近侍局副使李大節左右司郎
中完顏進德張袞總帥圖克坦伯嘉富察古
納高顯劉奕皆從上與太后皇后諸妃別大慟誓
以不破敵不歸儀衛蕭然見者悲愴留參知政事
完顏努森匿密樞密副使完顏實訥阿卜權行尚

顯

書省兼樞密事以餘兵守南京上既出過鞏州帥完
顏呼沙呼提兵轉戰來赴援因從以東初上疑東面
帥李新跋扈有妄言先罷為兵部侍郎將出密諭二
守臣羈繫已而上出二人者以事召新詣省新疑其
見擒縱馬突城門欲出門者止之新棄馬踰城二人
者遽命將追及墮湟水中斬其首時末帝既出人情
愈不安日夜望東征之捷俄聞北渡前鋒方交戰
有功取蒲城進取衛州巴薩等望見北兵遽勸上登
舟船南渡從官多攀從不及死于兵而驍將圖克坦

歸

伯嘉高顯劉奕輩初不知上去已而軍士皆散沒工
以餘兵狼狽入歸德杜門京民大恐以為將不救矣
二守臣素庸闇無謀但知閉門自守百姓食盡無以
自生米并直銀二兩貧民往往食人殍死者相望官
日載數車出城一夕皆剮食其肉淨盡播紳士女多
行匍于街民間有食其子錦衣寶器不能易米數升
人朝出不敢夕歸懼為飢者殺而食平日親族交舊
以一飯相避于家又曰殺乘騎馬牛自啗至于箱篋
鞍韉諸皮物凡可食者皆煮而食之其貴家第宅與

日

歸

繼

夫市中樓館木材皆撤以爨城中觸目皆瓦礫廢區
無復向來繁侈矣朝官士庶往往相結携妻子突出
北歸衆謂不久當大清二年正月末帝遣近侍局使
圖克坦色實等入南京取太皇后皇后諸妃嬪赴歸
德既出城與北兵遇復倉皇歸宮于後色實獨携其
族以去末帝斬之時外圍不解上下如在陷穽中且
相繼殍死議者以為上既去國推立皇兄荆王以城
降庶可救一城生靈且望不絕完顏氏之祀是亦春
秋紀侯大去其國紀季鄰入于齊之義不得已者况

北兵中有曹王也朝士皆知莫敢言二守臣但曰當以死守衆憤二人無他策思有一豪傑出而為之救士民余夕見左司郎中楊居仁白其事楊云是事固善然孰敢倡者彼二執政亦知之而不敢言且不敢為也二十一日忽聞執政召在京父老士庶計事詣都堂余同麻革潛衆中以聽二執政立都堂簷外楊居仁諸首領官從焉省掾元好問宣執政所下令告諭且問諸父老便宜完顏努森拱立無語獨完顏實訥阿卜決復申諭以國家至此無可奈何凡有可行

繼

當共議且繼以泣涕諸愚叟或陳說細微不足採余語麻革將出而白前事革言莫若以奏說密陳子歸草之吾當共上也余以是退將明日同革獻書其夕頗聞民間稱有一西南崔都尉藥招撫者將起事衆皆曰事急矣安得無人余既歸夜草書備論其事達明懷以詣省度且邀革往自斷此事係完顏氏存滅且以救餘民雖死亦無愧矣是旦大陰晦俄雨作余姑避民間忽聞軍馬聲市人奔走相傳曰達剌入門矣余知事已不及遂急歸路聞非北兵蓋西南兵變

斷

繼

民

已圍尚書省矣時崔立為西面都尉權元帥同其黨韓鐸等舉兵藥安國者北方人素驍勇為先鋒以進橫刃入尚書省崔立繼之二執政見而大駭曰汝輩有事當好議安國先殺實訥阿卜次殺努森又殺左司郎中納噶德暉擊右司郎中楊居仁聶天驥創甚省掾皆四走竄匿民家崔立既殺二人提兵尚書省號令衆庶曰吾為二執政閉門誤衆將餓死今殺之以救一城民且禁諸軍士取名一錢處死闔郡稱快以為有生路也食時忽陰雨開霽日光爛然立提兵

歸
歸

東

入宮見太后自陳其事太后惶怖聽命拜立為左丞相都元帥壽國公立以太后令釋衛邸之囚召衛王故太子梁王某監國遂取衛族皆入宮即遣使持二執政首詣軍前納降款明日立坐都堂召在京父老僧道百姓諭言皆曰謝丞相得生立又自詣軍前投謁歸附命歸令在京士庶皆割髮為北朝民初立舉事止三百人殺二執政當是時諸女直將帥四面握兵者甚多皆束手聽命無一人出而與抗者人謂李新若在決與立抗衡新死故立得志立變之日御史

大夫費摩阿固岱提點近侍局兼左右司郎中烏克
遜努色爾縊于臺中戶部尚書完顏仲平亦自殺初
兵以副元帥藥安國首事難制忌之因其夜取故監
軍王守之妻旦坐都堂以安國犯令叱左右斬以徇
于是朝士震悚無令不從梁王雖監國在宮中虛名
而已立以其弟某為平章政事張頌為殿前都點檢
韓鐸為副元帥知開封府左司都事舒布哩濟之為
御史中丞皆其黨也又以吏部侍郎劉仲周諫議大
夫張正倫參議省事蓋立取仲周女為妻正倫有人

參
參

望也又以前衛尉鄧屯阿固岱為尚書右丞殿前都
點檢溫德亨伊實為參知政事仲周正倫皆進參知
政事省令史元好問為左右司員外郎又以刁壁為
兵部尚書元帥左監軍初立起與壁謀及其期壁不
往立頗怒之故不得執政一時人望與士大夫退閒
者皆以次遷擢臺閣中其除拜無虛日俄立自為太
師尚書令鄭王聞鈞汝間有衆據西山不從命立遣
韓鐸帥兵討之鐸中箭死以折希顏知開封府立又
封諸內藏庫將以奉北兵亦往往取婦其第又搜選

歸

挑

民間寡婦處女亦將以奉北兵然入其家者甚衆又括刷在京金銀命百官分坊陌窮治之貴人富家俱被害陳國夫人王氏末帝姨也素富于財平章巴薩夫人亦富侈右丞李蹊舊以取積聞其妻子皆被擄掠拷訊死立又自詣軍前求免剽掠又求縱百姓出城挑菜充飢于是人得出近郊採蓬子窠甜苣菜雜米粒以食又聞京西陳岡上有野麥甚豐立請百姓往收之立又聚皇族皆入宮俄遣詣青城皆為北兵所殺如荆王梁王輩皆預焉獨太后皇后諸妃嬪宮

徒

輦

富

人北徒百姓初聞皇族當北往有羸其間者亦被誅軍前又取壬辰諸宰執家屬治罪為殺唐慶事故相侯摯亦見殺四月二十日使者發三教醫匠人等出城北兵縱入大掠立時在城外營中兵先入立家取其妻妾寶玉輦以出立歸大慟亦不敢誰何大臣富家多被荼毒死者而三教醫匠人等在青城側亦被剽奪無遺俄復遣三教人入城許百姓與北兵市易城中人以所餘金帛易北來米麥食之然多為北兵劫取莫敢語余時同諸生復入居八仙館中五月二

十有二日會使者召三教人從以北嗟乎此生何屬
親見國亡至于驚怖勞苦萬狀不可數述因暇日記
憶舊事漫記于編若夫所傳不真及不見不聞者皆
不敢錄歸潛志

錄崔立碑事

劉祁

崔立既變以南京降自負其有救一城生靈功謂左
司負外郎元裕之曰汝等何時立一石書吾狀耶時
立國柄入手生殺在一言省庭日流血上下震悚諸
在位者畏之于是乎有立碑頌功德議數日忽一省

卒詣余家齋尚書禮房小帖子云首領官召赴禮房
余初愕然自以布衣不預事不知何謂即往至省門
外遇麻信之余因語之信之曰昨日見左司郎中張
信之言鄭王碑事欲屬我輩作豈其然耶即同入省
禮房省掾曹益甫引見首領官張信之元裕之二人
曰今鄭王以一身救百萬生靈其功德誠可嘉今在
京官吏父老欲為立碑紀其事衆議屬之二君且已
白鄭王矣二君其無讓余即辭曰祁革布衣無識此
非所當為况有翰林諸公如王文從之及裕之輩在

趨

祁等不敢裕之曰此事出于衆心且吾曹生自王得之為之何辭君等無讓余即曰吾當見王文論之裕之曰王論亦如此矣余即趨出至學士院見王文時修撰張子忠應奉張元美亦在焉余因語其事且曰此實諸公職某等何預焉王曰此事議久矣蓋以院中人為之若尚書檄學士院作非出于在京官吏父老心若自布衣中為之乃衆欲也且子未仕在布衣今士民屬子子為之亦不傷于義也余于是陰悟諸公自以仕金顯達欲避其名以嫁諸布衣又念平生

為文今而遇此患難以是知楊子雲劇秦美新其亦出于不得已耶因遜讓而別連延數日又被督促知不能辭即略為草定付裕之一二日後一省卒來召云諸宰執召君余不得已赴省途中遇元裕之騎馬索余因劫以行且拉麻信之俱往初不言碑事止云省中召王學士諸公會飲余亦陰揣其然既入即引詣左參政幕中見參政劉公謙甫舉盃屬吾二人曰大王碑事衆議煩公等成之甚善余與信之俱遜讓曰不敢已而謙甫出見王文在焉相與酬酢酒數行

參
參

歸

可

日將入矣余二人告歸裕之曰省門已鎖今夕即當留宿省中余輩無如之何已而燭至飲余裕之倡曰鄭王碑文今夕何畢手也余曰有諸公在諸公為之王文謂余曰此事鄭王已知衆人請太學中名士作子如堅拒使王知書生輩不肯作是不許其以城降也則銜之刻骨縉紳俱受禍矣是子以一人累衆也且子有老祖母老母在堂今一觸其鋒禍及親族何以為智子熟思之余惟以非職辭久之且曰余既為草定不當諸公竟請改命他人諸公不許促迫甚余

曰裕

知其事無可奈何則曰吾素不知館閣體今夕諸公共議之如諸公避其名但書某名在諸公後于是裕之引紙落筆草其事王文又曰此文姑使裕之作以為君作又何妨且君集中不載亦可也余之作政宜某復何言碑文既成以示王文及余信之欲相商評王文為定數字其銘詞則王文裕之信之及存余舊數言其碑序全裕之筆也然其文止實叙事亦無褒稱立言時夜幾四鼓裕之趣曹益甫書之裕之即于燭前焚其藁遲明余輩趨去後數日立坐朝堂諸宰

詣

執首領官共獻其文以為壽遂召余信之等俱詣立
第受官余輩深懼見立俄而諸首領官齎告身三通
以出付余輩曰特賜進士出身因為余輩賀後聞求
巨石不得省門左舊有宋徽宗時甘靈碑有司取而
磨之工書人張君庸者求書刻方畢北兵入城縱剽
余輩狼狽而出不知其竟能立否也嗟乎諸公本畏
立禍不敢不成其言已而又欲避其名以賣布衣之
士余輩不幸有虛名一旦為人之所劫欲以死拒之
則發諸公嫁名之機諸公必怒怒而達崔立禍不可

安

測則吾二親何以自存吾之死所謂自經于溝瀆而
莫之知且輕殺吾身以憂吾親為大不孝矣况身未
祿仕權義之輕重親莫重焉故余姑隱忍保身為二
親計且其文皆眾筆非余全文彼欲嫁名于余余何
得而辭也今天下士議往往知裕之所為且有曹通
甫詩楊叔能詞在亦不待予辯也因書其首尾之詳
以誌年少之過空山靜思可以一笑

歸潛志

正印